

## Rediidx Nani Bacuaa Lucas Xcuent Jesucrist

### *Xhicuent bacuaa Lucas rediidxre*

<sup>1</sup> Xhidajl bejn abacuaa lo guijtz xcuent guiraa redzuun ni gujc nez loonu te cuäxnejzreni redzuunga <sup>2</sup> si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu. <sup>3</sup> Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo, <sup>4</sup> te gacbesa'c guejblu ni najc didxlii xcuent guiraa rediidx ni abisieed guejblu.

### *Te xangl Dios gunii xho gaal Juan ni rutiobnis*

<sup>5</sup> Cheni gujc Herodes reii xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdoo bixhoz Aarón. <sup>6</sup> Guiro'preni najczeni nadolajz nez loj Dios, rusoobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl. <sup>7</sup> Luxh ruti xi'nreni, sa'csi chäälni digacdi chu xi'nni. Luxh guiro'preni anajczeni bengool.

<sup>8</sup> Te dxej, laļ ni cayujn Zacarías dzuun nen guidoro si'c bixhojz nez loj Dios, <sup>9</sup> dxejc con daad bibee chuni'c jiu' nen yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni. <sup>10</sup> Laļ ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios. <sup>11</sup> Dxejcti baluiloj te xangl Dios lo Zacarías, suliiini ladbee lo dxan cadre cayejc guxhyaal. <sup>12</sup> Che bahuii Zacarías lo xangl Dios, di

jien xhi gunni, lacti bidxebduxhni. <sup>13</sup> Sas xangl Dios räjp lojni:

—Na'c guidxejblu, Zacaríi, sa'csi Dios abiejn diajgni xtiidxlu, luxh su' te xi'n cháálu, Elisabe't; cuälajluni Juan. <sup>14</sup> Sibalazduxhlu, siroob lastoolu; xhidajl bejn sibalajz sa'csi gaalni, <sup>15</sup> sa'csi benro gac xi'nlu nez loj Dios. Dini yä bin, nicla maxcaal. Sibäjz Sprit Dxaan xten Dios nen lastooni cheni gaallini. <sup>16</sup> Sujnni gusiechajz xhidajl rexpejn Israel, guibi'reni lo Gueb Dios. <sup>17</sup> Juanre sinijdni loj Dad, sujni lagajc xhigab, sajpní lagajc yälrnibee ni gojp profe't Elías, te che jiejn diajgreni xtiidxni susiechajz redad, susiäjzarení diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jiädsuचेeni lastoo rebejn te chalilajzreni xtidx Dad ni jiääd.

<sup>18</sup> Gunabdiidx Zacaríi loj anglga, räjpni:

—¿Xho mood gacbeä guliilu? Sa'csi anacä bengol, sigajcza chälä.

<sup>19</sup> Dxejcti räjp anglga lojni:

—Narä nacä Gabriel, runä dzuun lo Dios. Laani baxhalni narä te guininää luj, jiädnää didxhueenre lojlu.

<sup>20</sup> Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisaclu. Rextidxä sisiojb che guidzujn dxej che riäjz gacni.

<sup>21</sup> Lalni cayajc dee, cadxeloj rebejn ni suga' nez ro' yudxan cabäjzreni guiríi Zacaríi sa'csi cayaclaani nen yudxan. <sup>22</sup> Che biríi Zacaríi, di niajcdiru niniini loj rebejn; dxejc gucheereni yu' xhi cosro bahuiini nen yudxan xten guidoo. Dxejc con seen guninäjni rebejnğa, sa'csi xheti xse'ni te niniini.

<sup>23</sup> Che gulujx bejnni dzuun nen guidoro, gubi'ni rolijzni.

<sup>24</sup> Che gudejd redxey dxejcti bazen nuu Elisabe't, cháälni, báz, gaii bäi diruni niri rolijzni. Bejnni xhigab, räjpni:

<sup>25</sup> “Si'c bejn Dad Dios narä naj, gucnäjni narä te diru bejn cuälaz narä sa'csi ruti xi'nä.”

*Biäddeed te xangl Dios diidx lo Marii gaal Jesús*

<sup>26</sup> Che gudejd xho'p bäii, baxhaļ Dios xanglni Gabriel lo te guedx Galilee ni laa Nazare't, <sup>27</sup> te chahuiini te dxapxteeb ni laa Marii. Agojt xtiidxni te guchnaani te dade' ni laa José. Dade're najc xagdoos toreei David. <sup>28</sup> Biu' anglre cadro sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäjlū. Abenle' Dioslu loj guiraa regunaa.

<sup>29</sup> Luxh che bahuiini lo xangl Dios bidxelojni lo rextiidxni, rujnni xhigab: “¿Xhicuent caniini si'c loä?” <sup>30</sup> Dxejc räjp xangl Dios lojni:

—Na'c guidxexjblu, Marii; agule Dios luj. <sup>31</sup> Bacuadiajg diidx. Suulu báz, su' te xi'nlu. Che gaalni guirilajni Jesús. <sup>32</sup> Laani sajcnī te bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujn gacni reii sigajc ni gujc toxtadgoldooni David, <sup>33</sup> te tejpas guinibeeni loj rexi'n Israel, luxh dipac xcälrnibeeni nitloj.

<sup>34</sup> Dxejc gunabdiidx Marii lo xangl Dios, räjpni:

—¿Xho mood gac dee? Ni dxapxteeb narä, gajd narä gumbeä niguii.

<sup>35</sup> Badzu' xangl Dios diidxre lojni, räjpni:

—Sprit Dxan xten Dios siääd lojlu, xcälrnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajcnī te bendxan, sibälaj bejnni Xi'n Dios. <sup>36</sup> Nájza sa'lu Elisabe't su' te xi'nni luxh anajcnī te bengool; ni'cni gunaa nani najreni digacdi chu xi'nni agujc xho'p bäii nuuni báz. <sup>37</sup> Xheti te cos ni naganduxhtej nez loj Dios —räjp Xangl Dios.

<sup>38</sup> Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä.

Dxejcti biunejz angl xten Dios lojni, sä'tini.

*Bihuii Marii lo Elisabe't*

<sup>39</sup> Nen redxejga, basquejn Marii sääni lo te guejdx ni tre' nen redajn xten Judea. <sup>40</sup> Biu'ni rolizj Zacaríi, guniini xtidxbee loj Elisabe't.

<sup>41</sup> Che biejn diajg Elisabe't guniini, biniib xi'nni xque'ni, gudxaj Sprit Dxan xten Dios lastoo Elisabe't. <sup>42</sup> Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu. <sup>43</sup> ¿Chu narä te siädhuii xnan Xtioozä narä? <sup>44</sup> Biejntis diagä xtiidxlu, bibalazgajc xi'nä, biniibni xque'ä. <sup>45</sup> Sibaa lajzlu, luj ni huililajz sisiojbpac nani gunii Xtadnu Dios.

<sup>46</sup> Dxejc räjp Marii:

Xaimä rliä'p xpala'n Xtadnu Dios.

<sup>47</sup> Rbalazduxhza lastoä xcuent Dios ni ruslaa narä lo dojl.

<sup>48</sup> Sa'csi agule Dios narä,  
nacä te mos gunaa ni xhet sajcdi,  
luxh najli sinii rebejn näjza reni churu chu lo guedxliuj,  
chicbaani loj guiraa regunaa.

<sup>49</sup> Sa'csi Gueb Dios ni rajp guiraa yälrnibee abejn xhidajl  
cosro loä,  
dxanduxh najc lajni.

<sup>50</sup> Dini cuääz gulaslajzni guiraa rebejn ni riu xtiidxni, reni rajnni.

<sup>51</sup> Xhidajl cosnagajn abejnni con lagajc naani,  
abatie'chni renani rustioob lastooreni rliä'p lagajc  
xpala'nreni.

<sup>52</sup> Abasajbni reni rnibee,  
per rebennadolajz bejnni gacreni benro.

<sup>53</sup> Bachajni xque' reni calaan,

badeedni ganax cossa'c,  
niluxh badzu'ni rebejn ni yu' xhixtenreni xhet badeed  
dini lojreni.

<sup>54</sup> Gucnäjni nación xten xpejn Israel, ni najc xmos Dios.

Di lajzni niäl nulaslajznireni

<sup>55</sup> sa'csi si'c bia'nni diidx con retoxtadgoldoonu,  
sinuu gulazlajzni toAbram näjza rexagdooni par tejpas.

<sup>56</sup> Dxejc bia'n Marii roliz Elisabe't si'cti choñ bäii, dxejc  
gubisacni rolizni.

### *Che gojl Juan ni rutiobnis*

<sup>57</sup> Che baza' xpäi Elisabe't, dxejc gojl xpäzni te báz  
niguiini. <sup>58</sup> Dxejc bidzujñ rexpisijnäni näjza resa'ni biäd-  
huiireni guiro'preni che gucbeereni lacti hueen gujc Dios  
con laani. Bibalaznäjrenini. <sup>59</sup> Che gudejd xhujñ dxej,  
huinäreni bäze'ga chuni bee. Rlajz rebejn nirilaj bäze'ga  
si'c laa xtadni, Zacaríi. <sup>60</sup> Niluxh xnanni räjp:

—Na'c, guirilajpacni Juan.

<sup>61</sup> —¿Xhicient? —räjpreni—. Ruti xfamilu ni laa si'c.

<sup>62</sup> Dxejcti gunabdiidxreni con seen lo xtad bäze'ga  
te gacbeereni xho rlajzni guirilaj bäze'ga. <sup>63</sup> Xtadni  
gunab te la' guijtz, dxejc bacuaani: “Lajni najc Juan.”  
Dxejc guiraareni bidxelojreni. <sup>64</sup> Luxh lagajc dxejc gujc  
gunii Zacaríi stehuält, dxejc guslojni calä'pni xpala'n  
Dios. <sup>65</sup> Bidxeloduxh rexpisijnreni xhini'c gujc ro'c. Luxh  
bire'ch diidx xcuent recosre guideb neñ redajn xten  
Judea. <sup>66</sup> Guiraa reni biejn diajg rediidxga gusloj cayujn-  
reni xhigab, dxejc gunabdiidxreni loj sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

### *Dij ni bil Zacaríi*

<sup>67</sup> Dxejcti biääd Sprit Dxañ xten Dios neñ lastoo xtadni  
Zacaríi, gusloj caniini rediidx ni badeed Dios lojni, räjpni:

<sup>68</sup> Guiliä'pnu xpala'n Dios, Xtios rexpejn̄ Israel, sa'csi abiädhuini loonu, ni najcnu rexpejn̄ni, te siädguslaani nuurnu nen̄ dojl̄.

<sup>69</sup> Abaxhałni loonu te bejn̄ ni rajp yäl̄rusladuxh bejn̄ nen̄ dojl̄.

Najcni te rexagdoo toxmosni David.

<sup>70</sup> Lagajc si'cni badeed Dios gunii redade' ni bacuaa xti-idxn̄i lo guijtz galoo:

<sup>71</sup> Suslaani nuurnu loj reni rdxe'ch loonu, näjza ladznaa rebejn̄ ni gulälaz nurnu.

<sup>72</sup> Te gulaslajzni retoxtadgoldoonu, te soob diidx ni bia'n̄ni con rebejn̄ga.

<sup>73</sup> Scree bia'n̄ni diidx con toxtadgoldoonu, Abram:

<sup>74</sup> Suslaani nuurnu ladznaa rebejn̄ ni rdxe'ch loonu, te na'c guidxeebnu chunu lojni gusoobnu xtiidxni,

<sup>75</sup> con yäl̄nabansa'c näjza yäl̄guxhtis guiraa redxej ni guibaj̄nnu.

<sup>76</sup> Luxh luj, baze', sirilajlu dade' nani rnii xtidx Gueb Dios ni yu' xhaguibaa,

sa'csi sinijdlu lo Dad te gusucheelu rexnezyulajzni,

<sup>77</sup> te gunlu gacbee rexpejn̄ni xho gac laani lo dojl̄, te gac guibicaj xtoj̄lreni.

<sup>78</sup> Sa'csi Dios sanälajz bejn̄,

näjza rulaslajzni bejn̄ ni'cni xhaguibaali suxhałni xi'n̄ni te jiädñani te dxecoob,

<sup>79</sup> te gusanijni lo rebejn̄ ni nabajn̄ lo yäl̄xcäy xten dojl̄,

näjza rebejn̄ ni nabajn̄ lo xpalaa yäl̄gujt,

te guluiini xho sánu lo xnez yäl̄rbecdxilajz.

<sup>80</sup> Dxejc gunís biuxe'ga, guyuduxh xcäriejn̄ni xcuent recos xten Dios. Gubaj̄nni nez loj reyubijdz cheni bidzuj̄ni dxej che baluilojni loj rexpejn̄ Israel, che gusloj cagusule'ni xtidx Dios.

## 2

*Che gojl Jesús**(Mt. 1:18-25)*

<sup>1</sup> Neñ redxejga, gunibee Augusto César xcaj laj rebejn guideb guedxliuj lo xquijtzni. <sup>2</sup> Ni'c nacobguc yälbigabre cheni najc Cirenio gobernador xten Siria. <sup>3</sup> Guiraa rebejn nanab chääreni lagajc lajdxreni te ro'c guigabreni. <sup>4</sup> Ni'cni birii José guedx Nazare't Galilee, te huijni Judea, lo guedx Belén, cadro gojl toDavid, sa'csi najc José xagdoe toDavid. <sup>5</sup> Huinäni Marii, nani guchnaani, huijreni guedx Belén te ro'c guigabreni. Luxh nuu Marii báz. <sup>6</sup> Lalsi yu'reni guedx Belén, bidzujñ dxej ni gaal xi'n Marii. <sup>7</sup> Ro'c gojl xi'n galooni, dxejc batejbnini te xzuudni. Dxejc gudixhnini cadro rusälreni guijsx rajw reguidxaa sa'csi xhetiru yu' xcalaareni jia'nreni.

*Rexangl Dios näjza rebaxtoor*

<sup>8</sup> Gajxh guejdxga guyu' gaii baxtoor cayajpreni xhiilreni lo niaa guxhijñ. <sup>9</sup> Chela baluiloj te xangl Dios, luxh bianij guideb gabireni con yälrdimbicha' xten Dios, dxejc bidxebduxhrene. <sup>10</sup> Sas anglga räjp lojreni:

—Na'c guidxejbtu, narä siädnää lojtu te didxsa'c ni suspalajz guiraa beñ guedxliuj. <sup>11</sup> Nadxej gojl neñ guejdx xten toDavid, tej ni guslaa beñ neñ dojl, laani najc Crist ni najc Dad. <sup>12</sup> Dee najc te seen lojtu, sidxäلتu baze'ga nadejbni neñ te xzuudni, naga'ni cadro rusälreni guijsx rajw reguidxaa.

<sup>13</sup> Lagajc dxejc guideb gabi anglga baluiloj naclejñ xangl Dios, gulä'preni xpala'n Dios, räjpreni:

<sup>14</sup> Collä'p xpala'n Dios ni yu' xhaguibaali.

Suchu yälrbecdxilajz lo reben guedxliuj ni balazlajzni.

<sup>15</sup> Che gubi' rexangl Dios xhaguibaa, gusloj rebaxtoor canii loj sa'reni:

—Colcho' guedx Belén colchohuii ni guzajc ro'c ni gunii Xtadnu Dios loonu.

<sup>16</sup> Rusquenduxhreni sääreni, dxejc bidxälreni Marii näjza José näjza bäze' ni naga' neñ cadre rusälreni guijxh rajw reguidxaa. <sup>17</sup> Cheni bahuiireni loj rebejnğa, bijreni diidx xhi räjp rexangl Dios lojreni xcuent bäze'ga. <sup>18</sup> Niluxh guiraa reni biejn diajg rediidxre bidxeloduxhreni xtidx rebaxtoorga. <sup>19</sup> Niluxh Marii gulucheeni guiraa rediidx ni biejn diajgni neñ lastooni, rujntisni xhigab xcuent rediidxga. <sup>20</sup> Dxejcti rebaxtoorga gubisacreni cayolreni, calä'pzareni xpala'n Dios xcuent guiraa rediidx ni biejn diajgreni näjza ni bahuiireni sa'csi guiraani gujc si'cni räjpreni lojreni.

*Cheni huinäreni Jesús chuni bee*

<sup>21</sup> Che gudejd xhujñ dxej, huinäreni bäze'ga chuni bee, dxejc gulälajrenini Jesús, lagajc laj ni räjp xangl Dios loj Marii guirilajni galooli guuni bázga.

<sup>22</sup> Che basa' redxej ni gac naya te nan si'cni gunibee toMoisés loj xquijtzni, huinäreni bäze'ga guedx Jerusalén, neñ guidoro gunabreni gacnäj Diosni par tejpas. <sup>23</sup> Bejnreni scree sa'csi caj lo guijtz xten Dios: “Guiraa rexingangaloo xten bejn guilia'tu lo sa'reni te gunreni xtzunä”, räjp Dios. <sup>24</sup> Bidzujñreni ro'c ca'reni te gojn si'cni rnibee rexquijtz Dios: “Tio'p gogue' o tio'p palombáz.”

<sup>25</sup> Neñ redxejga, neñ guedx Jerusalén rbäjz te dade' ni laa Simeón. Najcni te bensacduxh, randuxhni Dios, cabäjzni jiäd te bejn ni gusläa rexpejn Israel. Rbäjz Sprit Dxan xten Dios neñ lastoo Simeón. <sup>26</sup> Sprit Dxan abejn gacbeeni dini guet ansde fiini loj Crist ni guxhał Dios. <sup>27</sup> Dxejcti räjp Sprit Dxan xten Dios lojni chääni guidoro. Lałni yu'ni neñ guidoo, bidzujñ José con Marii, biädnäreni báz Jesús, te gunnäjreni Jesús nani rnibee xtidx Dios



gunreni. <sup>28</sup> Dxejc gudääz Simeón bäze'ga, gusloj calä'pni xpala'n Dios, räjpni:

<sup>29</sup> Dad, asajc gusaanlu guetä con yälrbedxilajz,

sa'csi abasooblu nani bia'n diidx gunnäjl̥u xmoslu.

<sup>30</sup> Sa'csi abahuiloä nani siädguslaa nuurnu neṅ dojl̥,

<sup>31</sup> ni abasujlu nez loj guiraa rebeṅ guedxliuj.

<sup>32</sup> Laani najc bianij ni susanij loj rebeṅ ni di gac xpeṅ Israel,

näjza nani gac xpala'n rexpeṅlu guedx Israel, lajdxlu.

<sup>33</sup> Bidxeloj José näjza xnan Jesús rediidx ni canii Simeón xcuent bäze'ga. <sup>34</sup> Dxejc benle' Simeón yejcreni, dxejc räjpni lo Marii xnan Jesús:

—Bahuii gan; bäze're biääd te loj rexpeṅ Israel chu reni sibälaz xtiidxni, te chuza reni sililajz xtiidxni. Laani gacni te seen nani sibälaz beṅ, <sup>35</sup> te si'c jienloj xhi xhigab rujn cade tej rexpeṅ Israel neṅ lastooreni. Dxejcti par luj sajcn̥i asdoo chääz te spaad lastoolu, sa'csi gac-huinuxh lastoolu.

<sup>36</sup> Suga'za te nane' ni laa Ana ro'c, rniini xtidx Dios xcuent recos ni churu gac. Najcni xindxa'p Fanuel, ni najc famiṅ xten Aser. Anajcni beṅgolduxh. Bachṅaani che najcni dxaphuin, luxh gajdz̥tis ijz guläznäjn̥i chääl̥ni che bia'nni biuud. <sup>37</sup> Najcni te gunabiuud ni yu' tajbitajp ijz. Diruni guirii guidoro, ro'ctis yu'ni dxej, yääl te yu'tisni lo Dios con yälrucua'n näjza yälrbedx-rniab lo Dios. <sup>38</sup> Che gubigni lojreni lagajc dxejc, badeedni xquixtios lo Dios sa'csi abidzuj̥n tej ni guslaa rebeṅ lo dojl̥. Dxejc gusloj caniini diidx xcuent báz Jesús loj guiraa renani cabäjz yälruslaa xten Jerusalén.

*Che gubi'reni guedx Nazare't*

<sup>39</sup> Che gulujx bejn xcuzajnni guiraa recos ni caj lo xquijtz Dios gunreni, gubisacreni Galilee, lo guedx Nazare't, lajdxreni. <sup>40</sup> Gunís biuxe'ga, guc nadaanni, guc nasiñruzani sa'csi cayacnäj Diosni.

### *Che biu' Jesús guidoro*

<sup>41</sup> Casob ijz rij rexuczajn Jesús guedx Jerusalén te rinäreni te gojn xten lanij pascw. <sup>42</sup> Che basa' Jesús tzubitio'p ijz, huij guiraareni guedx Jerusalén si'c najc costumbr gac lanijga. <sup>43</sup> Che gulujx lanijga, gubisacreni. Bia'n Jesús guedx Jerusalén, luxh nicla xnanni niclaza José direni niacbee bia'nni. <sup>44</sup> Bejnreni xhigab pet siädsanäjni rebeñsa'ni. Si'c guzajreni tebdxej, dxejc gudiilrenini loj resa'reni, näjza loj reni rumbeereni, <sup>45</sup> direni nidxälni. Dxejc gubisacreni guedx Jerusalén te huitiilrenini ro'c.

<sup>46</sup> Choñ dxej gudiilrenini dxejc bidxälrenini neñ guidoro, sobga'ni nez galäii rebejn ni najn leii, cacuadiajgni xtiidxreni, cayujnzani yälgunabdiidx lojreni. <sup>47</sup> Luxh guiraareni cacuadiajg xtiidxni, cadxeloduxhreni yälñajn xtenni, näjza rediidx ni cagudzu'ni lojreni. <sup>48</sup> Che bahuii rexuczajnni lojni, bidxelojreni. Dxejc räjp xnanni lojni:

—Xi'nä, ¿xhicuent bennäjlu nuurnu scree? Narä näjza xtadlu cayunduxhnu xhigab caguuilnu luj nezree, nezre'c.

<sup>49</sup> Dxejcti räjp Jesús lojreni:

—¿Xhicuent caguuiltu narä? ¿La ditu gan riäjñ gunä xtzun Xtäädä, ä?

<sup>50</sup> Luxh laareni direni niacbee rediidx ni guniini lojreni.

<sup>51</sup> Dxejcti gubinäjnirenini guedx Nazare't, sanuuni ru-soobni xtiidxreni. Luxh Marii gulucheetisni guiraa recosre neñ lastooni. <sup>52</sup> Duurtis gunís Jesús, caroobruza xcälñajnni. Sanälajz Diosni, sanälajzza guiraa rebejnñi.

## 3

*Yälrusule' Juan ni rutiobnis**(Mt. 3:1-12; Mr. 1:1-8; Jn. 1:19-28)*

<sup>1</sup> Neñ redxey cheni agujc tzuun ijz najc Tiberio César reii, Poncio Pila't najc gobernadoor xten Judea; Herodes najc gobernadoor xten Galilee; Felipe, bejtz Herodes najc gobernadoor xten Iturea najza Traconite; Lisancias najc gobernadoor xten Abilinia. <sup>2</sup> Lagajc neñ redxejga Anás najza Caifás najc rebixhojzro xten guidoro guedx Jerusalén. Neñ redxejga biääd xtidx Dios lo Juan, xi'n Zacaríi cheni rbäjzni nez lo reyubijdz. <sup>3</sup> Ni'c cuanzaj Juan guideb nez reyuj xten gueu Jordán, ro'c basule'ni xcuent yälrusiechlajz, yälrobnis ni nanab gunreni te gudzucaj Dios xtojłreni. <sup>4</sup> Si'cni caj lo xquijtz Isafás, dade' ni gunii xtidx Dios, cadre räjpni:

Riejn xse' te ni rbedxa' nez loj reyubijdz:

“Colyunsa'c xnezyuj Dad, colslíi rexnezyulajzni.”

<sup>5</sup> Guiraa cadre sojb gueed sidxe'ni,

guiraa relom sibicajreni,

guiraa renezyuj ni xhet naliidi, siliireni,

guiraa renezyudxuudx, sacsa'creni.

<sup>6</sup> Dxejcti guiralií bejn suhúii loj nani guxhał Dios.

<sup>7</sup> Che bahúii Juan siääd xhidalduxh bejn te guirobnisreni, räjpni lojreni:

—ıLa'tu benguijdx ni najc si'c bälñialajz! ¿Chuni'c balijdxtu guxuntu loj xcälrdxe'ch Dios ni siädgajxh, ä?

<sup>8</sup> Colguchaa xmoodtu te si'c fii bejn guliini abasiechla-jztu. Na'c cuentis rniitu lagajc neñ lastootu “Abram najc xtadnu”, sa'csi narä rniä lojtu, sajz xca' Dios reguijre te con laareni guncheeni bejn gac rexagdoo toAbram.

<sup>9</sup> Aguiyayjg naga' cuä' xlobaa reyajg; ni'cni guiraa reyajg nani di ninexhsa'c xcaj lojni, sidinreni te checreni.

<sup>10</sup> Dxejcti gunabdiidx rebejn lojni, räjpreni:

—¿Xhini'c nanab jiennu?

<sup>11</sup> Dxejc badzu' Juan diidxre räjpni:

—Ni rajp tio'p xhajn, sugudeedni tejni lo bejn ni xhet rajpdi. Sigajcza gun reni rajp xhi gaureni, quisrenini loj ni xheti xhi gauni.

<sup>12</sup> Näjza gaii bejn nani rusquijx xcuent reimpuet bidzujn lojni te guirobnisreni, dxejc gunabdiidxreni lo Juan räjpreni:

—Dad, mastr, ¿xhini'c nanab jiennu?

<sup>13</sup> Räjp Juan lojreni:

—Na'c gusquijxtu bejn maazdi ni nungäj]l quiixreni.

<sup>14</sup> Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejc räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guniidxreni meel lojtu; colbal-aznäj nani rujntu gaan.

<sup>15</sup> Cadxeloj rebejn, cayujnreni xhigabduxh, naareni, “pet Juan najc Crist ni jiääd.” <sup>16</sup> Dxejc badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siääd tej ni sajrcu loä, nani nicla gac surloä, cuää xcura'chni. Laani sutiobnisni con Sprit Dxan xten Dios te cuääzni neñ lastootu näjza con guiboo, sa'csi rajpruni yälrnibee loä.

<sup>17</sup> Aca'ni pal te gusiani triuu te cuääni triusa'c lo guijxh te cucheeni triuu neñ ngodx xtenni, dxejcti reguixhtriuuga suze'cnini lo bajl ni rejc par tejpas.

<sup>18</sup> Rediidxre näjza xhidajl yäl'rulijdx gunii Juan te basule'ni redidxcoob loj rebejn. <sup>19</sup> Näjza lo Herodes ni najc gobernadoor basule' Juan diidx, gudilnäjnini sa'csi xhet laadi cayujnni, sa'csi rbäznäjni Herodías, chääl bejtzni Felipe, näjza xcuent sgaii dojl ni bejnini. <sup>20</sup> Di Herodes

niu xtidx Juan, alga bejn̄ni stee doj̄l, basäl̄ni Juan nen̄ latzguiib.

*Che gurobnis Jesús*

(Mt. 3:13-17; Mr. 1:9-11)

<sup>21</sup> Che batiobnis Juan rebejn̄, näjza Jesús birobnis. Cheni cabedx-canabni lo Dios, bixal xhaguibaa, <sup>22</sup> dxejc biäjt Sprit Dxañ xten Dios si'c te palom̄, bidzuj̄ni cadro suga' Jesús. Dxejc xhaguibaali biejn̄ xse' te ni räjp:

—Luj, najclu xi'nä ni sanälazä. Rbanälazduxhä luj.

*Resa' Jesús*

(Mt. 1:1-17)

<sup>23</sup> Yu' Jesús gal̄bitzuu ijz che gusloj cayuj̄ni dzuun ni badeed Dios gunni. Rchalo rebejn̄ najcni xi'n José, xi'n Elí. <sup>24</sup> Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José. <sup>25</sup> José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai. <sup>26</sup> Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá. <sup>27</sup> Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri. <sup>28</sup> Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er. <sup>29</sup> Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat. <sup>30</sup> Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim. <sup>31</sup> Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán. <sup>32</sup> Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón. <sup>33</sup> Naasón gujc xi'n Aminadab.

Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá. <sup>34</sup>Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor. <sup>35</sup>Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala. <sup>36</sup>Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec. <sup>37</sup>Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán. <sup>38</sup>Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

## 4

*Che biricaj beṇdxab loj Jesús*

*(Mt. 4:1-11; Mr. 1:12-13)*

<sup>1</sup>Jesús, sa'csi rbäjz Sprit Dxi'xan xten Dios lastooni, biunejz ni gueu Jordán, dxejc huiñá Sprit Dxi'xan xten Diosni lo reyubijdz. <sup>2</sup>Ro'c bia'nni tiuu gubijdx, tiuu guxhijñ. Ro'c bidzujñ beṇdxab ni rnibee te rlajz ni gunni gusoob Jesús xtiidxni. Luxh calaan Jesús, sa'csi gajdni gau guiraa neñ redxejga. <sup>3</sup>Dxejc räjp beṇdxab lojni:

—Palga guliilu Xi'n Dioslu, gunibee gac reguijre yätxtiil.

<sup>4</sup>Badzu' Jesús diidx lojni räjpni:

—Acaj loj reguijtz xcuent Dios: “Xhet ganaxdi yätxtiil gun sajc guibajñ bejñ, näjza guiraa diidx nani rnii Dios sujñ guibajñ bejñ.”

<sup>5</sup>Dxejcti huiñá beṇdxab Jesús jiaa yejc te dajn. Ter-atbäztis baluilojni guiraa reguedxro ni tre' lo guedxliuj.

<sup>6</sup>Dxejc räjp beṇdxab lojni:

—Narä sunidxä guiraa yälrnibee näjza reyäl\_nasa'c ni yu' loj reguejdxga sa'csi xtenä guiraareni, luxh sajc gud-edäni lo chutis ni rlazä. <sup>7</sup> Palga luj suzuxhijblu loä, guiliä'plu xpala'nä, guiraani sajc xtenlu.

<sup>8</sup> Dxejc Jesús badzu' diidx, räjpni lojni:

—Acaj loj xquijtz Dios: “Dad Xtioostislu ganlu, luxh lojtisni chulu gunlu dzuun.”

<sup>9</sup> Dxejcti huinä beṇdxabni lo guedx Jerusalén, huinäniini jiaa yejc xques guidoro. Dxejc räjp beṇdxab lojni:

—Palga guliilu najclu Xi'n Dios, gutiäjs lo yuj <sup>10</sup> sa'csi si'c caj loj rexquijtz Dios:

Suxhaḷ Dios rexanglṇi te ga'preni luj,

<sup>11</sup> guiniaazreni luj didi jiajblu lo guij.

<sup>12</sup> Badzu' Jesús diidx lojni, räjpni:

—Cajza lo rexquijtz Dios: “Na'c faḷlu Dad ni najc Xtioozlu.”

<sup>13</sup> Che baluux beṇdxab rextiidxni, gubicajni lo Jesús sa'csi dini niujn gaan nusoob Jesús xtiidxni. Guläjzni guidzujṇ stee dxej te gusacsíruni Jesús.

*Gusloj Jesús cayujn xtzuunni*

*(Mt. 4:12-17; Mr. 1:14-15)*

<sup>14</sup> Dxejc gubi' Jesús lo rexyuj Galilee räjpni yälrnibee xten Sprit Dxaṇ. Bire'ch diidx xcuentni guiraa neṇ reguejdx ni tre' nejzga. <sup>15</sup> Ruluiini neṇ reguidobäz luxh guiraa rebejṇ rliä'p xpala'nni.

*Jesús guyu' guedx Nazare't*

*(Mt. 13:53-58; Mr. 6:1-6)*

<sup>16</sup> Dxejcti huij Jesús guedx Nazare't cadro gulaani. Che gojl dxej ni rusilajz rexpejṇ Israel, biu'ni neṇ guidobäz sigajc ni rujnpacni, dxejc huisuliini te biḷni <sup>17</sup> reguijtz

xten Dios. Badeedreni lojni guijt<sub>z</sub> ni bacuaa Isaías; cheni baxhalni guijt<sub>z</sub>ga, bidxälni cadro rni scree:

<sup>18</sup> Sprit Dxan xten Dios suganäj narä, sa'csi agule Dios narä te gusule'ä xtid<sub>x</sub>coobni lo reben<sub>u</sub>proof.

Baxhal<sub>u</sub>ni narä te gusiäcä lastoo renani di lastooreni cuedxi, te gusule'ä yäl<sub>r</sub>rus<sub>l</sub>aa lo rebejn<sub>u</sub> ni yu' lo dojl, te gusiäcä baloj reben<sub>u</sub> lotiä'p, te gus<sub>l</sub>ää reben<sub>u</sub> ni cadejd trabajw,

<sup>19</sup> te gusule'ä abiu' ijzsa'c che rulasajz Dios rebejn<sub>u</sub>.

<sup>20</sup> Dxejc basäu Jesús reguijt<sub>z</sub>ga, badeednini loj bejn<sub>u</sub> ni cayacnäjä nen<sub>u</sub> guidooga, dxejc gurejni. Sa'csi guiraa rebejn<sub>u</sub> ni sobga' nen<sub>u</sub> guidooga cahuidzu'tzreni lojni, <sup>21</sup> gusloj guniini, räjpni lojreni:

—Lagajc nadxej guzobj rediidx ni caj lo reguijt<sub>z</sub>re nez loj guiraatu.

<sup>22</sup> Guiraareni sarú guniireni xcuent Jesús, bedxelo-duxhzareni redidxsaruduxh ni guniini lojreni. Gunabdidxreni loj sa'reni, räjpreni:

—¿La et xi'ndi José dade're, ä?

<sup>23</sup> Dxejc räjp Jesús lojreni:

—Siniipactu rediidxre loä: “Docto<sub>o</sub>r, basiajc lagajc luj”; siniizatu loä: “Recos ni biejn diajgnu bejnlu nez guedx Capernaum, lagajc recosga bejn nez ree cadro najc lajdxlu.”

<sup>24</sup> Dxejc huinuu xtiidxni, räjpni lojreni:

—Rniliápac lojtu, nicla tej redade' ni rni xtid<sub>x</sub> Dios, di reben<sub>u</sub> lajdxreni jiu xtiidxni. <sup>25</sup> Luxh rniliä lojtu, che gubaj<sub>u</sub> Elías lo guedxliuj, guyu' xhidajl gunabiuud guedx Israel che di nisguij niajb chon<sub>u</sub> ijz garol, dxejc guyu' yäl<sub>r</sub>lianduxh guideb guejdxga. <sup>26</sup> Luxh di Dios nuxhal Elías roliz nicla tej regunabiuud ni guläjz guedx Israel,



alga baxhaġnini lo be<sub>n</sub>zajt, rolijz te gunabiuud ni rbäjz Sarepta, gajxh guedx Sidón. <sup>27</sup> Sigajcza che gubaj<sub>n</sub> Eliseo lo guedxliuj, guyu' xhidajl be<sub>n</sub> racxhuu ni raġ tiejxhreni guedx Israel, luxh dini nusiajc nicla tejreni, alga basiajčni dade' ni laa Naamán, ni siääd te guedxzajt ni laa Siria.

<sup>28</sup> Che biejn diajg reni sobga' ne<sub>n</sub> guidoo rextidx Jesús, bidxechduxhreni, <sup>29</sup> huisuliireni, guläärenini ne<sub>n</sub> guejdxga. Dxejc huinärenini yejc dajn cadro tre' guejdxga cadro yu' te balaro, te ro'c rlanjreni nustejbrenini. <sup>30</sup> Dxejc Jesús sigaj gudejdni galäiireni, sä'tini ste'ca lajt.

*Gulää Jesús be<sub>n</sub>dxab lastoo te dade'*

*(Mr. 1:21-28)*

<sup>31</sup> Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebej<sub>n</sub> che gojl dxej ni rusilajz rexpej<sub>n</sub> Israel. <sup>32</sup> Bidxeloduxhreni xtiidxni sa'csi rusule'ni si'c te be<sub>n</sub>najn, si'c te ni rnibee.

<sup>33</sup> Ne<sub>n</sub> guidooga suga' te dade' ni rbäjz te be<sub>n</sub>dxab ne<sub>n</sub> lastooni. Guredxa'ni <sup>34</sup> räjpni:

—¡Aii! ¡Basaan nurnu! ¿Xhicuent riädchu'lu loonu Jesús ni siääd Nasare't? ¿La siäädlu te gunitlojlu nuurnu, ä? Narä numbeälu, nanä najclu Xin Dxañ Dios.

<sup>35</sup> Gudidxa' Jesús lo be<sub>n</sub>dxabga, räjpni lojni:

—Basäu ro'lu, birii lastoo niguiire.

Dxejcti be<sub>n</sub>dxabre basäl niguiiga lo yuj nez loj guiraareni, dxejc biriini ne<sub>n</sub> lastoo dade'ga, per xhet bejndini dade'ga. <sup>36</sup> Bidxeloduxh rebej<sub>n</sub>ga, dxejc gusloj caniiireni lo sa'reni, räjpreni:

—¿Xhi diidx najc redee? Bahuii xho rnibee dade're re-be<sub>n</sub>dxab con yälrnibee, luxh rusoob rebe<sub>n</sub>dxab xtiidxni, riireni lastoo bej<sub>n</sub>.

<sup>37</sup> Dxejc gusääb xtidx Jesús lo guiraa reguejdx ni tre' guideb gabi guejdxga.

*Rusiajc Jesús xnan xueerg Pedr**(Mt. 8:14-15; Mr. 1:29-31)*

<sup>38</sup> Birii Jesús guidobáz, huijni roliz Simón. Dxejc naga' xnan sueerg Simón, cayacxhuuni, yu'ni xliaduxh. Sas gunabduxhrenei lojni te gusiajcnini. <sup>39</sup> Gubig Jesús loj nane'ga, gudidxa'ni xliaaga, luxh lagajc orga biriini xliaa. Dxejc huistiegajcni, gusloj cayujnni mandaad, cahuiinireni.

*Rusiajc Jesús xhidajl yälracxhuu**(Mt. 8:16-17; Mr. 1:32-34)*

<sup>40</sup> Lał ni cayääz gubijdx, guiraa reni rajp benracxhuu ni rajc garen garen yälracxhuu biädnärenei rebejnğa lo Jesús. Dxejc laani batzuubni naani yejc teygareni, dxejc białc rebenracxhuuga. <sup>41</sup> Loj rebenracxhuuga, yu'reni birii rebendxab neñ lastooreni, rbedxa'reni räjpreni:

—Luj najclu Xi'n Dios.

Luxh Jesús gudiñäjni rebendxab, dini nusaa niniireni sa'csi laareni najnreni najcni Crist ni cabäjzreni.

*Rusule' Jesús xtidx Dios**(Mr. 1:35-39)*

<sup>42</sup> Che bianij, biriini lo guejdx, huijni te lajt cadro rut rbäjzdi. Niluxh gudiil rebejnni, dxejc bidzujnreni cadro suga'ni. Rlajzreni nuscuääzrenini te di nuini. <sup>43</sup> Dxejc Jesús räjp lojreni:

—Nanab cha'a chasule'ä rextidx xcuent xcälrnibee Dios xhidajlruza guejdx, ni'cni baxhalpac Dios narä.

<sup>44</sup> Dxejc si'ctis cuanzaj Jesús basule'ni xtidx Dios neñ guiraa reguidobáz neñ reguejdx xten Galilee.

**5***Che gunaazreni xhidajl bäjł**(Mt. 4:18-22; Mr. 1:16-20)*

<sup>1</sup> Cheni suga' Jesús ro' nis ni laa Genesare't, gubig xhidajl bejn lojni te jiejn diajgreni xtidx Dios. <sup>2</sup> Dxejc bahuii Jesús tio'p barcw ni suga' ro' nisga, rud yu'di nenreni sa'csi rebejn ni rniaaz bājł abiriireni nen rebarcw te caguiibreni xquijxhreni ro' nisga. <sup>3</sup> Dxejc biu' Jesús nen te barcw ni najc xten Simón, dxejc gunab Jesús cháä barcwga lo nis te la', te guibicajni ro' yuj. Dxejc gurej Jesús nen barcwga, ro'cli guslojni caguluiini rebejn. <sup>4</sup> Che gulujx xtiidxni, räjpni loj Simón:

—Huinä barcw cadro jiättru, colcuaa xquijxhtu lo nis te guiniaaztu bājł.

<sup>5</sup> Räjp Simón lojni:

—Mastr, guideb yääl biennu dzuun, luxh dinu niniaaz nicla tej bājł, niluxh naj agunibeelu gusälsacnu guijxh lo nis.

<sup>6</sup> Cheni basälreni xquijxhreni lo nis, gunaazreni xhidalduxh bājł, dxejc guslojli caräjs xquijxhreni. <sup>7</sup> Dxejc bejnreni seen loj resa'reni ni yu' nen stee barcwga te jiädycnäjreni. Bidzujntireni, bachajreni guiro'p barcw. Gudxaduxh rebarcw, ameer niääzreni nen nis. <sup>8</sup> Che bahuii Simón Pedr recosre, bazuxhijbni nez loj Jesús, dxejc räjpni:

—Gubicaj loä Dad, sa'csi narä nacä te benđojł.

<sup>9</sup> Si'c gunii Simón sa'csi bidxejb laani näjza guiraa rebejn ni yunäjni sa'csi gunaazreni xhidalduxh bājł. <sup>10</sup> Näjza Jacob näjza Juan, rexi'n Zebedeo, ni runnäj Simón dzuun, näjzaren bidxejbreni. Per Jesús räjp lo Simón:

—Na'c guidxejblu, najli guisloj cuedxlu bejn lacuaa ni guiniaazlu bājł.

<sup>11</sup> Dxejc, che bidzunnäjreni rebarcw ro' nis, basa'nreni guiraa xhixtenreni, te sanajlreni Jesús.

*Basiajc Jesús te bejn ni ral tiejxhni  
(Mt. 8:1-4; Mr. 1:40-45)*

<sup>12</sup> Cheni guyu' Jesús tej reguejdx, bidzujñ te bejñ lojni ni rajc lepra te yälguidxduxh ni raļ tiejxhni. Che bahuiini loj Jesús, bazuxhijbni, basajbni lojni lo yuj, räjpni lojni:

—Dad, palga rļajzlu, sajc gusiajclu narä.

<sup>13</sup> Dxejc batzuub Jesús ñaani yejcni räjpni lojni:

—Rlazä jiajclu. Susiacälu.

Che guniini rediidxre, biacgajc beñ racxhuuga.

<sup>14</sup> Dxejcti gunibee Jesús lojni rut lojdi gäbni xhi guzajcni. Räjpni lojni:

—Huijtis lo bixhojz te fiini lojlu, huisa'nza gojn xcuent ni biajclu si'cni rnibee xleii Moisés, te filoj rebejñ abiajclu.

<sup>15</sup> Luxh xpala'n Jesús sanuutis cayä'pruni, guixe-guixee care'ch diidx xcuentni. Rdojpza xhidalduxh bejñ te gucuadiajgreni xtidx Jesús näjza te gusiajcnī yälracxhuu xtenreni. <sup>16</sup> Yu'za huält riunejz Jesús rijni relajt cadro ruti rebejñ, te ro'c rbedx-rniabni lo Xtadni Dios.

*Basiajc Jesús te bejñ ni digacdi guiniib*

*(Mt. 9:1-8; Mr. 2:1-12)*

<sup>17</sup> Te dxej laļni caguluiini rebejñ, nejzga sobga' gaii farisee näjza gaii bejñ ni ruluii leii garen-garen reguejdx, siädreni guideb nez reguejdx xten Galilee, näjza región Judea, näjza guedx Jerusalén. Dxejc huenliisi rluiloj suganäj xcälrnibee Dios Jesús te rajc russiajcnī rebenracxhuu. <sup>18</sup> Dxejc bidzujñ gaii dade' nuureni lo te lonbäz te bejñ ni di gacdi guiniib, rļajzreni gusiu'renini neñ yu' te quixhrenini nez loj Jesús. <sup>19</sup> Niluxh direni nidxäl canejz niu'reni sa'csi nadäduhx ro'c sa'csi tre' xhidajl rebejñ. Dxejc huäpnäjrenini yejc yu'ga, badzucajreni gaii tej, dxejc basajbreni xloon benracxhuuga yejcli yu'ga te gujc bidzujñni nez loj Jesús. <sup>20</sup> Che bahuii Jesús yälrililajz xtenreni, räjpni loj benracxhuuga:

—Dade', agubicaj xtojļlu.

<sup>21</sup> Dxejc rebejn ni ruluii leii nájza refarisee gusloj cayujnreni xhigab, naareni: “¿Chucha niguiire ni caniyajni Dios con rextiidxni? Ruti te bejn ni sajc gudzucaj xtojł rebejn, Diostis rudzucaj dojl.”

<sup>22</sup> Dxejc guchee Jesús xhi xhigab cayujnreni, ni'c räjpni lojreni:

—¿Xhicuent rujntu xhigab si'c neñ lastootu?

<sup>23</sup> ¿Xhini'c najc guyasiru guiniini: “Agubicaj rextojłlu”, o guiniini: “Huistie, guzaj”, ä? <sup>24</sup> Mbaj naj, suluiä nez lojtu Xi'n Dios ni gujc Xi'n Niguii rajp yälrnibee, yälñadip lo guedxliujre te gudzucajni xtojł rebejn.

Dxejc räjpni lo bejnğa ni digacdi guiniib:

—Lojlu rniä, jhuistie, guläs xloonlu, huij rolizlu!

<sup>25</sup> Lagajc dxejc nez lojreni huistiegajc bejn ni digacdi guiniib, guläsni xloonna cadro naga'ni, dxejc siini rolizni, calä'pni xpala'n Dios.

<sup>26</sup> Guiraareni rdxeloduxhreni recosga, dxejc guslojreni calä'preni xpala'n Dios, rdxejblireni räjpreni:

—Abihuiinu cosro, cos ni guidxeloj bejn nadxej.

### *Rbejdx Jesús Leví*

*(Mt. 9:9-13; Mr. 2:13-17)*

<sup>27</sup> Che gudejd gulujx recosre, birii Jesús ro'c. Dxejc bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjp Jesús lojni:

—Gudanajl narä.

<sup>28</sup> Dxejc huisu Leví, basa'nni guiraa recosga, dxejc sanajlni Jesús.

<sup>29</sup> Dxejc bejn Leví te lanij rolizni par Jesús. Biääd xhidajl bejn ni rusquijx xcuent impuest nájza sgaii bejn; sobganäjnireni lo mex. <sup>30</sup> Dxejcti refarisee nájza rebejn

ni ruluii leii guslojreni cayeinäjreni rexpejn<sub>pac</sub> Jesús, räjpreni:

—¿Xhicuent raunäjtu, ränäjtu rebejn ni rusquijx impuest nájza rebendoj<sub>l</sub>, ä?

<sup>31</sup>Dxejc badzu' Jesús diidxre, räjpmi lojreni:

—Rebejn ni nadaan di guiquiin te doctoor, ganaxtis rebejn nani racxhuu rquiiinreni te doctoor. <sup>32</sup>Dina niädt-edxä rebensa'c, narä biädtedxä rebendoj<sub>l</sub> te gusiechla-jzreni.

*Gunabdiidxreni loj Jesús xcuent yälrucua'n*

*(Mt. 9:14-17; Mr. 2:18-22)*

<sup>33</sup>Dxejc gunabdiidx rebejn<sub>ga</sub> loj Jesús, räjpreni:

—¿Xhicuent lacti rucua'n rexpejn Juan nájza rexpen refarisee, lacti rbedx-rniabreni loj Dios; niluxh rexpejn-paclu alga rajwreni, rä'reni?

<sup>34</sup>Badzu' Jesús diidxre lojreni, räjpmi:

—¿La sajc gucua'n rebejn ni yu' lo te sa' la<sub>l</sub>ni yunäjreni bi'n, ä? <sup>35</sup>Niluxh sidzujn dxej cheni sibicaj bi'n lojreni, dxejc sii sucua'nreni.

<sup>36</sup>Guniiza Jesús cuentre lojreni, räjpmi:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxejc xhi-roobruni guiräjs, luxh diza ladcoob guchaag lo ladyujxh.

<sup>37</sup>Di gacdi gusal<sub>l</sub>ni bincoob nen te guidbiejw sa'csi bincoobga sutiäsyä'ni guidbiejwga dxejc sixe' binga, sixijnza guidbiejwga. <sup>38</sup>Ni'cni nanab gusal<sub>l</sub>ni bincoob nen guidcoob si'c sigucheeza guiro'preni. <sup>39</sup>Luxh nicla tej bejn ni agu' bin ni yu' agujc xchej rlanj yä bincoob, sa'csi säjbni: “Bin ni yu' agujc xchej najc huenru.”

## 6

*Rutie' rexpejn Jesús triuu dxej nani rusilajzreni*

*(Mt. 12:1-8; Mr. 2:23-28)*

<sup>1</sup> Te dxej ni rusilajz rexpejn Israel sasaj Jesús nájza rexpejn pacni nez loj reyuj cadre naga' triuu. Dxejc, sa'csi calaanreni gusloj caláádxreni doj lo triuu te cayajwrenini.  
<sup>2</sup> Dxejc gunabdiidx gaii refarisee ni najc beñguidoo, rájpreni lojreni:

—¿Xhicuent rujntu dzuun ni di nungäj] guntu che rajl dxej ni rusilajznu?

<sup>3</sup> Dxejc rájp Jesús lojreni:

—¿La gajdte gol] loj reguijtz xhi bejn toDavid cheni calannäjni rebejn nani sanäni, ä? <sup>4</sup> Biu'ni neñ xquidoo Dios, gudajwni yätxtiil nani di nungäj] gau bejn sa'csi xtebtis rebixhojz rajc rajwni, luxh badeedni yätxtiilga gudajw resa'ni.

<sup>5</sup> Rájpa Jesús lojreni:

—Sigajcza narä, Xi'n Dios ni gujc Niguui, rnibeä dxej ni rusilajznu.

*Niguui ni nabijdz ñaani*

*(Mt. 12:9-14; Mr. 3:1-6)*

<sup>6</sup> Che gojl stee dxej ni rusilajz rexpejn Israel, biu'ni neñ te guidobáz, dxejc guslojni caguluiini rebejn. Lagajc ro'c sobga' te dade' ni nabijdz ñaani ladbee. <sup>7</sup> Dxejc remastr xten leii nájza refarisee cagula'tzreni te don la susiajnci bejnga dxej ni rusilajzreni, sa'csi caguiilreni xho gucuaquijreni Jesús. <sup>8</sup> Niluxh laani najnni xhi xhigab cayujnreni, dxejc guniini lo dade' ni nabijdz ñaani, rájpni:

—¡Huisulii! ¡Gudaa nez galäiire!

Dxejc huisulii bejnga, gubigni lojni. <sup>9</sup> Dxejc rájp Jesús lojreni:

—Rlazä guiniabdixä lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguijdx? ¿La gacnäjnu bejn laa xcäl nabajnni o la gudzucajnu yäl nabajnni, ä?

<sup>10</sup> Che gulujx bahuii Jesús loj guiraa rebejn ni tre' guideb gabini, räjpni loj bejn ni nabijdz naani:

—;Baslii naalu!

Dxejc bejn ni si'c, luxh biacgajc naani. <sup>11</sup> Dxejc bidxechdixh rebejn ni tre' ro'c, gusloj canabdiidxreni lo sa'reni xhi gunnäjreni Jesús.

*Gule Jesús guitzubio'p rexpejn pacni*

*(Mt. 10:1-4; Mr. 3:13-19)*

<sup>12</sup> Neñ redxejga, huij Jesús loj te dajn te huininäjni Xtadni Dios. Ro'c gudejdni yääl cabedx-canabni lo Dios.

<sup>13</sup> Che bianij lo yuj, gurejdxni rexpejn ni. Ro'c guleni tzu-bitio'preni te gacreni xpejn pacni. Gulälajni reni reapost.

<sup>14</sup> Renani guleni najc Simón ni gulälajni Pedr; Andrés, bejtz Simón; Jacob; Juan; Felipe; Bartolomé; <sup>15</sup> Mateo; Tomás; Jacob xi'n Alfeo; Simón ni nagab loj rexpen cananista; <sup>16</sup> Judas, bejtz Jacob; näjza Judas Iscariote ni guto' Jesús loj rebixhojz.

*Rului Jesús xhidajl bejn*

*(Mt. 4:23-25)*

<sup>17</sup> Che biätnej Jesúsreni yejc dajnga, guzudxireni yejc te danbäz sa'csi suga' xhidajl bejn ro'c. Siädreni guiraa nez reguedx Judea, näjza guedx Jerusalén näjza reguejdx ni tre' gajxh nisdoo Tiro con Sidón. Rebejn ga bidzujnreni te gucuadijgreni xtidx Jesús, te gusiajczanireni xcälracxhuureni. <sup>18</sup> Guiraa ni rdejza trabajw yu' bendxab neñ lastooreni näjza reni'c biajc. <sup>19</sup> Guiraa rebejn rlanj caan Jesús, sa'csi rusiajcn guiraareni con xcälrnibeeni.

*Baliidx Jesús rebejn*

*(Mt. 5:1-12)*

<sup>20</sup> Dxejc bahuii Jesús loj rexpejn pacni räjpni lojreni:

—Chicbaatu, bejn nani xheti xhixtentu, sa'csi xtentu najc cadre rnibee Dios xhaguibaa.



<sup>21</sup> 'Chicbaatu, bejn nani calaan naj, sa'csi suniidx Dios lojtu nani rniabtu.

'Chicbaatu, bejn nani roon naj sa'csi susiäj| Dios lajztu dxejru suxhijztu.

<sup>22</sup> 'Chicbaatu, bejn nani rdxechlajz bejn lojtu, rbääreni la'tu te laad, rniyajreni la'tu, luxh rbälazreni lajtu si'c te cos guijdx sa'csi rililajztu xtidx Xi'n Dios ni gujc Niguii.  
<sup>23</sup> Colguibalajz nen redxejga, na'c gac-huin lastootu sa'csi sunidxdxh Dios xhi xtentu xhaguibaa. Sigajcza basacs| retoxtadgoldooreni rebejn nani gunii xtidx Dios galoo.

<sup>24</sup> 'Probe'zatu, la'tu benrajp, sa'csi agojptu xcäl-nasa'ctu, xcälrbalajztu lo guedxliujre.

<sup>25</sup> 'Probe'tu nani rajp guiraloj xhixtentu naj, sa'csi sidejdtu yälrliaan.

'Proobzatu ni ruxhijztu naj, sa'csi sonduxhtu sidejdtu yälhuinduxh, yälinalas.

<sup>26</sup> 'Probe'tu palga rliä'p rebejn xpala'ntu naj, sa'csi si'c bejn retoxtadgoldooreni rebejn ni gunii didx-xhii lacuaa niniireni xtiidxpac Dios.

*Chanälajzni rebejn* nani rdxe'ch lojni

(Mt. 5:38-48; 7:12)

<sup>27</sup> Räjpzani:

—La'tu ni cacuadiajgtu rextidxä rniä diidxre lojtu: colchanälajz rebejn ni rdxe'ch lojtu, colyujn dzunsa'c loj rebejn ni rdxechlajz lojtu. <sup>28</sup> Benle' yejc rebejn ni rgube la'tu. Gunab lo Dios xcuent rebejn ni rcuaquij la'tu. <sup>29</sup> Palga yu' chu rlajz quiin te laad lojlu, badeedza stelaad quiinni. Palga yu' chu gudzucaj xhablojiaalu, badeedza näj xcamangwlu xca'ni. <sup>30</sup> Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniabsacluni lojni. <sup>31</sup> Sigajc ni rlajzlu gunnäj bejn la'tu, si'cza la'tu colyennäj bejn.

<sup>32</sup> Palga la'tu sanälajztistu rebejn nani sanälajz la'tu, xlia'sini, sa'csi sigajcza rujn rebendojĵ. <sup>33</sup> Palga guntu hueen lojtis rebejn ni rujn hueen lojtu, xhet laadi cayujntu, sa'csi sigajcza rujn rebejn ni nabajn neĵ dojĵ. <sup>34</sup> Palga gudedlaatu lojtis reni rujntu xhigab gunidxsacni lojtu, ĵxhi cos hueen rchalotu rujntu? Ni rebendojĵ rudedlaazareni loj rebejn ni najnreni siguixsac ni nasääbreni. <sup>35</sup> La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzajz Dios lojtu; te si'c gactu xi'n Gueb Dios ni nabajn xhaguibaa. Sa'csi si'cza najc Dios huenduxh loj reni di gudeed xquixtios lojni, näjza loj rebendojĵ. <sup>36</sup> Colgulaslajz resa'tu si'c rulaslajz Xtdnu Dios guiraa rebejn.

Colgulaslajz sa'tu

(Mt. 7:1-5)

<sup>37</sup> Räjpzani:

—Na'c guntu yälguxhtis nani rujn bejn, naatu xhet laadi rujnni; te na'cza gun Dios yälguxhtis rextojĵtu. Na'c gucuaquijtu bejn te sigajcza di Dios gucuaquij la'tu. Colgusiäjĵ-lajz dojĵ ni rujn sa'tu, te si'cza gusiäjĵ-lajz Dios rextojĵtu. <sup>38</sup> Colgudeed loj bejn ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, sibeitijp ni yu' nenni, cupe'tlini gusälreni neĵ xpolstu. Dios suniidx lojtu lagajc con mediid ni rudeedtu loj rebejn.

<sup>39</sup> Guniiza Jesús stee cuent räjpn:

—ĴLa sajc guluii te beĵ lotiä'p nez yuj lo stee beĵ lotiä'p, ä? ĴLa di guiro'preni guitejb neĵ te gueed, ä? <sup>40</sup> Te bejn ni casieed di gacdi guisieedruni loj ni najn xmastrni. Te bejn, che agulujx bisieedni, sajcnĵ si'cni najc mastr xtenni.

<sup>41</sup> ¿Xhicient cahuiilu guixhe' ni yu' baloj bejtzlu, luxh dilu fii yagro ni yu' balojlu? <sup>42</sup> O, ¿xho mood gäblu lo bejtzlu: “Guidon cuää guixhe' ni yu' balojlu”; luxh dilu gacbee yu' te yagro balojlu, ä? ¡Benguijdx! Guläxgaa yagro ni yu' balojlu, dxejc sajc fisa'clu te cuäálu guixhbäz ni yu' baloj bejtzlu.

*Ninexhsa'c ni rcaj loj te yajg sujn gumbeeni yajg*

*(Mt. 7:17-20; 12:34-35)*

<sup>43</sup> Räjpzani:

—Xheti te yagsa'c ni rudeed ninejxh ni xhet sajcđi, xhetiza te yajg ni xhet sajcđi ni rudeed ninexhsa'c. <sup>44</sup> Sa'csi tebgaj reyajg ruseñlojni xhi yajgni xcuent ninejxh ni rcaj lojni. Di bejn gutie' iigw lo reyaguejch, diza bejn gutiu' uub lo te yag balagrejñ. <sup>45</sup> Rebensa'c rniididxsa'c, sa'csi xhigabsa'c yu' neñ lastooni. Niluxh rebguijdx rniiganax didxgijdx sa'csi xhigabgijdx yu' neñ lastooni, sa'csi ro'ni rniinani yu' neñ lastooni.

*Tio'p bejn ni benchee tio'p yu'*

*(Mt. 7:24-27)*

<sup>46</sup> Räjpzani:

—¿Xhicient rniitu loä: “Dad, Dad,” luxh ditu gun nani rniä guntu? <sup>47</sup> Guiniä lojtu chuni'c najc si'c bejn ni riääđ loä, rucuađiajgni xtidxä luxh rusoobni xtidxä. <sup>48</sup> Najcni si'c te bejn ni benchee rolijzni, ganid gudäänni jiät, dxejcti bejn ni cimient yejc te guilaj. Cheni biäjt nisro ro' gueuu, bidijn nisro cuä' yu'ga, luxh nicla nusniibnini, sa'csi yu'ga sobgadzut'z yejc te guilaj. <sup>49</sup> Niluxh reni rcuađiajg xtidxä, dxejc direni guzoob xtidxä, najcreni si'c te bejn ni bejn xyu'ni loj yujxh, dini niujñ cimient xten yu'ga. Dxejcti biäjt nisro, bidijn ni cuä' yu'ga, dxejc li gurebän yu'ga, gunitlojtini.

## 7

*Basiajc Jesús xmos te beṅ roman ni rnibee*  
(Mt. 8:5-13)

<sup>1</sup> Che gulujx gunii Jesús loj rebejn, huijni te guejdx ni laa Capernaum. <sup>2</sup> Ro'c yu' te beṅ roman ni rnibee, yu' te mos lojni, luxh sanälazduxhni mosga. Cayacxhuduxh mosga, ameerli guetni. <sup>3</sup> Che biejn diajg capitán cagusä'treni Jesús, baxhalgajcni gaii beṅgool lo rexpejn Israel te chagajnreni Jesús jiaädni te gusiajcnini xmos dade'ga. <sup>4</sup> Che gubigreni loj Jesús, gusloj gunabduxhreni lojni, räjpreni lojni:

—Dade're najc beṅsa'c, nungäjl gacnäjluni <sup>5</sup> sa'csi sanälajzni lajdx rexpejn Israel, luxh lagajc laani gunibee guc-chee xquidobäznu.

<sup>6</sup> Dxejcti huiinä Jesúsreni. Cheni siäddzungajxhreni royu', baxhal capitánnga gaii xamiigwni, gäbreni loj Jesús:

—Si'c naj capitán: “Di rlazä gutalä xtuunlu. ¿Chu narä te jiu'lu rolizä? Xhet sacädi. <sup>7</sup> Ni'c dina niapä baloor te lagajc narä niädganä guejblu, sa'csi rajplu yälrnibeduxh niluxh narä rut nacädi. Ni'cni gunibeetis jiajc xmosä, luxh laani siacgajcni. <sup>8</sup> Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riäädni; che gäpä loj xmosä: Bejn dee, rungajcnini.”

<sup>9</sup> Che biejn diajg Jesús rediidxre, bidxeloduxhni, gubiréni loj rebejn ni siädnajlui, räjpreni lojreni:

—Rniliápac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

<sup>10</sup> Che gubi' rebejn ni huij loj Jesús roliz capitán, bahuiireni abiajc xmosni.

*Baspaṅsac Jesús xi'n te gunabiuud*

<sup>11</sup> Nen redxejga, huij Jesús te guejdx ni laa Naín. Huináni rexpejn̄pacni nájza xhidajl bejn̄ ni sanajlni. <sup>12</sup>Che bidzuj̄nni gajxh ro' guejdxga, bahuiini sacua'tzreni te bengut, te bi'n ni najc xtebtis xi'n te gunabiuud. Xhidalduxh bejn̄ sacua'tzni. <sup>13</sup>Che bahuii Jesús loj gunabiuudga, biani nane'ga, rájpn̄i lojni:

—¡Na'c roonlu!

<sup>14</sup>Dxejc gubig Jesús lo rebejn̄ ni sanä bengutga, dxejc guzudxi reni nuu bengutga. Dxejc rájp Jesús loj bengutga:

—¡Bi'n!, narä rniä lojlu; ¡Huistie!

<sup>15</sup>Dxejc huistie bengutga, sobga'ni guslojni caniini. Dxejc badeed Jesúsni lo xnanni. <sup>16</sup>Che bahuiireni xhini'c gujc, bidxejbreni, bidxeloduxhreni, guslojreni calä'preni xpala'n Dios, rájpreni:

—Te niguiscduxh ni rnii xtidx Dios abidzuj̄n̄ nez loonu.

Caniizareni:

—Lagajc Guejb Dios abiädhuii rexpejn̄ni.

<sup>17</sup>Dxejc bire'ch diidx xcuent Jesús guideb nez reguedx Judea nájza guiraa reguejdx ni tre' nejzga.

*Xpejn̄* Juan ni rutiobnis huinabdiidx loj Jesús

(Mt. 11:2-19)

<sup>18</sup>Rexpejn̄pac Juan ni rutiobnis bij rediidxga lojni che yu'ni latzguiib. <sup>19</sup>Dxejc baxhałni gaiireni lo Jesús te sanabdiidxreni: “¿La guliipac najclu Crist ni jiäd o sibäjznu chu stee bejn̄, ä?” <sup>20</sup>Dxejcti gubig rexpejn̄ Juan loj Jesús, rájpreni:

—Juan ni rutiobnis baxhał nuurnu te guiniabdiidxnu lojlu: “¿La luj najc Crist ni jiäd o la sibäjznu chu stee bejn̄?”

<sup>21</sup>Lagajc dxejc che bidzuj̄n̄reni, basiajc Jesús xhidajl bejn̄ ni rajc garen-garen yälguijdx, ni yu'za rebendxab

lastooreni, basiajczani baloj ni di fii. <sup>22</sup> Dxejcti badzu' Jesús diidxre, räjpni:

—Colchaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; reben-coj rsiasa'c; reben ni ral guejdx tiejxhni, abiajc tiejxhni; rediagcua't riensac diajgreni; rebengut, agubansacreni; luxh loj rebenproob nani cabäjz xcälracnäj Dios riejn diajgreni rsiule' xtidx Dios xcuent xho laa bejn lo dojl. <sup>23</sup> Chicbaa nani rumbee narä, nani di cuälaz narä.”

<sup>24</sup> Cheni sii rexpelj Juan, gusloj Jesús caniini xcuent Juan loj rebejn, räjpni:

—¿Chuni'c huihuiitu nez lo reyubijdz? ¿La te nijt ni rusniib bej, ä? <sup>25</sup> ¿Xhini'c huihuiitu? ¿Te bejn ni sucheduxh, ä? La'tu najntu rebejn ni sucheduxh näjza reni nabaŋsa'c, rolijz reŋei yu'reni. <sup>26</sup> ¿Chuxhni'c biriitu huihuiitu? ¿Te niguii ni rnii xtidx Dios, ä? O'n, rniliä lojtu, luxh te ni sacduxhru loj guiraa reniguii ni rnii xtidx Dios.

<sup>27</sup> Juan najc niguii ni ruzä't rexquijtz Dios cadre caj scree: Narä guxhalä te niguii nani guinii xtidxä, te nidni lojlu, te laani guzucheeni xnezyujlu nez lojlu.

<sup>28</sup> Rniliäpac, loj guiraa rexingaan regunaa, nicla tejni gajd guiricaj ni najc te beŋsacduxhru nez loj Dios si'c najc Juan ni rutiobnis. Niluxh nani guxiiru sajç lo xcälrnibee Dios ni jääd, sajcruni loj Juan.

<sup>29</sup> Che biejn diajç rebejn näjza reni rusquijx impuest rextiidxni xcuent Juan, gucbeereni rujn Dios yälguxhtissa'c, sa'csi abatiobnis Juanreni. <sup>30</sup> Niluxh referisee näjza rebejn ni ruluii leii gulälazreni nani niujn Dios par laareni, sa'csi direni nicäjb nutiobnis Juanreni. <sup>31</sup> Räjpza Jesús lojreni:

—¿Xhocha guiniä najc rebejn nani tre' naj? <sup>32</sup> Najczeni si'c rebiuxbäz nani rguijt nez lo guii cadre rdo', rbedxa'reni loj sa'reni, rniireni: “Bielnu te bizej te

guya'tu, niluxh ditu nuya'. Bielzanu te dij ni nabaduxh dxejcti dizatu nioon.”<sup>33</sup> Sa'csi che biääd Juan, dini niauxha't, dizani niä' bin, luxh räjptu: “Yu' bendxab lastooni.”<sup>34</sup> Dxejcti biälä narä, Xi'n Dios ni gujc Niguii, rauä, rä'ä. Dxejc räjptu: “Bahuilaare, dade're rauxha't, rä'zani, najcni xamiigw rebendoj] näjza rebejn ni rusquijx reimpuest xten gubier.”<sup>35</sup> Ni'cni xcäl\_najn Dios huenliisi rienloj loj dzuun ni rujn rebejn ni najn.

*Jesús huij rolizj Simón ni najc farisee*

<sup>36</sup> Dxejc tej refarisee gunii loj Jesús, räjptni:

—Jiäädlu rolizä te guidaunu.

Dxejc huij Jesús rolizjni, ro'c gurejni lo mex.<sup>37</sup> Rbäjz te gunagubejxh lo guejdxga. Che biejn diajgni satajw Jesús rolizj fariseega, bidzun\_näjni te bo't guidxa se't nejxh, luxh bo'tga najc si'c onix, botsa'cni.<sup>38</sup> Che biu' gunaaga, bidzujjni lo ni' Jesús, guslojni cayoوني. Con nisbee caguiibni ni' Jesús, dxejc caguspjdzni ni'ni con xquidxejcti. Dxejc bachagro'ni ni'ni bazaazani setnejxhga ni' Jesús.<sup>39</sup> Che bahuii farisee ni gurejdx Jesús rolizjni, recosre, bejn ni xhigab: “Palga gulii najc niguiire Xi'n Dios, sacbeeni chu najc näjza xho najc gunaare ni cagajn ni'ni, sacbeezani najcni te gunado]luxh.”<sup>40</sup> Dxejc gunii Jesús loj fariseega, räjptni:

—Simón, yu' xhi rlazä guiniä lojlu.

Dxejc räjpt fariseega lojni:

—Guniini, Dad maestr.

<sup>41</sup> Dxejc räjpt Jesús lojni:

—Tio'p bejn nazäab meel lo te bejn ni rudedlaa meel. Tej reni nazäab si'cti gaiigayuu meel. Steeni nazäab si'cti tiubitzuu meel.<sup>42</sup> Cheni di niajcdi niguijxreni xti'nreni, basiäl] lajzni xti'n guiro'preni. Naj gunii loä, ¿chu tejreni sianälajzru dade'ga, ä?

<sup>43</sup> Badzu' Simón diidxre lojni, räjptni:

—Rchaloä bejn ni nazääbru lojni.

Dxejc räjp Jesús:

—Laaca rniilu.

<sup>44</sup> Dxejc gubiré Jesús, bahuiini loj gunaaga. Dxejc räjpni loj Simón:

—¡Bahuii loj gunaare! Che biu'ä rolijzlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidxejcni. <sup>45</sup> Dilu nuchagro' narä, luxh laani cheli biu'ä ree, gajdni cuääz guchagro'ni ni'ä. <sup>46</sup> Dilu nusäl se't yecä, niluxh laani basälni se't ni rlianexhduxh ni'ä. <sup>47</sup> Ni'cni rniä lojlu, dojl xten gunaare, luxh xhidalduxh najcreni, abadzucaj Dios redojlga sa'csi huenliisi sanälajzni Dios. Luxh rebejn ni rudzucaj Dios guxii xtojlneni, guxiiza sanälajzreni Dios.

<sup>48</sup> Dxejcti räjpni loj gunaaga:

—Agubicaj rextojllu.

<sup>49</sup> Dxejc rebejn ni sobga' lo mex con laani, che biejn diajgreni rediidxre, gusloj canii lo sa'reni, räjpreni:

—¿Chuchani'c najc niguiire, ni'cni rudzucajlini xtoj bejn, ä?

<sup>50</sup> Räjp Jesús loj gunaaga:

—Agulaalu lo xtojllu sa'csi ahuililajzlu; huij naj, bas-cuedxi lajzlu.

## 8

### *Regunaa ni gucnäj Jesús*

<sup>1</sup> Dxejcti gusloj huij Jesús guiraa reguejdx näjza rerench, cagusule'ni xtidx Dios, caguluiini xcuent xcälrnibee Dios loj rebejn. Sanäni rexpejn pacni <sup>2</sup> näjza gaii gunaa ni abasiajcn, agulääni rebendxab lastooreni, näjza basiajcn xcälguijdxreni. Tejni laa Marii ni laaza Magdalen, ni gulää Jesús gajdz bendxab nen lastooni.

<sup>3</sup> Stee gunaa laa Xuan, ni najc chääl Chuza, ni ruhuii



xhixten Herodes. Stee gunaa laa Susan. Guyu'za sgaii gunaa. Guiraa reni'c rudeed lagajc xhixtenreni te rio' recos ni rquiinreni.

*Xcuent bejn* ni rbe'c binij

(Mt. 13:1-9; Mr. 4:1-9)

<sup>4</sup>Dxejcti bire' xhidajl bejn lojni ni birii xhidajl reguejdx. Lojreni gunii Jesús con te cuent ni ruluii, räjpni:

<sup>5</sup>—Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn baläjreni yejc binijga, biäädza remane' ni rutajt xhaguibaa, guda-jwrenini. <sup>6</sup>Yu'za lajt bitejb binijga nejn reguij cadre xheti xhidajl yuj. Che gulejn binijga, gubidzgajcni sa'csi xheti xcojp ro'c. <sup>7</sup>Yu'za lajt bitejbni nez nejn reyaguejch. Che gulejn, di reyaguejch nusaan niroob gäjlgä. <sup>8</sup>Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj tejga binij ni gule'c dade'ga.

Che gulujx guniini scree, dxejc guniini dip räjpni:

—Palga sajc gucuadiajgtu rediidxga, colcuadiagsa'cni.

*Xhicuent gunii Jesús recuent*

(Mt. 13:10-17; Mr. 4:10-12)

<sup>9</sup>Dxejcti gunabdiidx rexpejnpacni lojni räjpreni:

—¿Xhi säloj cuentre?

<sup>10</sup>Dxejc räjpni lojreni:

—Lojtu ni najc rexpejnä suniidx Dios yäl'najn te gacbeetu reyäl'xhiga'tz xten xcäl'rnibeeni. Loj chutis stee bejn, siniä' recuent lojreni te mase cadxelojreni, direni fisa'c, luxh mase cacuadiajgrenti, direni gacbesa'c.

*Rusule' Jesús xcuent ni rbe'c binij*

(Mt. 13:18-23; Mr. 4:13-20)

<sup>11</sup>Räjpzani:

—Scree säloj cuentre, rebinij najc si'c xtidx Dios. <sup>12</sup> Binij ni biajb lo nezyuj najc si'c rebejn ni rucuadi-ajg xtidx Dios. Dxejc riääd bendxab, riäddzucajni redi-idxga lastooreni te na'c chalilajzreni xtidx Dios, te na'cza laareni lo dojl. <sup>13</sup> Binij ni biajb neñ reguij najc si'c rebejn ni rucuadiajg xtidx Dios, rbaalajzreni; per sa'csi xheti xlobaareni, nälajznu, direni gandzu'tz xtidx Dios, rililajzreni te bo'c, per che rsacsí rebejnreni, rbälazreni xtidx Dios. <sup>14</sup> Binij ni biajb neñ reyaguejch najc si'c rebejn ni rucuadiajg xtidx Dios, per laļ ni sanuureni xnejzreni, rijia'nreni lo recos guedxliuj, lo yäl'nasa'c ni ruhuiireni, näjza rujnreni si'ttis ni rlajz tiejxhreni. Reni'c rujn runijtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios. <sup>15</sup> Binij ni riajb lo reyusa'c najc si'c rebejn nani rucuadiajg xtidx Dios, ni rililajz diidxga guideb te lastoya ni najc hueen. Randzu'tzreni xtidx Dios, dxejc rudeedreni te yäl'nasa'c, nalajznu ruzoobreni xtidx Dios, rujnreni xtzunsa'c Dios.

*Xhet yu'di ni naga'tz par tejpas*

*(Mr. 4:21-25)*

<sup>16</sup> Räjpzani:

—Ruti te bejn ni rucuaguuj te bajl dxejc rusäuni te caj yejc bajlga, dizani gusujnini dejtz te loon. Alga rusoobnini neñ candilieer loj te mex te guzanijni guideb neñ yu'ga te reni jiu' fiireni lo bajlga. <sup>17</sup> Xhet yu'di ni yuchetzu'tzdi ni di guidzujn dxej guiluini; xhet yu'diza ni naga'tz naj ni di guidzujn dxej gacbee bejnni.

<sup>18</sup> Ni'cni colcuadiagsa'c diidx; sa'csi guiraa rebejn ni rajp yäl'racbee, sajprureni yäl'najn. Luxh reni di ninuu nucuadiajg xtidx Dios, lojni sibicaj näj ni abacuadiajgni, ni rchaloni najnni.

*Xnan Jesús con rebejtzni**(Mt. 12:46-50; Mr. 3:31-35)*

<sup>19</sup> Dxejc bidzujñ xnan Jesús nájza rebejtzni cadro suga'ni, niluxh di niajcdi nibigreni lojni sa'csi tre' xhidalduxh bejn ro'c. <sup>20</sup> Dxejcti huisa'n te bejn diidx loj Jesús, rájpní:

—Xnan guejblu nájza rebejtz guejblu suga' rolä', luxh rlaizreni fiireni lo guejblu.

<sup>21</sup> Badzu' Jesús diidxre lojreni, rájpní:

—Xnanä nájza rebetzä najc rebejn ni rucuadiajg, ni ruzoobza xtidx Dios.

*Basiacdxí Jesús te beduxh**(Mt. 8:23-27; Mr. 4:35-41)*

<sup>22</sup> Te dxej biu' Jesús nájza rexpejn pacni nen te barcw. Dxejc rájpní lojreni:

—Colcho' stelaad ro' nisre.

Basyu'reni barcw lo nis, sä'tireni. <sup>23</sup> Cheni sadejdreni galäii nisga, gudiejs Jesús nen barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis nen barcw, ameerli jiaáz barcwga lo nis.

<sup>24</sup> Dxejcti huicuäänreni Jesús, rájpní lojni:

—¡Mastr! ¡Mastr! ¡Cayääznu lo nis!

Che gubajñni, huistieni, dxejc gudidxa'ni lo bejga nájza lo nis ni cayäsjiaa. Dxejc gulájz bejga, guredxiza nisga.

<sup>25</sup> Dxejc rájpní lojreni:

—¿Con xcälrlilajztu, ä?

Per laareni bidxejbreni, bidxeloduxhreni, canabdidxreni lo sa'reni:

—¿Chuni'c najc niguiire te rnibeeni bej nájza nis, luxh rusobdiajg bej nájza nis xtiidxni?

*Te ben Gadara ni guyu' rexsprit bendxab lastooni**(Mt. 8:28-34; Mr. 5:1-20)*

<sup>26</sup> Bidzujntireni lo yuj xten Gadara ni tre' stelaad ro' nis nez loj reyuj xten Galilee. <sup>27</sup> Cheni biäjt Jesús neñ barcw baläjni lo yuj, gubig te bejn ni siääd guejdxga lojni. Agujc xchej yu' rebendxab neñ lastooni. Dini gacw xhajn, dizani cuääz neñ yu', alga rbäjzni cadro yu' rebaa. <sup>28</sup> Che bahuiini loj Jesús bazuxhijbni nez lojni, guredxa'ni räjpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsílu nuurnu.

<sup>29</sup> Guniini rediidxre sa'csi canibee Jesús guirii rebendxabga neñ lastoo bejnre. Agujc xchero cazob rni-aaz rebendxabga bejnga ruliib rebejn ni'ni, naani con cadenguuib te guilibdzu'tzni, te xhet gundini bejn. Niluxh laani rutiugya'ni recaden, dxejc rebendxabga rinärenini nez lo reyubijdz. <sup>30</sup> Jesús gunabdiidx lojni, räjpni:

—¿Chu laalu?

Dxejc badzu'ni diidxre loj Jesús räjpni:

—Legión najc laä.

Si'c guniini sa'csi xhidalduxh najc rebendxab ni yu' neñ lastooni. <sup>31</sup> Dxejc gunabduxhrene loj Jesús na'c guxhalsacnireni cadro biriireni. <sup>32</sup> Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebendxabga loj Jesús te gusaanni jiu'reni neñ recuchga. Che cuäjb Jesús, <sup>33</sup> birii rebendxabga neñ lastoo dade'ga, biugajcreni neñ recuchga. Che biu'reni neñ recuch, baxun recuchga bitejbreni ro' te bala', dxejc biajbreni lo nis, ro'cti gujtreni.

<sup>34</sup> Baxun reni cayajp recuchga che bahuiireni xhini'c gujc ro'c, huisa'nreni diidx lo rebenguejdxga näjza lo rebeñ rench. <sup>35</sup> Dxejc biädhuii rebejn xhini'c gujc ro'c. Che bidzujntireni cadro suga' Jesús, bahuiireni loj bejn ni birii bendxab lastooni. Sobga'ni cuä' ni' Jesús, najcwni xhajn, luxh xhetru rajcdi yejnci; dxejc bidxebduxh

rebejn̄ga. <sup>36</sup> Sas reni bahuiloj xho gujcni, bijreni diidx xho basiajc Jesús bejn̄ ni guyu' rebej̄dxabre lastooni. <sup>37</sup> Dxejc guiraa rebejn̄ Gadara nájza reguejdx ni tre' nejzga, gunabreni jiunejz Jesús ro'c sa'csi cadxebduxhreni. Ni'cni biu' Jesús nen̄ barcw te gubisacni nejz cadre siáadni. <sup>38</sup> Dade' ni birii rebej̄dxab lastooni gunabni lo Jesús gusaanni chanajlnini, niluxh Jesús gunibee jia'nni, rájpn̄i lojni:

<sup>39</sup> —Gubi' rolijzlu te güilu diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennáj Jesúsni.

*Xindxa'p Jairo nájza te gunaa ni gudajn xhajn Jesús  
(Mt. 9:18-26; Mr. 5:21-43)*

<sup>40</sup> Che gubi' Jesús stelaad nis, bibalajz rebejn̄ gubi'ni, sa'csi cabájzpacreni guibisacni. <sup>41</sup> Dxejc bidzuj̄n te bejn̄ ni laa Jairo, ni rnibee te guidobáz, bazuxhijbni nez loj Jesús, gunabni chanänini rolijzni <sup>42</sup> sa'csi yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. Lalsi sää Jesús rolijzni, birinajl xhidalduxh bejn̄i, catäälireneni.

<sup>43</sup> Loj rebejn̄ga nadxaag te gunaa ni agujc tzubito'p ijz cayacxhuuni, cayajcni yälguidxbäi. Xlia'si abanijtni guiraa xhixtenni cua' renani rujn remeed. <sup>44</sup> Gubig gunaaga dejtz Jesús te gudajnni ro' xhajn̄i. Lagajc dxejc biacgajcni.

<sup>45</sup> Dxejcti gunabdiidx Jesús rájpn̄i:

—¿Chuni'c najc ni gudajn narä, ä?

Guiraa rebejn̄ rájpn̄:

—Dinu gan.

Rájpn̄za Pedr:

—Mastr, ni yu'lu galäii reben<sub>n</sub> xhidajl, luxh cagutäälireni luj. ¿Xhicuent rniabdiidxlu: “¿Chu gudajñ narä?”

<sup>46</sup> Räjppac Jesús lojni:

—Yu' chu gudajñ narä, sa'csi gucbeä yu' chu basiajc xcäl̄rnibeä.

<sup>47</sup> Che gucbee gunaaga anajn Jesús gudajñni xhajnbi, bidxejnbi, racejsl̄ini gubigni loj Jesús, bazuxhijbni lojni. nez loj guiraa rebejn<sub>n</sub> räjpni xhicuent gudajñni xhajnbi näjza xho biacgajcni.

<sup>48</sup> Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

<sup>49</sup> Lañni canii Jesús si'c bidzujñ te bejn<sub>n</sub> ni siääd rolijz Jairo, ni rnibee te guidobäz. Räjpn̄i loj Jairo:

—Agujt xindxa'plu. Na'cru gutajllu xtzuun Dad Mastr.

<sup>50</sup> Che biejn diajg Jesús rediidxga, räjpni loj Jairo:

—Na'c guidxejblu. Huililajztis te jiac xindxa'plu.

<sup>51</sup> Che bidzujñreni rolijzni, xtebtis Pedr, Jacob, Juan näjza xcuzajn dxape'ga biunäjni neñ yu'ga. Peta rebejn<sub>n</sub> ni siädnañl̄ni bia'nreni rolä'. <sup>52</sup> Cayonduhx guiraa rebejn<sub>n</sub> ni sobga' neñ yu'. Dxejc Jesús räjp lojreni:

—Na'c roontu, gajd dxape're guet, nagayejstisni.

<sup>53</sup> Alga baxhiznäjrenini, sa'csi anajnreni agujt dxape'ga.

<sup>54</sup> Dxejcti gunaaz Jesús ñaa dxape'ga, dip guniini, räjpni lojni:

—¡Dxape', huistie!

<sup>55</sup> Dxejc gubansac dxape'ga, huistiegajcni. Dxejc gunibee Jesús gudeedreni xhi gauni.

<sup>56</sup> Bidxeloduxh rexcuzajñni. Per gunibee Jesús na'c güireni diidx xhini'c gujc ro'c.

## 9

*Ruxhal* Jesús guitzubitio'p rexpejn<sub>u</sub>pacni

(Mt. 10:5-15; Mr. 6:7-13)

<sup>1</sup> Batie' Jesús guitzubitio'p rexpejn<sub>u</sub>pacni te badeedni yäl<sub>u</sub>rnibee lojreni te cuääreni rebendxab lastoo rebejn, näjza te gusiajcreni rebenracxhuu. <sup>2</sup> Baxhalnireni te gusule'reni diidx xcä<sub>u</sub>rnibee Dios näjza te gusiajcreni rebenracxhuu. <sup>3</sup> Dxejc räjpni lojreni:

—Xhet chanäditu lo nejz, nicla baston, nicla bols, nicla yätxtiil, nicla meel; na'cza chanätu tio'p xhajbtu; tejtisni chanätu. <sup>4</sup> Chutis rolizj bejn cadro guidzujntu, ro'c coljia'n cheni guiriilitu lo guejdxga. <sup>5</sup> Palga direni gusaan jiu'tu rolizjreni, che jiunejztu lo guejdxga, colcuijb guxhuj ni'tu si'c te seen direni nililajz xtiidxtu.

<sup>6</sup> Dxejc biriireni sääreni garen-garen reguejdx, cagusule'reni xtidx Dios, cagusiajczareni rebenracxhuu cadrotis rdzujnreni.

*Xho gujt Juan ni rutiobnis*

(Mt. 14:1-12; Mr. 6:14-29)

<sup>7</sup> Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni xhigab, sa'csi yu' reni canii laa Juan ni agubansac lo rebengut. <sup>8</sup> Sgaiireni canii abaluiloj Elías. Yu'zareni canii pet laa stee niguii ni gunii xtidx Dios galoo ni agubansac. <sup>9</sup> Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diagä xhidajl didxro xcuentni?

Dxejc r<sub>u</sub>lajzpac Herodes fii lojni.

*Bayaan Jesús gaii mi<sub>l</sub>* bejn

(Mt. 14:13-21; Mr. 6:30-44; Jn. 6:1-14)

<sup>10</sup> Che gubi' rexpejn̄pacni, bijreni diidx loj Jesús xhini'c bejnreni. Sas huinä Jesúsreni te lajt cadre ruti bejn̄, gajxh te guejdx ni laa Betsaida. <sup>11</sup> Che gucbee rebejn̄ caro sääreni, huinajlrenini bidxälrenini. Che siädreni lojni huichaglojnireni, sas gusloj cagusule'ni lojreni xcuent xcäl̄rnibee Dios. Basiajczani rebejn̄ ni cayacxhuu.

<sup>12</sup> Che gusloj cayääz gubijdx, gubig rexpejn̄pacni loj Jesús, räjpreni lojni:

—Gojs loj rebejn̄re, agoj̄l̄ jiireni te chatiilreni xhi gaureni, näjza cadre tedreni guxhij̄n̄ lo rerench, neñ reguedxbäz, sa'csi ree xhet yu'di.

<sup>13</sup> Dxejcti räjp Jesús loj rexpejn̄pacni:

—¡La'tu colgudeed xhi gaureni!

Dxejc räjpreni lojni:

—Xhet rajpdinu, gaiitis yätxtiil näjza tio'p bäj̄l. Ni'ctis yu' palga dinu chasiiru xhi gau reben̄ xhidajlre.

<sup>14</sup> Luxh najc rebejn̄ga si'cti gaii mī niguii. Dxejc räjp Jesús loj rexpejn̄pacni:

—Colyejtz lojreni cuereni xcua-xcuaareni, si'cti tiubitzugajreni te cuaa.

<sup>15</sup> Si'c bejnrenini, sas gurej guiraa rebejn̄ga si'c. <sup>16</sup> Dxejc cua' Jesús gaii yätxtiilga näjza tio'p bäj̄lga, guläsni lojni xhaguibaa, badeedni xquixtios lo Dios xcuent yälrajwga. Che guluix badeedni xquixtios gula'ni reyätxtiilga näjza rebäj̄lga, dxejc sanuutis badeednini loj rexpejn̄pacni te gudisrenini loj rebejn̄ga. <sup>17</sup> Guiraa reben̄ xhidaalga gudajw, gudxaj xque'reni. Dxejcti batojpreni ni bia'n bachajreni tzubitio'p dxijm̄ yätxtilbiujy näjza bälbiujy ni bia'n.

*Gunii Pedr Jesús najc Crist*

*(Mt. 16:13-19; Mr. 8:27-29)*

<sup>18</sup> Te dxej lālni cabedx-canab Jesús lo Dios, xtebni näjza rexpejn̄pacni, gunabdiidxni lojreni, räjpni:

—¿Chuni'c rnii rebejn̄ nacä?



<sup>19</sup> Dxejc räjpreni lojni:

—Yu'reni rniij najclu Juan ni rutiobnis; yu'zareni rniij najclu Elías; sgaiireni rniij najclu stee niguii ni gunii xtidx Dios galoo ni agubaṣac.

<sup>20</sup> Dxejc gunabdiidxni lojreni, räjpni:

—¿La'tu a? ¿Chuni'c rniitu nacä?

Dxejc räjp Pedr lojni:

—Luj najclu Crist Xi'n Dios ni cabääznu.

*Jesús rnixgaa xho guetni*

(Mt. 16:20-28; Mr. 8:30-9:1)

<sup>21</sup> Dxejc gunibee Jesús lojreni, räjpni:

—Na'c gäbtu si'c lo rebejn.

<sup>22</sup> Räjpszani lojreni:

—Nanab ted Xi'n Niguii trabajwduxh; rebengool xten guidoo, näjza rebixhojz, näjza rebejn ni ruluui xleii Moisés sibälazreni narä, naareni dina gacä Crist ni cabääznu. Sugu'treni narä Xi'n Dios ni gujc Niguii, niluxh sibansaä ni riojn dxej.

<sup>23</sup> Dxejc räjpni loj guiraareni:

—Palga chu tejtü rlanj guirinajl narä, nanab jiällajzni xhixtenni, te guixe-guixee guntisni nani gudedä gunni.

<sup>24</sup> Sa'csi nani rlanj guiniazdzu'tzni xcälṅnabajṅni, sunijtni yälṅnabajṅ lo Dios; luxh nani runijt xcälṅnabajṅni xcuent xtidxä, sica'ni yälṅnabajṅ par tejpas. <sup>25</sup> Sa'csi ¿xhi gaan gun te bejn palga xca'ni guideb guedxliuj, luxh gunijtni xcälṅnabajṅni lo Dios? <sup>26</sup> Niluxh nani guituinäj narä näjza xtidxä, sigajcza narä, Xi'n Dios ni gujc Niguii, situinäázani cheni jiälä si'c reiij guideb yälrdimbicha' xten Xtadä näjza rexanglni. <sup>27</sup> Guliipac rniä lojtu, yu' gaii reni suga' ree, ni di guet, suhuixgaareni xcälṅrnibee Dios.

*Bachaa xho rluijoj Jesús*

(Mt. 17:1-8; Mr. 9:2-8)

<sup>28</sup> Gudejdti xhujñ dxej gunii Jesús diidxre, dxej cru huinä Jesús Pedr nájza Jacoob nájza Juan, huijreni jiaa yejc te dajn te guredx-gunabni loj Dios. <sup>29</sup> Lałni cabedx-canab Jesús lo Dios, bidxaa xho ruluii lojni; dxejc xha-jbni gujc nolbäj, rdimbicha'lini. <sup>30</sup> Biricajza tio'p dade' caninäjrenini. Redade'ga najc toMoisés nájza Elías. <sup>31</sup> Rdimbicha'za redade'ga. Caninäjreni Jesús xcuent xho guetni guedx Jerusalén. <sup>32</sup> Luxh Pedr nájza resa'ni guyuduxh bacal lojreni; che bire'ch bacal lojreni bahuiireni lo yälrdimbicha' xten Jesús nájza loj guiro'p redade'ni caninäjni. <sup>33</sup> Cheni agojl jiunejz redade'ga loj Jesús, räjp Pedr loj Jesús:

—Dad, Mastr, huenduxh suga'nu ree. Basaan jiencheenu choñ yue', tejni par luj, tejni par Moisés, steeni par Elías.

Luxh di Pedr gaan xhini'c caniini. <sup>34</sup> Lałni caniini si'c, bire' te za gusloj cayajt yejcreni, dxejc bidxejbreni che biu'reni neñ zaga. <sup>35</sup> Dxejcti biejn diajgreni neñ zaga te xse' te ni gunii, räjpni:

—Dee najc Xi'nä ni sanälazä, colcuadiajg xtiidxni.

<sup>36</sup> Che gulujx guniini rediidxga, bahuiireni sugaxteb Jesús. Dxejc niäutis ro'reni neñ redxejga, rut lojdi bijreni diidx xcuent ni bahuiireni ro'c.

*Basiajc Jesús te biuux ni guyu' beñdxab lastooni*

*(Mt. 17:14-21; Mr. 9:14-29)*

<sup>37</sup> Barayääl cheni biäjtreni yejc dajnga, xhidalduxh bejñ cabäjz Jesús. <sup>38</sup> Dxejcti te dade' ni nadxaag rebejnga guredxa'ni, räjpni loj Jesús:

—Mastr, balaslajz narä, gudahuii xi'nä, sa'csi xtebtisni najcni xinganä. <sup>39</sup> Luxh beñdxab rniaazni, sas rus-cuedxa'nini, rajcni si'c yälguidxbej, rbääni bitzun ro'ni, rusacsíduxhnini, luxh dini gusaanni. <sup>40</sup> Agunabä loj rexpejnpaclu nibääreni beñdxabga, luxh di niajcdini.

<sup>41</sup> Dxejc badzu' Jesús diidxre, räjpni:

—¿Bejn ni di chalilajz, benguijdx! ¿Gucli chunäätu, gucli gunä huant la'tu? ¿Gudanä xi'nlu ree!

<sup>42</sup> Dxejc che cabig biuuxga lojni, basälta' bendxabga biuuxga lo yuj, sas gusloj cayajcni si'c yälguidxbeduxh. Dxejc gudidxa' Jesús loj bendxabga, basiacgajcni biuuxga, dxejc badeednini lo xtadni. <sup>43</sup> Guiraa rebejn bidxeloduxh yälrnibeduxh xten Dios.

*Rnii Jesús stehuält xho guetni*

*(Mt. 17:22-23; Mr. 9:30-32)*

Lalni cadxeloj rebejn lo recos ni bejn Jesús, räjpni loj rexpejnpacni:

<sup>44</sup> —Colcuadiajgsa'c rediidxre, na'cza jiallajztureni, sa'csi sutedreni narä Xi'n Dios ni gujc Niguii ladznaa rebejn.

<sup>45</sup> Niluxh di rexpejnpacni niacbee xhi säloj rextiidxni, sa'csi Dios bacua'tznini lojreni te di niacbeerenini. Bidxejbzareni niniabdiidxreni loj Jesús xhi säloj rediidxga.

*Chuni'c sajcru*

*(Mt. 18:1-5; Mr. 9:33-37)*

<sup>46</sup> Guslojza rexpejn Jesús canabdiidx lo sa'reni:

—¿Chuchani'c sajcru loonu?

<sup>47</sup> Per gucbee Jesús xhi xhigab cayujnreni. Dxejc cua'ni te biuxbäz, bazujnini cuä'ni, <sup>48</sup> räjpni lojreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtadä ni baxhał narä. Ni najc maazru nadolajz lojtu, ni'c najc ni sajcru.

*Nani di quiniyaj nuurnu, xladnu yu'ni*

*(Mr. 9:38-40)*

<sup>49</sup> Dxejc räjp Juan loj Jesús:

—Mastr, bihuiinu loj te bejn ni rbää rexpēdxab nen lastoo bejn con xcälrnibee lajlu. Dxejc rie'tznu lojni na'cru gunni si'c, sa'csi dini sanäj nuurnu.

<sup>50</sup>Dxejc räjp Jesús lojreni:

—Na'c gudxojntuni, sa'csi nani di guiniyaj nuurnu, xlaadnu yu'ni.

*Jesús gudidxa' loj Jacob näjza Juan*

<sup>51</sup>Che siäddzujn redxey ni chää Jesús xhaguibaa, bejn ni xhigab chääpacni guedx Jerusalén. <sup>52</sup>Baxhałni gaii bejn gunijd lojni chääreni te guejdx xten Samaria te satiilreni cadro jia'nreni ro'c. <sup>53</sup>Luxh rebejn samaritan di rla-jzreni gudedlaareni te lajt cadro jia'nreni, sa'csi najnreni chääreni guedx Jerusalén. <sup>54</sup>Che biejn diajg Jacob näj Juan, tio'p xpejn pacni, si'c, sas räjpreni loj Jesús:

—Dad, ¿La rlaizlu guinibeenu jiäjt guiboo xhaguibaali te guze'cni guiraa rebeņguejdxga si'cni bejn Elías?

<sup>55</sup>Dxejc bahuii Jesús lojreni, gudidxa'ni lojreni, räjpni:

—Ditu gaan chuni'c rnibee lastootu. <sup>56</sup>Sa'csi narä Xi'n Dios ni gujc Niguii dina niälä te gudzucaä xcäl nabajn rebejn. Narä biälä te guslaäreni lo dojl.

Dxejcti huijreni garenca guejdx.

*Reni rlaiz nirinajl Jesús*

*(Mt. 8:19-22)*

<sup>57</sup>Lałni sääreni lo nezyuj, biääd te bejn gunii loj Jesús, räjpni:

—Dad, narä rlažä jiädnalä guejblu cadrotis chää guejblu.

<sup>58</sup>Dxejc badzu' Jesús diidxre lojni, räjpni:

—Rebäjz rajp xpiliääreni, remane' ni rutajt rajp xpi-tiääzreni, niluxh narä Xi'n Dios ni gujc Niguii, dina gapä nicla te lajt cadro guscugä yecä.

<sup>59</sup>Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tzxgaá xtaďä, dxejcru jiädnalä guejblu.

<sup>60</sup>Dxejc räjp Jesús lojni:

—Basaan suchacua'tz rebejn ni najc si'c bengut, resabengutreni. Per luj, huij, huisule' diidx xcuent xcäl̄rnibee Dios.

<sup>61</sup>Dxejc räjp steeni lojni:

—Dad, rlazä jiädnalälu, niluxh basanxgaa chasadixä resa'ä ni tre' rolizä.

<sup>62</sup>Dxejc räjp Jesús lojni:

—Nani ruzuj naani yejc garaad, dxejc rudzuré lojni ruhuiini nez dejtzni di gacdi gunni dzuun lo xcäl̄rnibee Dios.

## 10

*Ruxhal* Jesús regayon̄bitzuu

<sup>1</sup> Che gulujx reni'c, gule Jesús gayon̄bitzuu bejn, baxhañnireni tio'pgajreni te basnijdnireni lojni loj reguejdx cadro nanab tedni. <sup>2</sup> Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuaan xten cose'ch te guxhalni xhidajlru bejn ni gun dzuun gutie' xcose'chni. <sup>3</sup> Colchäj la'tu; colhuii xho ruxhalä la'tu si'c xiil galäii recuyo't sa'csi sunnäjreni la'tu si'tisini rlanjreni. <sup>4</sup> Na'c chanätu ngodx, niclaza guijxh, niclaza xcura'chtu, luxh na'c sudxitu guininäjtu bejn lo nejz. <sup>5</sup> Cheni jiu'tu roliz te bejn, ganiddoo colye'tz: “Sucuedxilajz reni rbäjz ree.” <sup>6</sup> Palga najcni te bejn ni rdxagljaz yäl̄rbecdxilajz sia'n xcäl̄rbecdxilajztu ro'c, luxh palga dini gac, sibi' xcäl̄rbecdxilajztu lojtu. <sup>7</sup> Coljia'n lagajc roliz bejn cadro guidzujntu. Ro'c coltajw, colyä'za

xhitis ni guniidxreni, sa'csi nani rujn dzuun, riäj] xca'ni xcuent dzuunga. Coljia'n tejtis lajt dxejtis ni chutu lo guejdxga. <sup>8</sup> Xhitis te guejdx ni jiu'tu, palga jiureni la'tu, colgajw xhitis ni guniidxreni lojtu. <sup>9</sup> Colgusiajc rebenracxhuu ni yu' ro'c, colye'tz lojreni: “Abidzujngajxh xcälrnibee Dios.” <sup>10</sup> Palga jiu'tu te guejdx cadro di rlazreni gucuadiajgreni xtiidxtu, colrii lo nezyuj, ro'c colye'tz lojreni: <sup>11</sup> “Guxhuj xten lajdxtu ni rcaj ni'nu, rudzu'nuni nez lojtu si'c te seen sa'csi ditu nililajz xtiidxnu. Colgacabee dee, abidzungajxh xcälrnibee Dios lojtu.” <sup>12</sup> Ni'cni rniliápac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

*Reguejdx ni di niu xtidx Jesucrist*

*(Mt. 11:20-24)*

<sup>13</sup> Räjpzani:

—jProbe'tu beñ guedx Corazín! jProbe'zatu beñ guedx Betsaida! Paru nuhiii rebenzajt ni gubajñ guedx Tiro näjza Sidón remilaagwr ni benä nez lojtu, pet gucli nusiechlajzreni, niajcwreni ladnagas, nibejzaren i lo cobdäj si'c te seen abasiechlajzreni. <sup>14</sup> Che gun Dios fis rextoj] rebejn guedxliuj, guxiiru gac xfis Dios lo rebenzajt ni gubajñ guedx Tiro näjza Sidón. Fisroru gun Dios reguedx Corazín näjza Betsaida. <sup>15</sup> Luxh luj guedx Capernaum, rchalolu siäjslu xhaguibaa, alga sijablu gabijlli, cadro gaclu fisro xten Dios.

<sup>16</sup> Rajpzani lo rexpejn pacni:

—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtiidx ni baxha] narä ni dini jiu.

*Rbi' regayonbitzuu*

<sup>17</sup> Che gubi' regayon<sub>ñ</sub>bitzoo bejn nani baxhal Jesús, rbaduxh lajzreni, räjpreni:

—Dad, näjza rebendxab rusobdiajg xtiidxnu che rusä'tnu lajlu.

<sup>18</sup> Räjp Jesús lojreni:

—O'n. Ni'cni narä bahuiä che gunijt xcäl<sub>ñ</sub>ribee bendxab, bitejbni xhaguibaa si'c bianij xten guzii. <sup>19</sup> Colgacbee. Narä runidxä yäl<sub>ñ</sub>ribee lojtu te guläjtu yejc bäl näjza yejc naxejb; runidxäza yäl<sub>ñ</sub>ribee te guntu gaan lo xcäl<sub>ñ</sub>ribee bendxab. Xhetliidi gun daan la'tu. <sup>20</sup> Na'c guibalajztistu sa'csi rusobdiajg rebendxab xtiidxnu; colguibalajzru sa'csi acuaj lajtu lo xquijtz Dios xhaguibaa.

### *Bibalajz Jesús*

*(Mt. 11:25-27; 13:16-17)*

<sup>21</sup> Lagajc dxejc bibalaznäjä Jesús Sprit Dxan xten Dios, dxejc räjpni lo Dios:

—Rliä'pä xpala'nlu Xtadä ni rnibee xhaguibaa näjza guedxliuj, sa'csi bacua'tzlu xnezyujlu lo reben<sub>ñ</sub> nanduxh, per baluiilu xnezyujlu loj rebejn ni najc nadolajz si'c te biuxbäz. O'n, Xtadä, sa'csi si'c rlajzlu gunlu.

<sup>22</sup> 'Guiraa recosre abaniidxlu löä Xtadä. Dadtis najn chuni'c najc Xi'n<sub>ñ</sub>i, rutru najndi chu najcni. Rutza najndi chuni'c najc Guejblu Xtadä, xtebtis narä ni najc Xi'n<sub>ñ</sub>lu, con rebejn ni rlazä gumbee luj.

<sup>23</sup> Dxejc bahuii Jesús loj rexpejn<sub>ñ</sub>pacni, räjpni lojtisreni:

—Chicbaa la'tu näjza renani ruhuii guiraa nani cahuilojtu. <sup>24</sup> Sa'csi rniliä lojtu, balti redade' ni gunii xtidx Dios galoo, baltiza rereii rlajz nuhiiireni guiraa ni cahuilojtu, niluxh direni nuhiiini. Rlajzreni niejn diajgreni rediidxre ni cayejn diajgtu, luxh di diajgreni niejn<sub>ñ</sub>i.

*Xcuent te be<sub>ñ</sub>huen ni siädä Samaria*

<sup>25</sup> Dxejc huisulii te mastr xten leii, huininäjni Jesús, rlanjni nuxhiidni Jesús lo xtiidxni, gunabdiidxni lojni:

—Dad, Mastr, ¿xhini'c nanab gunä te guibannää́ Dios par tejpas?

<sup>26</sup> Sas rájp Jesús lojni:

—¿Xhini'c caj lo guijtzt xten leii? ¿Xho rolluni?

<sup>27</sup> Dxejc badzu'ni diidxre, rájpní:

—Chanälajzlu Dad, Xtioslu guideb lastoolu, guideb xaimlu, guideb xtijplu, nájza guideb xcáriejnlu. Huinäla-jzza resa'lu si'ctis ni sanälajzlu lagajc luj.

<sup>28</sup> Dxejc rájp Jesús lojni:

—O'n, laaca rudzu'lu diidx. Palga gunlu si'c, sajplu yälñabajnre.

<sup>29</sup> Per mastr xten leii, rlanjni nidedbiani ni'cni gunabdiidxni loj Jesús rájpní:

—¿Chuni'c najc resa'ä?

<sup>30</sup> Dxejc rájp Jesús lojni:

—Te beñ laadxnu birii guedx Jerusalén, sääni guedx Jericó. Dxejc lo nezyuj biricaj gaii gubaan, gulajnreni guiraa xhixtenni, nájli xhajnbi ni najcwni. Sas gudi-jnrenini, basa'nrenini ro'c, guxii cayäádx nugu'trenini.

<sup>31</sup> Gudejd te bixhojz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini.

<sup>32</sup> Gudejdza te levita, bejn ni rujnza dzuun neñ guidoo. Che bidzujñni cadro naga' bejnga, gudejdni stelaad, sä'tini. <sup>33</sup> Dxejcti te beñ Samaria, lañi sääni biaj, gudejdni nezyujga, bidzujñni cadro naga' bejnga. Che bahuiini lojni, balaslajznini. <sup>34</sup> Gubigni loj bejnga, basälñi se't nájza bin loj bejn ni nadxälguijdx, dxejc batejbnini te la' lajd. Dxejc bascuijbnini dejtzt lagajc xmanni, huinäniini cadro rudedlaareni yu', ro'c cuanäjnini. <sup>35</sup> Che bara yääl, gulääni tio'p meel badeedni lo baxhuaan yu'ga. Dxejc rájpní:



“Cuanälaa bejnre; palga gunijtrulu, siguixätini lojlu che guibi'ä.”

Sä'tini.

<sup>36</sup> Dxejc räjp Jesús lo mastr xten leii:

—¿Chu tej lo guidxon rebejnnga najc si'c sa' xten dade' ni biajb ladznaa gubaan?

<sup>37</sup> Dxejc räjpni loj Jesús:

—Ni balaslajz bejnnga.

Dxejc räjp Jesús lojni:

—Huij te sigajcza chayejnlu.

*Bidzujn* Jesús rolijz Mart näjza Marii

<sup>38</sup> Lałni huinuu xnezyujni, bidzujnni te guejdx. Ro'c bidxaagni te gunaa ni laa Mart ni huinänini rolizjni. <sup>39</sup> Yu' te bäjl Mart ni laa Marii, luxh laani gurejni cuä' ni' Jesús te cacuadiajnxi xtiidxni. <sup>40</sup> Mart cagusquejnxi cayujnni xhi gaureni. Sas gubigni loj Jesús, räjpni lojni:

—¿La dilu jiu rusanxteb bälä narä te xtebä cayunä remandaad? ¿Gojs lojni gacnäjni narä!

<sup>41</sup> Dxejc räjp Jesús lojni:

—Mart, Mart, cayuduxhlu yärsia', riulu xhidajl cos, <sup>42</sup> luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

## 11

*Rului Jesús xho guiniabni lo Dios*

(Mt. 6:9-15; 7:7-11)

<sup>1</sup> Te huält cabedx-canab Jesús loj Xtadni Dios, suga'ni te lajt. Che gulujx cabedx-canabni, gunii te xpejnpacni lojni, räjpni:

—Dad, baluii nurnu xho cuedx-guiniabnu lo Dios, si'c baluii Juan ni batiobnis rexpejnpacni.

<sup>2</sup> Dxejc räjp Jesús lojreni:

—Che cuedx-guiniabtu lo Dios, scree colnii:

Xtadnu ni yu' xhaguibaa,  
 suchä'p xpala'nlu, sujiääd xcäl\_rnibeelu.  
 Sugac si'ctisni rlajzlu gac lo guedxliuj si'cpac rajcni xh-  
 aguibaa.

<sup>3</sup> Guira dxej baniidx xcu'nnu si'ctis ni rquiinnuni.

<sup>4</sup> Basiäj\_l lajzlu redojl\_xtenu si'cni riäj\_l lajznu redojl\_ni  
 rujn rebejn\_loonu.

Na'c gusaanlu jiajbnu lo xcäl\_rnibee bendxab.

Bas\_laa nuurnu lo dojl\_.

<sup>5</sup> Dxejc räjpza Jesús lojreni:

—Paru tejtü yu' te xamiigwni, luxh guidzuj\_nni rolizjni  
 garol yääl, gäbni: “Xamigwä, banid\_xlaa cho\_n yät\_xtiil,  
<sup>6</sup> sa'csi bidzuj\_n te xamigwä rolizä ni bazaj biaj, luxh xhet  
 ra'pädi te gudedä xhi gauni.” <sup>7</sup> Xhixh sinii ni naga'  
 nen\_xyu'ni, gäbni: “Na'c riäd\_tie'chlu baca\_l loä. Niäu  
 rolä' luxh rexi'nä naga' cuä'ä, digacdi chästieä te gunid\_xä  
 xhi gunid\_xä lojlu.” <sup>8</sup> Rniliä lojtu, mase dini chastie te  
 gudeednini sa'csi najcni xamiigwni, sistieni, sudeedni  
 nani rquiintisni te na'cru gutie'chni baca\_lni. <sup>9</sup> Sigajcza  
 rniä lojtu, palga guiniabtu xhi guiniabtu, sica'tuni. Palga  
 chatiiltu xhi chatiiltu, sid\_xältuni. Palga chasejztu rolä',  
 suxhalreni rolä' lojtu. <sup>10</sup> Sa'csi chutis ni rniab, rca'ni nani  
 rniabni; chutis ni rguuil xhi cos, rdxäl\_nini; nani rusejz  
 rolä', suxhalzareni lojni.

<sup>11</sup> 'Paru tejtü ni najc dad, jääd te xi'ntu guiniabni te  
 yät\_xtiil lojtu, ¿la sudeedtu te guij, ä? O palga guiniabni  
 te bäjl, ¿la sudeedtu te bäl, ä? <sup>12</sup> O palga guiniabni te  
 tzutbejt, ¿la sudeedtu te naxejb, ä? <sup>13</sup> Palga la'tu, ni najc  
 bendojl\_, rajc rudeedtu cossa'c loj rexi'ntu, aticaxh Dios  
 ni yu' xhaguibaa sudeedni Sprit Dxan xtenu loj renani  
 rniabni lojni.

*Rucuaquijreni Jesús, rniireni rajpni yälrnibee xten beñdxab (Mt. 12:22-30; Mr. 3:19-27)*

<sup>14</sup> Gulää Jesús te beñdxabgop lastoo te bejn. Che birii beñdxabga lastoo bejnga, guslogajc canii bejnga, dxejc bidxeloduxh reben xhidaalga. <sup>15</sup> Dxejc yu' reni räjp:

—Niguiire rbää rebeñdxab con yälrnibee xten Beelzebú ni rnibee loj rebeñdxab.

<sup>16</sup> Sgaiireni rlanj guquiilrenini, ni'c canabreni gunni te seen ni siääd xhaguibaali. <sup>17</sup> Niluxh laani gucbeeni xhi xhigab cayujnreni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnä j te cuaani stee cuaaga, di gaçlaa sinij t gubierga lo guedxliuj. Palga te famil rdilnä j lagajc sa'ni, di gaçlaa sinitloj familga. <sup>18</sup> Palga guiliä' sa' rebeñdxab, ¿xho mood chanuu xcälrnibeereni? Dee rniä sa'csi la'tu rniitu narä rbää rebeñdxab con lagajc yälrnibee xten Beelzebú. <sup>19</sup> Palga si'c najcni, ¿chuni'c rudeed yälrnibee loj rexpejntu te rbääreni beñdxab? Lagajc laareni ruluii xhet laadi rujntu xhigab. <sup>20</sup> Palga narä rbää rebeñdxab con xcälrnibee Dios, ni'cni rului loj abidzujn xcälrnibee Dios lojtu.

<sup>21</sup> 'Cheni suga' te beñdaan, ca'ni guuib, canäjni rolizjni, rutliidi ruhualdi rexhixtenni. <sup>22</sup> Niluxh che jiääd stee ni nadipru lo beñdaanga, rudxagdijlnini, rujnni gaanni, dxejc rudzucajni xquiibni ni badeed yälbeñdaan lojni, dxejc sajc chanäni guiraa rexhixtenni. <sup>23</sup> Reni xhet yu'di xladä, rdxe'chreni loä. Ni di gutopnä j narä, rutie'chni.

<sup>24</sup> Räjpzani:

—Cheni rii te beñdxab neñ lastoo te bejn, ricansajni nez lo reyubijdz, caguiilni cadro gusilajzni. Che cad rdxäldini, rujnni xhigab, naani: “Guibisacä rolizä cadro biriä.” <sup>25</sup> Cheni guibi'ni, rdxälni lastoo bejnga si'c te yu' ni entis gulujx bilioobni, suchesa'cni. <sup>26</sup> Dxejcti rixiini sgajdz

ben<sub>dx</sub>ab ni rujnru latsiaj lojni. Dxejc riu'reni nen<sub>u</sub> lastoo bejn<sub>ga</sub>, dxejc nalasru ria'n bejn<sub>ga</sub> loj ni gujcni galoo.

*Chicbaa renani riu xtidx Dios*

<sup>27</sup> Lal ni canii Jesús rediidxre, te nane' ni yu' lo reben<sub>u</sub> xhidaalga dipli guniini, räjpni:

—¡Chicbaa nan ni biädnälu guedxliuj! Chicbaaza nani bas<sub>laa</sub> luj.

<sup>28</sup> Luxh laani räjpni:

—Xhet si'c di najcni; chicbaaru rebejn<sub>u</sub> ni rucua diajg xtidx Dios, ni ruzoobza xtiidxni.

*Reben<sub>u</sub> guijdx rniab te milagwr si'c te seen*

*(Mt. 12:38-42; Mr. 8:12)*

<sup>29</sup> Sanuutis cadojp rebejn<sub>u</sub> gabi Jesús, dxejc guslojni caniini, räjpni:

—Rebejn<sub>u</sub> ni yu' naj ben<sub>u</sub>guidxduxh<sub>re</sub>ni, rniabzareni te milaagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni. <sup>30</sup> Lagajc si'c ni gujc Jonás te seen loj rebejn<sub>u</sub> guedx Nínive, si'cza narä, Xi'n Dios ni gujc Niguii, gacä te seen lo rebejn<sub>u</sub> ni nabajn<sub>u</sub> naj. <sup>31</sup> Cheni guidzuj<sub>u</sub> dxej ni gac fis sistie te nane' ni gujc rein lo reyuj ni tre' ladbä<sub>gw</sub>, sucuaquijni rebejn<sub>u</sub> ni tre' guedxliuj naj sa'csi laani biriini zitduxh te bacua diajgpacni yäl<sub>n</sub>ajn xten Salomón. Ree suga' galäiitu tej ni sacduxhru lo Salomón, <sup>32</sup> luxh ditu chalilajz xtiidxni. Rebejn<sub>u</sub> ni guläjz guedx Nínive sisiunäj rebejn<sub>u</sub> ni nabajn<sub>u</sub> naj nen<sub>u</sub> redxej ni gac fis. Dxejc sucuaquijreni rebejn<sub>u</sub> ni nabajn<sub>u</sub> naj sa'csi laareni, che huinäli Jonás xtidx Dios lojreni, basiechlajzreni, basa'nreni xtoj<sub>l</sub>reni. Ni suga' lojtu naj sajcruni lo Jonás, niluxh ditu jiu xtiidxni.

*Ni rusanij xcäriejn bejn<sub>u</sub>*

*(Mt. 5:15; 6:22-23)*

<sup>33</sup> Räjpzani:

—Rut rucuaguujdi te bajl, te gusujnini te lat xhiga'tz, niclaza nen te caj. Susujni bajlga jiaa te rajc ruhuisa'c chutis ni riu' nen yu'. <sup>34</sup> Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacäy. <sup>35</sup> Gunatiro te di gac xpianijlu yäl\_nacäy. <sup>36</sup> Palga guideb xcäriejnlu yu' bianijtis, xheti te lajt nacäy, sajc fisa'clu guira'ti, si'c najc che rusaniy te bajl nen yu'.

*Rucuaquij Jesús refarisee näjza rebejn ni najn leii*

*(Mt. 23:1-36; Mr. 12:38-40; Lc. 20:45-47)*

<sup>37</sup> Che gulujx gunii Jesús, biädgajn te farisee Jesús chääni rolizni te chatajwni. Sä'tireni. Che biu' Jesús, gurejni lo mex. <sup>38</sup> Bidxeloj fariseega sa'csi dini niguiib naani si'cpac caj lo xleii Moisés gunreni te gaureni, sa'csi rujnreni xhigab si'c racnayareni lo Dios. <sup>39</sup> Dxejcti räjp Jesús lojni:

—La'tu ni najc refarisee, rguibtu nez dejtz te bas näjza te pla't, niluxh la'tu guidxa lastootu yäl\_gubaan näjza yällatsiaj. <sup>40</sup> ;Ben nadduxh! ;La ditu gacbee? Nani benchee dejtzni, bencheeza nen. <sup>41</sup> Colyajc nadolajz, colyacnäy rebejn con ni rniitu, dxejc guiraa recos sajc naya par la'tu.

<sup>42</sup> ;'Probe'zatu, ben farisee! Rudeedtu lo Dios tej lo tejga tzuu ni rajptu: rudeedtu bedzxtiil näjza ruud, näj guiraa recuane' ni rajptu lo le', niluxh ditu jiu xcäl\_guxhtis Dios näjza xcäl\_rinälajz Dios. Dee nanab guntu ganid, luxh na'cza gusaantu guntu ni alacayujntu par Dios.

<sup>43</sup> ;'Proobza la'tu reben farisee! Rchagljaztu rbejtu lo reyagxhil xten rebejn ni sajc nen reguidobäz; rchagljaztu saru rnii rebejn “xchan Dad” lojtu che rijtu lo guii.

<sup>44</sup> ;'Probe'zatu! La'tu najctu si'c rebaa ni di guzen, rsiaj rebejn yejc cadro naga'reni luxh direni gan.

<sup>45</sup> Dxejcti badzu' tej rebejn ni ruluii leii diidxre lojni, räjpni:

—Dad mastr, che rniilu rediidxre, rniyajlu nuurnu.

<sup>46</sup> Dxejc räjp Jesús lojreni:

—jProbe'za la'tu rebejn ni ruluii leii! Sa'csi rnibeetu gun rebejn recos naganduxh ni najc si'c te cargw naduxh ni di gacdi guu bejn. Luxh la'tu di rlajztu fal'tuni nicla con te bicuenabäztu.

<sup>47</sup> jProobzatu! Sa'csi runcheetu xpaä redade' ni gunii xtidx Dios galoo, luxh najctu rexajg renani bagu't redade'ga. <sup>48</sup> Ni'cni najnpactu xhi gusajcreni, rchagljaz-zatu redzuun ni bejn retoxtadgoldootu; si'cza gunnäjtu narä sa'csi laareni bagu'treni redade'ga, dxejc la'tu runcheetu xpaareni.

<sup>49</sup> Ni'cni gunii Dios, sa'csi yuduxh xcäl'najnni, räjpni: “Suxhalä reniguii ni guinii xtidxä näjza reapost, luxh sugu'treni gaiireni, susacsízareni sgaiireni.” <sup>50</sup> Loj rebejn ni nabajn naj siniab Dios gudeedreni cuent xcuent xtiejn guiraa redade' ni gunii xtidx Dios ni bagu'treni cheni guc-cheeli guedxliuj. <sup>51</sup> Guislojni xtiejn toAbel, näjza xtiejnli Zacarías ni bagu'treni galäii nez lodxan nen guidoro. Ni'cni rniä lojtu, siniab Dios cuent xten xcäl'gujt guiraareni loj rebejn ni nabajn naj.

<sup>52</sup> jProbe'za la'tu, rebejn ni ruluii leii! Sa'csi rniitu la'tistu rajptu yäl'najn, luxh di rlajztu chalilajztu xtidx Dios, dizatu gusaan chalilajz rebejn ni rlajz chalilajz xtidx Dios.

<sup>53</sup> Cheni räjp Jesús rediidxre, bidxe'ch rebejn ni ruluii leii näjza refarisee lojni. Dxejc guslojreni canabdiidxreni xhidalduxh diidx, <sup>54</sup> te cagula'tzreni don la sajc guiga'ni lo xhitis te diidx ni guiniini.

## 12

### *Jesús ruluu xcuent levaduur*

<sup>1</sup> La<sub>l</sub> ni caniini, bidojp xhidajl mi<sub>l</sub> bejn ro'c, calaro'li sa'reni. Dxejc gusloj canixгаа Jesús loj rexpejn<sub>pacni</sub>, räjpni lojreni:

— Colnati levaduur xten refarisee, rusgueereni rniitisreni xhidajl diidx luxh direni gunni. <sup>2</sup> Sa'csi xheti xhi niäu lojni ni di guxal lojni luxh xheti xhi naga'tz ni di jienloj. <sup>3</sup> Ni'cni guiraa ni guniitu lo nacäy, sienni lo bianij xten dxej. Luxh ni gunii xhiga'tztu ne<sub>n</sub> reyu' ni niäudzu'tz, sibedxa'renini rediidxga yejcli reyu'.

### *Chuni'c nanab guidxejbtu*

(Mt. 10:28-31)

<sup>4</sup> Räjpszani:

— Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni. <sup>5</sup> Guiniä lojtu chuni'c nanab guidxejbtu. Colguidxejb nani che abadzucajni yäl<sub>nabajn</sub> räjpni yäl<sub>rnibee</sub> gusal<sub>ni</sub> la'tu gabijl lo bajl ni cayejc par tejpas. Ni'csii colguidxejb.

<sup>6</sup> 'Anajntu sajc jio' gaii mane' tio'p melbäz, luxh di Dios jiällajz nicla tej remane'ga. <sup>7</sup> Rexquidxejctu abigab tebgajni. Na'c guidxejbtu; la'tu sajcrutu loj xhidajl remane'ga.

### *Reni riembee Jesús nez loj rebejn*

(Mt. 10:32-33; 12:32; 10:19-20)

<sup>8</sup> Räjpszani:

— Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguii sicäpä najcni xpenä nez loj rexangl Dios. <sup>9</sup> Luxh reni di guicäjp rililajzni xtidxä nez loj rebejn, sigajcza sunnäáni nez loj rexangl Dios xhaguibaa.

<sup>10</sup> 'Chutis ni guinii te didxnaj xcuentä, susiäjlajz Dios laani. Niluxh chutis ni guiniyaj Sprit Dxan xten Dios, di Dios gusiäjlajz xtojlni.

<sup>11</sup> 'Cheni chanäreni la'tu nez loj reben guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu, <sup>12</sup> sa'csi che guidzujn or ni guiniitu, Sprit Dxan xten Dios suluiini xhini'c guiniitu.

*Reyäl'nasa'c rusajb bejn nen dojl*

<sup>13</sup> Te niguii ni nadxaag rebejn xhidaalga räjpni loj Jesús:  
—Dad, Mastr, gojs lo betzä guniidxni gala' xhixtenä ni basa'n toxtadnu loonu.

<sup>14</sup> Dxejc räjp Jesús lojni:  
—Dade', ¿chuni'c gule narä gunä yälguxhtis o gacä abogaad lojlu, ä?

<sup>15</sup> Dxejc räjpsac Jesús lojreni:  
—Colnatiro, colgantzu' te di rlanjstistu ga'ptu yäl'nasa'ctis sa'csi xcäl'nabajn bejn dini gac yälrajptis xhidajl xhi cos.

<sup>16</sup> Dxejcti bij Jesús te cuent, räjpni lojreni:  
—Guyu' te ben rapduxh. Racduxh cose'ch lo rexcäjlni.  
<sup>17</sup> Dxejcti gusloj bejnni xhigab: “¿Xhocha gunä? Dina gapä cadre cucheä recose'ch.” <sup>18</sup> Sas bejnni xhigab: “Ananä xhini'c gunä. Gudzulä reyu' cadre rgucheä recose'ch, te gustiobä reyu'ga, te ro'c cucheä guiraa recose'ch näjza rexhixtenä.” <sup>19</sup> Dxejcti siniä lo lastoä: “Lastoä, agulucheelu xhidajl xhi cos, sajlni xhidajl ijz. Basilajz naj, gudajw, gu', bibalajz.” <sup>20</sup> Dxejc räjp Dios lojni: “¡Ben najd! Lagajc guxhijñre siniabä xaimlu. ¿Dxejca'? ¿Chu xca' guiraa recos ni gulucheelu?” <sup>21</sup> Si'c sisiajc guiraa rebejn ni rguiiltis xcäl'nasa'creni lo guedxliujre, niluxh xhet rajpdireni loj Dios.



*Rcanäj Dios rexi'nni**(Mt. 6:25-34)*

<sup>22</sup> Che gojł stera't, räjp Jesús loj rexpejn̄pacni:

—Ni'cni rniä lojtu, na'c rujntu xhigab xcuent xho guibajntu o xhini'c gautu te guibajntu, niclaza xcuent lajd ni gacwtu. <sup>23</sup> Yäl̄nabajnt̄ sajcruni lo yäl̄rajw; tiejxhni sajcruni lo lajd ni rajcw bejn̄. <sup>24</sup> ;Col̄huii rebaloo! Direni cue'c binij, dizareni gutojp cose'ch, dizareni ga'p nicla yu' nicla te cadre chuchee cose'ch, per rudeed Dios xhi rajwreni. ;La xhet sajcdirutu loj rebalooga, ä? <sup>25</sup> Luxh ;Chu tejt̄u palga runduxhni xhigab sajc tioobruni sgarol metr? <sup>26</sup> Palga di gacdi guntu nicla te cosbäz, ;xhicuent ru'tu yärsia' xcuent xhi stee cos?

<sup>27</sup> ;Col̄huii xho rga' reguino'ch! Direni gun dzuun, dizareni gun lajd lo dzujb, luxh rniä lojtu, nicla reii Salomón con guiraa xcäl̄nasa'cni, dini nisiuchee si'c rsi-uchee reguiiga. <sup>28</sup> Palga rusuchee Dios recuaan ni rga' lo niaa, ni rial nadxej, luxh guixee-huijdx, che agubijdzni, rejcn̄i lo däj, aticaxh Dios suniidx xhi gacw la'tu, ;bejn̄ nani guxii rililajz! <sup>29</sup> Ni'cni rniä na'c runtejt̄u xhigab xho quiiltu xhini'c gautu, xhini'cza yätu, na'c chutistu yärsia'. <sup>30</sup> Si'ctis rujn rebenguedxliuj guideb xtijpreni rguilreni rexhicosre. Niluxh xtadt̄u ni yu' xhaguibaa anajnni xhini'c rquiintu. <sup>31</sup> La'tu col̄quiiltis xcäl̄rnibee Dios, dxejcti laani suniidxzani guiraa recos ni rquiintu.

*Yäl̄nasa'c ni yu' xhaguibaa**(Mt. 6:19-21)*

<sup>32</sup> Räjpzani:

—La'tu ni najc rexilä'ä, na'c guidxejbtu, sa'csi rbaali lajz Dios, aguleni la'tu te la'tu guntu yäl̄guxhtis lo xcäl̄rnibeeni. <sup>33</sup> Col̄guto' xhixtentu, col̄gudeedni loj re-bejn̄ ni caquinduxhni, te si'c guntu te bols ni di jiuixh,

te chu yäl\_nasa'c neñni xhaguibaa cadre di gubaan jiu' niclaza xcabäj rexhicos. <sup>34</sup> Sa'csi cadre rajptu xcäl\_nasa'ctu, ro'cza yu' lastootu.

*Nanab susin̄tu*

<sup>35</sup> Räjpzani:

—¡Col̄susin̄! ¡Col̄hualguij rebajl! <sup>36</sup> Col̄yujn si'c remos ni cabäjz guibi' xlam̄reni ni sää te sa', te cheni guibi'ni guxhalgajcreni rolä'. <sup>37</sup> Chicbaa remos ni susin̄ che guibi' xlam̄reni. Rniliápac lojtu, lagajc xlam̄reni sajcwni xhajn̄ni sibe'cni rexmosni lo mex, dxejc lagajc laani sudeedni xhi gaureni. <sup>38</sup> Mase guidzujñni garol yääl, mase guidzujñni cäjyru, palga guidxäl̄ni arexmosni susin̄, ¡chicbaa remosga! <sup>39</sup> Col̄yacbeepac, paru gacbee baxhuaan xten yu' xhi or̄ guidzujñ gubaan rolizñi, dini gusaan guxhalreni rolizñi te cuanreni xhixtenni. <sup>40</sup> Näjza la'tu col̄susin̄, sa'csi or̄ ni ditu gun xhigab jiäd̄ni, sidzujñ Xi'n Dios ni gujc Niguui.

*Te mos guijdx*

(Mt. 24:45-51)

<sup>41</sup> Dxejc gunabdiidx Pedr lojni, räjpn̄i:

—Dad, ¿la lootisnu rujylu cuentre o la najcni par guiraa rebejn̄?

<sup>42</sup> Dxejc räjpn̄ Jesús lojreni:

—¿Chuni'c najc mos hueen, mos nasin̄, ni rusannäj xlam̄ni guiraa rexmosni te gudeedni xhi gaureni che gal̄ oor, ä? <sup>43</sup> Chicbaa mosga palga laaca cayujñni che guibi' xlam̄ni. <sup>44</sup> Rniliápac lojtu, lam̄ga sudeed guiraa rehxixtenni te xcanäj mosgani. <sup>45</sup> Per palga gun mosga xhigab neñ lastooni: “Saclaa guibi' xlam̄ä”, sas guislojni gusac-síni resamosni, gunaa sigajc niguui, dxejc guisloj gauni, yäni, soozni; <sup>46</sup> sibi' xlam̄ni te dxej ni xhet cabäjzdinini, or̄ ni dini gun xhigab guidzujñni. Dxejc sii sudeedni te

castigwro lojni, sutiäjlni te duu dejtzni dxejc sinibeeni jiini, guidxaagni rebejn ni di gusobdiajg diidx.

<sup>47</sup> Mosga ni najn xhini'c rlajz xlamni gac, luxh dini susin, dizani guzoob xtiidxni, sutiälduxhrene duu dejtzni.

<sup>48</sup> Niluxh mos ni di gan xhi rlajz xlamni gac, ni'c rujnni redzuun ni di xlamni guidxagljajz gac, guxiiru castiigw gacni. Reni rca' xhidajl, xhidajlza riäjlgudeedreni; loj reni rca' yälrnibeduxh, xhiroobza siniabni lojni.

*Rlia' Jesús bejn* lo sa'ni

(Mt. 10:34-36)

<sup>49</sup> Räjpxa Jesús:

—Narä biälä te gucuaguüä guedxliujre; jmalaii alagusloj cayejcni! <sup>50</sup> Niluxh nanab tedä te yälrobnis ni säloj te trabajwduxh, ni'c cayuduxhä yärsia' cheni chale'lini. <sup>51</sup> ;La rujntu xhigab biälä te jiädnää yälrbexi loj guedxliuj, ä? Rniä lojtu, dini gac si'c. Alga biälä te guilia'ä bejn lo sa'reni. <sup>52</sup> Silia' sa' te famil; loj gaiireni, sidxe'ch chonreni loj tio'preni, luxh tio'preni sidxe'chza lo chonreni. <sup>53</sup> Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nan-suegr sidxe'chni lo xculijzni, luxh gulijzga sidxe'ch lo xnansuegrni.

*Reseen xten retieemp*

(Mt. 16:1-4; Mr. 8:11-13)

<sup>54</sup> Caniiza Jesús lo reben xhidajlga, räjpxi:

—Cheni rhuiitu räjs reza nez lad jät, rniitu: “Siajb nisguij.” Luxh riajbni. <sup>55</sup> Che rbi' bej nez lad danbägw, rniitu: “Sacnalaa nadxej”, luxh si'c rajcni. <sup>56</sup> ;Bejn ni rus-guee! La'tu racbeetu xhi säloj reseem ni rien lo guedxliuj näjza xhaguibaa, ;xhicuent ditu gan xhi säloj retieemp ni dxunnu naj, ä?

*Basiäj* diidx con rebejn ni rdxe'ch lojlu

(Mt. 5:25-26)

<sup>57</sup> Räjpzani:

—¿Xhicuent ditu quiil lagajc la'tu xhini'c najc hueen, xhini'c najc laaca te guntuni? <sup>58</sup> Sa'csi palga yu' chuni'c chale'c xquejlu lo guxhtis, lajni sanäni luj ro jusgaad, basiäj diidx con laani lo nejz, te na'c chanäni luj lo reguxhtis, sa'csi dxejc reguxhtis suteedreni luj lo reguixhajg te gusaureni luj neñ latzguiib. <sup>59</sup> Luxh rniä lojlu, dilu guirii ro'c hasta gusa'lu quiixlu guiraa lojreni.

## 13

*Colgusiejch* lajztu te di guettu

<sup>1</sup> Lagajc dxejc, gubig gaii reni huisa'nreni diidx loj Jesús xcuent gaii beñ Galilee ni bagu't Pila't neñ guidoo, bagu'chni xtiejnreni con xtiejn reman ni siädnäreni si'c gojn lo Dios. <sup>2</sup> Sas räjz Jesús lojreni:

—¿La rujntu xhigab si'c gusajc rebeñ Galileega sa'csi najcrureni bendojl lo rebejn lajdxreni? <sup>3</sup> Narä rniä, dini gac si'c. Palga di'tu gusiechlajz sigajcza sejt guiragajctu. <sup>4</sup> O xcuent guitzunchon rebejn nani gujt che gubixh te or ni laa Siloé yejcreni, ¿La rujntu xhigab najcrureni bendojl lo rebejn ni rbäjz guedx Jerusalén, ä? <sup>5</sup> Narä rniä, dini gac si'c. Palga di'tu gusiechlajz, sigajcza sejt guiragajctu.

*Xcuent te yag iigw*

<sup>6</sup> Dxejcti gusloj bij Jesús te cuent ni ruluiini lojreni, räjzni:

—Te dade' gojp te yagiigw ni basujni lo xyujni. Sas huihuiini don la caj ninejxh lojni. Luxh xhet ninejxhdi bidxälni. <sup>7</sup> Dxejc räjzni loj bejn ni canäj xyujni, agujc chon ijz siädtilä ninejxh lo yajgre, luxh xhetini. Batin yajgre. ¡Xlia'si sujni lo yuj! <sup>8</sup> Luxh xmosni räjz lojni: “Dad,

basaanni steb ijz, guslaá yuj ni'ni, gusälä abonni. <sup>9</sup> Palga xcaj ninejxh lojni steb ijz, laaca, palga dini xcaj, dxejc guitinnuni.”

*Rusiajc Jesús te gunaa*

<sup>10</sup> Te dxej ni rusilajz rexpejn Israel caguluii Jesús neñ te guidobáz. <sup>11</sup> Ro'c suga' te nane' ni agujc tzunbichon ijz racxhuuni. Benđxab caguscoodni, niluxh di gacdi suliini. <sup>12</sup> Che bahuii Jesús lojni, gurejdxnini, dxejc räjp Jesús lojni:

—Gunaa, abasaan yälgujdxga luj.

<sup>13</sup> Che basujni ñaani yejcní, lagajc dxejc gujc gusulii nane'ga. Dxejc guslojni calä'pni xpala'n Dios. <sup>14</sup> Luxh dade' ni rnibee guidobáz bidxe'chni sa'csi basiajc Jesús nane'ga che najcni dxej ni rusilajzreni, ni'c gusloj cayäjpni loj rebejn:

—Xho'p dxej sajc gun bejn dzuun; neñ redxejga sajc jiäádtu te jiajctu, per na'c jiäádtu dxej ni rusilajz rexpejn Israel.

<sup>15</sup> Dxejc badzu' Jesús diidxre, räjpni lojni:

—¡Ben rusguee! ¿La di chutis tejtú guxhec xconni o xpurni te chanänini yäni nis, mase najcni dxej ni rusilajz bejn, ä? <sup>16</sup> Luxh nane're najc te xagdoo toAbram, nani numbee Dios, ni agujc tzunbichon ijz baliib benđxabni, ¿la digacdi guixecni lo xcälgujdxni mase najcni dxej ni rusilajz bejn, ä?

<sup>17</sup> Che gunii Jesús rediidxre, bianxtujy rebejn ni rdxe'ch loj Jesús, luxh reben xhidaalga cabalazduxhreni sa'csi cayujn Dios redzunro nez lojreni.

*Xcuent bedz muxhtas*  
(Mt. 13:31-32; Mr. 4:30-32)

<sup>18</sup> Ni'cni räjp Jesús lojreni:

—¿Xhocha najc xcälrnibee Dios? ¿Xhicha cojn guiniä najcni tebloj? <sup>19</sup> Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riääd remane' ni rutajt siädynchee xpitiääzni loj rexhajcwni.

*Xcuent cojb ni rusaguij*

*(Mt. 13:33)*

<sup>20</sup> Guniiza Jesús stehuält te gacbeereni xho guire'ch rextidx Dios. Räjpmi lojreni:

—¿Xhicha cojn guntebloä xcälrnibee Dios? <sup>21</sup> Najcni si'c levaduur ni rugu'ch te gunaa lo choñ mediid arin, luxh rusaguijni guiraa cojbga.

*Dää rolä' cadre jiu'ni xhaguibaa*

*(Mt. 7:13-14, 21-23)*

<sup>22</sup> Huinuu Jesús xnejzni sääni guedx Jerusalén. Lañi sadejdni reguejdx näjza rerench caguluiini rebejn.

<sup>23</sup> Dxejc gunabdiidx te bejn lojni, räjpmi:

—Dad, ¿la guxii najc rebejn ni cañaa loj rextoljreni, ä?

Dxejc räjpmi lojreni:

<sup>24</sup> —Dää rolä' cadre jiu' bejn xhaguibaa. Ni'cni coltip lajztu te jiu'tu ro'c, sa'csi xhidajl bejn rlaiz jiu'reni ro'c, niluxh direni gun gaan. <sup>25</sup> Cheni abasäu baxhuaan xten yu' rolä', dxejc la'tu ni suga' detz yu' guisloj gusejstu rolä', guiniitu: “Dad, baxhal-laa rolä’”, dxejc laani sudzu'ni diidx, siniini: “Dina ganä caro siäädte.” <sup>26</sup> Dxejc guislojtu guiniitu: “Bidxunnäanu, bidaunäanu, bidunnäanu luj, baseedlu nuurnu lo xnezyuunu.” <sup>27</sup> Dxejc siniini lojtu: “Rniliä lojtu, dipacnä gumbeä la'tu. Coljij guiraatu, beñlatsiaj.” <sup>28</sup> Dxejcti sonduxhtu, chubejli läjyту che fiitu abiu' toAbram, con toIsaac, con toJacoob, näjza guiraa redade' ni gunii xtidx Dios, suga'reni lo xcälrnibee Dios xhaguibaa, luxh la'tu di gacdi jiu'tu. <sup>29</sup> Dxejga sidzujn

xhidajl benzijt ni siääd ladjiaa, ladjiät, ladbäygw, näjza ladbee, te jiu'reni lo xcälrnibee Dios xhaguibaa, ro'c sibejzareni lo mex. <sup>30</sup> Luxh yu' reni rujntu xhigab guxii sajcreni naj, sacduxhrene dxejc. Yu'za reni rchalotu sacduxh naj, xhet sajcdireni dxejc.

*Jesús biin xcuent guedx Jerusalén*  
(Mt. 23:37-39)

<sup>31</sup> Lagajc dxejga, bidzujn gatii refarisee, räjpreni lojni:

—Huij, biunejz ree, sa'csi Herodes rlajz ju'tlu.

<sup>32</sup> Dxejc laani badzu'ni diidxre lojreni, räjpni:

—Gojz lo bäjzga, beñ rusguee: “¡Bahuii! cabää rebendxab lastoo rebejn, cagusiacä rebejn ni racx-huu nadxey näjza guixee, luxh huijdxli guluxä xtzunä.”

<sup>33</sup> Niluxh mase si'c gacni nanab chanuä xnezyuä nadxey näjza guixee, huijdx, sa'csi di gacdi guet te dade' ni rniitxidx Dios ste'ca guejdx, guejdx tis Jerusalén sajc guetni.

<sup>34</sup> ¡Probe'tu, la'tu beñ Jerusalén! Rugu'ttu redade' ni riädniitxidx Dios lojtu, rucuaazatu guij yejc rebejn ni ruxhal Dios lojtu. Balti huält rlazä nuchagä sa'tu si'c ruchagsa' te guidco'c rexquidbäzni lajd xhigani, niluxh ditu nicäjp. <sup>35</sup> Bahuii xho bianxteb xquidootu. Ni'cni arnixgää lojtu, dirutu fii loä cheni guidzujnli dxej ni guiniitu loä: “Chicbaa ni siääd xcuent Dios.”

## 14

*Rusiajc Jesús te bejn ni guidxa guij*

<sup>1</sup> Che gojl te dxej ni rusilajz rexpejn Israel, huitajw Jesús rolizj tej ni rnibee loj refarisee. Cagula'tz gatii refarisee, guidon xhini'c gun Jesús, <sup>2</sup> sa'csi nez loj Jesús suga' te dade' ni guidxa guij tiejxhni. <sup>3</sup> Dxejc gunabdiidx Jesús lo rebejn ni ruluii leii näjza lo refarisee, räjpni lojreni:

—¿La sajc gusiajcnì te beṇracxhuu dxej ni rusilajz bejṇ o la di gacdini?

<sup>4</sup> Per laareni dxitis suga'reni, niäutis ro'reni. Dxejc cua' Jesús beṇracxhuuga, basiajcnini, gunibeezani biunejzni.

<sup>5</sup> Dxejc räjpni loj reфарisee:

—Chu la'tu ni rajp te bur o te gon, palga jiajbni neṇ te bisie, ¿la ditu chalägajcnì mase najcnì dxej ni rusilajz bejṇ, ä?

<sup>6</sup> Dxejc di niajcnì nudzu'reni diidx lojni.

*Reni bidon* cháä sa'

<sup>7</sup> Cheni bahuii Jesús xho rchaglaiz rebejṇ rbereni latsa'c te cuereni cuä' rebejṇro, bijni te cuent ni ruluii lojreni, räjpni:

<sup>8</sup> —Cheni guidonṭu cháätu te sa', na'c guntu te cuetu cuä' rebeṇro, te di guidzujṇ te beṇroru lojlu, <sup>9</sup> dxejc jiääd bejṇ ni cayujṇ lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li. <sup>10</sup> Maazru hueen, cheni guidonṭu cháälu te sa', huicue lo mex ni zuj lo le' te che guidzujṇ bejṇ ni cayujṇ lanij, naani lojlu: “Xamigwä, gudaä cuelu neṇ yu' cadro rbej rebeṇro.” Si'c sä'p xpala'nlu nez loj guiraa rebejṇ ni sobganäjlu lo mex.

<sup>11</sup> Sa'csi ni rlajz chá'p xpala'nni nez loj rebejṇ, sianxtujyni nez lojreni. Luxh bejṇ ni najc nadolajz, sä'p xpala'nni nez loj guiraa rebejṇ.

<sup>12</sup> Räjpzani loj bejṇ ni cagudeed xhi gaureni:

—Cheni gunlu te lanij o gutedlu bejṇ lo xmexlu, na'c cuedxtislu reexamigwlu con rebejtzlu, con resa'lu, niclaza rexpisṇlu ni najc ri'cw, sa'csi laareni sigajcza sibejdxreni luj che gunreni te lanij, luxh si'c agudijxreni ni badeedlu lojreni. <sup>13</sup> Che gunlu te lanij, alga gurejdx rebenṇroob, rebenṇroj, näjza rebenṇlotiä'p, <sup>14</sup> dxejcti sibaa lajzlu sa'csi laareni di gacdi gunidxsacreni ni badeedlu lojreni; luxh



si'c siguixsac Dios ni bejnlu che gal dxej ni guibansac rebejn loj rebengut.

*Xcuent te laniro*

<sup>15</sup> Che biejn diajg tej reni sobga' lo mex, räjpni loj Jesús: —Chicbaa rebejn ni gau yätxtiil cadro rnibee Dios.

<sup>16</sup> Dxejc räjp Jesús lojni:

—Guyu' te dade' ni bejn te laniro rolijzni. Gunibeeni bidon xhidajl bejn te jäätaunäjrenini. <sup>17</sup> Che bidzujn or ni gaureni, baxhał dade'ga te xmosni chatejdxni rebejn ni abidon, räjpni lojreni: “Colchäj, asuchee lo mex.” <sup>18</sup> Dxejc guiragajcreni gusloj cayäjb di gacdi chääreni. Tejni räjp: “Entis gusiä te la' yuj, luxh naj nanab chahuiä xho najcni. Goslaa di gacdi jäälä.” <sup>19</sup> Steeni räjp: “Gusiä gaii nejs gon, luxh nanab chahuiä xho rujnreni dzuun. Goslaa di gacdi jäälä.” <sup>20</sup> Steeni räjp: “Entis bachnaä ni'cni di gacdi jäälä.” <sup>21</sup> Che gubi' mosga, badeedni diidx lo xlamni xhi räjp rebejnğa lojni. Dxejc bidxechduxh lamga, räjpni lo xmosni: “Basquejn huij ladnezyuj näjza ladnezyuj däa, gudanä rebenproob, rebencoj, rebenlotiä'p, rebennatiujnc.” <sup>22</sup> Si'c bejn mosga. Che gubi'ni räjpni lo xlamni: “Dad, abenä si'c ni gunibeelu, luxh lajtru yagxhiil.” <sup>23</sup> Dxejc räjp lamga lo xmosni: “Huij lo renezyuj ni sii loj reguedxziyt, gudanäj rebejn ni guidxaaglu nejzga, te cha bejn rolizä. <sup>24</sup> Rniliä lojtu, nicla tej reni bidon ganid di gau xhuej nani benä.”

*Ni nanab gunni te chanajlni Crist*

<sup>25</sup> Lał sasaj Jesús lo nejz, xhidalduxh bejn sanajlni. Dxejc gubiréni, gusloj cayäjpni lojreni:

<sup>26</sup> —Palga yu' chu tej ni jääd loä, ni di cuälaz xtdani, xnanni, chäälni, rexi'nni, rebejtzni, näjza rebisiajnni, nägajcza xcäl nabajnni, di gacdi gacni te rexpenä. <sup>27</sup> Palga yu' chutis tej ni di rlanj tedni trabajw te jäädnajlni narä, di gacdi gacni te rexpenäpac. <sup>28</sup> Chu tejtü ni rlanj gun

te yuro, ni di gunxgaa xhigab lacti meel chanä yu'ga, te guidon la sajc guluuxnini. <sup>29</sup> Didi cheni abejnni recimient, di gacdi guluuxnini, dxejc guiraa reni fii lojni suxhiznäjrenini, <sup>30</sup> säjpreni: “¡Bahuilaare! Bejnre gusloj bencheeni te yu' per di niajcdi nuluuxnini.” <sup>31</sup> ¿Chu te reii ni gun xhigab chachagdijl̄ni stee reii, ni di gunxgaa xhigab don laa sajc gunni gaan con tzuu miḷ soldaad loj stee reii ni siääd con gajl̄ miḷ soldaad, ä? <sup>32</sup> Palga di gacdi gucuanäjnini, che gacbeeni ziftli siääd stee reiiga, suxhalni te xpejn̄ni chanab yäl̄rbedxi lojni. <sup>33</sup> Ni'cni palga chutis tejt̄u di gusaan rehxixt̄enni te jiädnajl̄ni narä, di gacdi gacni te rexpenäpac.

*Che diru sejd gac nadzujy*

*(Mt. 5:13; Mr. 9:50)*

<sup>34</sup> Räjpzani:

—Huen najc sejd. Per cheni diruni gac nadzujy, ¿xho gacru gac nadzujy? <sup>35</sup> Xhetru sajcdini, nicla te chääni loj yuj, niclaza te chääni lo abon̄. Gusältis bejn̄ sejdḡa. Reni rlanjz gucudiajḡ xtidxä, sucuadiagsa'creni.

## 15

*Xcuent xiil ni gunijt*

*(Mt. 18:10-14)*

<sup>1</sup> Guiraa reni rusquijx impuest näjza rebendoj̄l̄ cabigreni loj Jesús, te cuadiajgreni rextiidxni. <sup>2</sup> Refarisee näjza rebejn̄ ni ruluii leii gusloj camojmreni, räjpreni:

—Bejn̄re rusaan rbig rebendoj̄l̄ lojni, luxh raunäjzanireni.

<sup>3</sup> Dxejcti bij Jesús cuent ni ruluiire lojreni, räjpreni:

<sup>4</sup> —Chutejt̄u ni rajp tegayuu xiil, palga chanijtni tejni, ¿la dini gusaan stapbitzuubigaa rexiilni lo niaa te chatiilni xile' ni gunijt, hasta guidxällinini, ä? <sup>5</sup> Luxh che guidxällinini sibaduxh lajzni, dxejc sutzuubnini ro xhajcwni. <sup>6</sup> Che

guidzujñni rolijzni sutojpni rexamiigwni nájza rexpisiñni te gábni lojreni: “Colguibalaznáj narä sa'csi abidxälä xile' ni gunijt.” <sup>7</sup> Rniä lojtu, sigajcza su'ru yälrbalajz xhaguibaa xcuent tejtis bejn ni guibig lo Dios ni gusiechlajz xtojlni quela xcuent tapbitzubigaa bejn ni di guiquiin gusiechlazreni xtojlni.

*Xcuent meel ni gunijt*

<sup>8</sup> Räjpzani:

—Sigajcza te gunaa ni rajp tzuu meel, palga chasälñi tejni, ¿la dini gusanij te bajl te guloobni nen yu' hasta guidxälñini, ä? <sup>9</sup> Luxh che guidxälñini, sutojpni rexamiigwni nájza rexpisiñni, säjpni lojreni: “Colguibalaznáj narä sa'csi abidxälä meel ni gunijt.” <sup>10</sup> Rniäza lojtu, sigajcza sibalajz rexangl Dios xhaguibaa xcuent te bendojl ni rusiechlajzni.

*Te bejn ni baxun te xi'nni*

<sup>11</sup> Dxejc bijza Jesús cuentre lojreni:

—Guyu' te dade' ni yu' tio'p xingaanni. <sup>12</sup> Dxejc xi'nni ni najc huinruga, räjpni lo xtadni: “Dad, baniidx yälñasa'c nani nungäjlxca'a.” Sas badeed xtadni xerensni. <sup>13</sup> Di niacclaa, balsi dxej gudejd, chela bato' xihuinni guiraa xhixtenni, dxejc sääni, bidzujñni te guedxzijt. Ro'c banijtni guiraa xmeelni lo recosguijdx. <sup>14</sup> Che abanijtni guiraa xhixtenni, biääd te gubinduxh guedxzijtga cadre yu'ni. Sas guslojzani calaanni. <sup>15</sup> Dxejc huitiilni dzuun lo te benguejdxga. Baxhal bejngani te huigajpni cuch lo xyuj dade'ga. <sup>16</sup> Luxh calanduxhni bejnñi xhigab malaii sajç gauni recuaan ni najc si'c lia ni cayajw recuch, niluxh rut badeeddi xhi niajwni. <sup>17</sup> Lał ni cadejdni trabajwga, bianij xcäriejñni bejnñi xhigab, naani: “Balti rexmos xtadä rausa'c, ria'nru xhi gaureni. Luxh narä ree calanduxhä, ameerli guetä. <sup>18</sup> Guibi'älis ladxä, rolijz xtadä, gäpä lojni,

Dad, banitā lo Dios nājza lojlu. <sup>19</sup> Diru nungājļ guirilaā xi'nlu. Cua' narā si'c te xmoslu.” <sup>20</sup> Dxejc gunazgajcni nejz te gubi'ni rolizj xtadni.

'Cheni zijtru siāādni, bahuii xtadni lojni. Dxejc balasla-jznini, ruxun<sub>l</sub>ini, huichaglojnini, sas gudāāznini, bacha-gro'ni lojni. <sup>21</sup> Dxejc rāj̄p xi'nni lojni: “Dad, abanitā lo Dios nājza lojlu. Diru nungājļ guirilaā xi'nlu.” <sup>22</sup> Per rāj̄p xtadni loj rexmosni: “Coltanā te ladsa'c, colshuajcwnini xi'nā, colgusāl te niil bicuenaani, xcajza te gura'ch ni'ni. <sup>23</sup> Coltanā te biser̄ ni guro' colgu'tni. ĵColsqejn te guidaunu, jiennu te lanij! <sup>24</sup> Sa'csi xi'nāre abenā xhigab gujt̄ni, luxh naj si'cni agubansacni, gunijtni niluxh naj abidxājlni.” Dxejc goslojreni bejnreni te lanij.

<sup>25</sup> 'La<sub>l</sub> ni cayajc dee, xingangalooni cayujn dzuun lo niaa. Che gubi'ni, siāddzūngajxhni rolizni, che biejn diajgni cayel̄ rolizni, caguya'zareni. <sup>26</sup> Dxejcti gurejdxni te mos, gunabdiidxni lojni xhi cayajc royu'. <sup>27</sup> Dxejc rāj̄p mosga lojni: “Gubisac bejtzlu, luxh xtadlu gunibee gujt̄ te biser̄ guro' te gac lanij sa'csi nadaanni gubi'ni.” <sup>28</sup> Dxejc bidxe'ch xingangalooni. Naadtini jiu'ni rolizni. Che gucbee xtadni naadtini jiu'ni, bihuii xtadnini te gunabni jiu'gani. <sup>29</sup> Dxejc rāj̄pni lo xtadni: “ĵBahuilaare! Agujc xchej cayunā dzuun lojlu, luxh rusobdiagā guiraa xtiidxlu, per nicla tej huālt̄ gajdlu guniidx nicla te dxibe' loā te gunā te lanij con rexamigwā. <sup>30</sup> Luxh naj ni abidzuj̄n xi'n lure, ni banij̄t̄ xmeellu con regunadxab, xhoxh bagu'tlu te biser̄ guro' te cayujnlu xlanijni.” <sup>31</sup> Dxejc rāj̄p xtadni lojni: “Xi'nā, sugagajclu loā, luxh guiraa ni rapā najc xtenlu. <sup>32</sup> Niluxh naj riāj̄lpac jiennu lanij, guibalaaznu, sa'csi bejtzlu ni benā xhigab agujt̄, agubi'ni naj, najcni si'cni gubansacni; gunijtni, naj abidxājlni.”

## 16

*Xcuent te ni rnibee loj remos*

<sup>1</sup> Dxejc cayujyza Jesús stee cuent loj rexpejn<sub>pacni</sub>, räj<sub>pni</sub>:

—Guyu' te ben<sub>rajp</sub> ni guyu' lojni te ni rnibee loj rexmosni. Dxejc biääd reni badeedreni diidx lojni, räj<sub>preni</sub>: “Bejn ni rnibee loj rexmoslu xhetlaadi cayuj<sub>nni</sub> cagunij<sub>tni</sub> rehxix<sub>tenlu</sub>.” <sup>2</sup> Dxej<sub>tci</sub> gurej<sub>dx</sub> xlam<sub>nini</sub>, räj<sub>pni</sub> lojni: “¿Xhi dee ni riejn diagä caniireni xcuentlu, ä? Naj guniidxlu loä cuent xte xtzuunlu, sa'csi dirulu chanuu guinibeelu lo rexmosä.” <sup>3</sup> Dxejc bejn<sub>ga</sub> bejn xhigab: “¿Xhichani'c gunä naj ni gudzucaj xlam<sub>ä</sub> dzuun loä? Dina ga'pä yäl<sub>rstijp</sub> te gunä dzuun lo niaa, luxh situj<sub>yä</sub> chanabä gojn. <sup>4</sup> Ananä xhini'c gunä te che dirunä ga'pä dzuun, sibej<sub>dx</sub> rexamigwä narä rolijzreni.” <sup>5</sup> Dxej<sub>tci</sub> gurej<sub>dxni</sub> tebgajreni rebejn ni nazäab lo xlam<sub>ni</sub>, dxejc räj<sub>pni</sub> loj ni bidzux<sub>gaa</sub>: “¿Lac nazääblu lo xlam<sub>ä</sub>?” <sup>6</sup> Dxejc räj<sub>pni</sub>: “Nazäbä si'c te gayuu baril se't.” Dxejc räj<sub>pni</sub> lojni: “Basquejn, cua' gui<sub>jtze</sub>, bacuaa tiubitzuutis baril nazääblu lojni.” <sup>7</sup> Dxejc gunabdiidxni loj steeni, räj<sub>pni</sub>: “¿Luj a'? ¿Lac nazääblu lo xlam<sub>ä</sub>?” Dxejc räj<sub>pni</sub> lojni: “Te gayuu dxim<sub>ro</sub> triuu.” Dxejc räj<sub>pzani</sub>: “Aree xqui<sub>jtzlu</sub>; bacuaa tajtis dxim<sub>ro</sub>.” <sup>8</sup> Bidxeloj xlam<sub>ni</sub>, gulä'pni xpala'n benguij<sub>dxga</sub> ni gunibee sa'csi bisin<sub>ni</sub> bejn<sub>ni</sub> recosga. Dxejc räj<sub>pza</sub> Jesús, rebejn ni di gumbee xtidx Dios nadxäl<sub>la</sub>-jzreni lo rextzuunreni con sa'reni loj rebejn ni arumbee xtidx Dios.

<sup>9</sup> Rniä lojtu, colquuil rexamiigwtu con reyäl<sub>nasa</sub>'c ni räj<sub>ptu</sub> loj guedxliujre, te che abaraj xhix<sub>tentu</sub>, sica' Diostu xhaguibaa cadre yu' rolijz<sub>tu</sub> par tejpas.

<sup>10</sup> Renani runsa'c dzuun lo te dzunbäz, saj<sub>cza</sub> gunsa'cni dzuun lo te dzunro, luxh reni di gacdi gunsa'c dzuun lo te dzunbäz, di gac<sub>diza</sub> gunsa'ceni dzuun lo te dzunro.

<sup>11</sup> Ni'cni palga xhetlaadi cuarälñäjtü reyälñasa'c xten guedxliuj, ꞑxho guniidx Dios reyälñasa'c xtenni lojtü!  
<sup>12</sup> Palga xhetlaadi cuarälñäjtü xhixten bejn, ꞑchu guniidx lojtü ni gac xtenpactu, ä?

<sup>13</sup> 'Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzni o susobdiajgpacni xtidx tejni, sibälazni steeni. Di gacdi gun bejn xtzun Dios laꞑ ni sanälajztisni xcälñasa'cni.

<sup>14</sup> Mbaj naj, refarisee, sa'csi rchaglazduxhrenei meel, cacuadiagdzu'tzreni xtiidxni, dxejc caguxhisnäjreni Jesús. <sup>15</sup> Dxejcti räjp Jesús lojreni:

—La'tu najctu bejn ni ruhuii rebejn lojtü, naareni bensacduxhtu, niluxh acanajn Dios xhi xhigab rujntu neñ lastootu. Sa'csi guiraa ni rchalojtü najc yälñasacduxh, guiraa ni'c rbixhlajz Diosni.

*Xleii Moisés con xcälñabee Dios*

<sup>16</sup> Räjpzani:

—Dxejli ni biäd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biäd Juan gusloj rsule' didxsa'c xcuent xcälñabee Dios, ni'cni xhidajl bejn cagusutijp lajzni te jiu'reni loj yälñabeeega.

<sup>17</sup> 'Per guyasiru nitloj xhaguibaa näjza guedxliuj quela di jialoj guiralii rediidx ni bacuaa Moisés; nicla tej diidxga di nitloj.

*Rului Jesús xcuent ru'ro'n sa' bejn*

*(Mt. 19:1-12; Mr. 10:1-12)*

<sup>18</sup> Räjpzani:

—Palga gu'ro'n te bejn chäälñi, dxejc guchñaani stee gunaa, rujnni dojl, luxh nani ruchña te gunaa ni abaro'n chäälñini, niguiiga rujnzani dojl.

*Te benrajp näjza Lázaro*

<sup>19</sup> Räjpzani:

## San Lucas 16:20 71 San Lucas 16:31

—Guyu' te benrajp ni rchaglajz rajcwni ganax relad-sacduxh, luxh guixe-guixee rujnni laniro. <sup>20</sup> Guyu'za te benproob ni laa Lázaro ni rniab gojn, ricueni ro xlä' benrajpga, yu' guejdx ni rgaadz tiejxhni. <sup>21</sup> Rlajzni maläii xho gunni gauni nani rtejb loj xmex benrajpga, luxh direni gusaan. Dxejc rebä'cw siääd rilejp loj reguejdx ni rgaadz ni guidxa tiejxhni. <sup>22</sup> Guyu'ti te dxej gujt benproobga, biädläs rexangl Dios xaimni, huiärenini cadro yu' Abram xhaguibaa. Dxejcti näjza benrajpga gujt, huicua'tztireni. <sup>23</sup> Che yu'ni gabijl cadro rij guiraa re-bendojl, ro'c cadejdni trabajwduxh. Dxejcti guläsni lojni, bahuiini zitduxh cadro suganäj Abram Lázaro. <sup>24</sup> Dxejcti guredxaduxh benrajpga, räjpni lo Abram: “jXtadä Abram! Balazlajz narä, baxhal Lázaro guhuajdxni yejc bicueñaani nis te gusiälyujni ludxä, sa'csi ree cadedä trabajwduxh lo guiboo.” <sup>25</sup> Luxh räjp Abram lojni: “Xi'nä, basaa lajzlu che gubajnl lo guedxliuj gojplu guira'ti xhixtenlu, luxh sigajcza Lázaro gudejdni trabajwduxh. Per naj ree casilajzni, naj luj cadejdlu trabajwduxh. <sup>26</sup> Luxh di gacdi jiääd Lázaro ro'c, sa'csi yu' te baladuxh ni rlia' sa'nu, te mase rlajz bejn guirii ree te tedreni lojlu ro'c, di gacdini. Di gacdiza ted reni yu' ro'c te jiädreni loonu.” <sup>27</sup> Dxejcti räjp benrajpga lojni: “Rniabduxhä lojlu, xtadä, baxhalä Lázaro chääni rolizj xtadä, <sup>28</sup> sa'csi ro'c yu' gaii betzä, te chalijdxni laareni, te gusiechlajzreni, te di näjza laareni jiädreni ree cadro rdejd bejn trabajwduxh.” <sup>29</sup> Dxejc räjp Abram lojni: “Arajpreni guijt cadro caj xleii Moisés näjza xtidx redade' ni gunii xtidx Dios, sugusobdiajgreni rediidxga.” <sup>30</sup> Luxh benrajpga badzu' diidxre, räjpni lojni: “Gulii dad Abram, per palga chäs te bejn loj rebengut, chani lojreni, dxejc sii pet susiechlajzreni.” <sup>31</sup> Dxejc räjp Abram lojni: “Palga direni gusobdiajg xtidx to Moisés näjza xtidx redade' ni gunii xtidx Dios, dizareni chalilajz

xtidx te bejn ni guibaṅsac loj rebengut.”

## 17

*Riesgw jiajbni lo dojl*

(Mt. 18:6-7, 21-22; Mr. 9:42)

<sup>1</sup> Rājṗ Jesús loj rexpejnṗacni:

—Siāādpac recos ni gun jiajb bejn lo dojl. Proobza bejn ni rujn riajb bejn lo dojl. <sup>2</sup> Maaz guliibni te guij xten molin guejnṗni, gusaḷ bejnṗni lo nisdoo cadro jiätro quela gunni jiajb rexi'nä ni ahuililajz xtidxä. <sup>3</sup> ¡Coḷsusin!

Palga gun bejtzlu dojl lojlu, baliidxni. Palga gusiech-lajzni, basiäjḷ diidx con laani. <sup>4</sup> Masque gajdz huält nen teb dxej gunni dojl lojlu, palga jiädniini lojlu gajdz huält, naani: “Xhet laadi benä, basiäjḷ lajzlu”, basiäjḷ lajz con laani.

*Bastioob xcälṗrililaaznu*

<sup>5</sup> Gunii rexpejnṗacni lo Jesús, rājṗreni:

—Dad, baniidxru yälṗrililajz loonu.

<sup>6</sup> Dxejc rājṗ Jesús lojreni:

—Palga rajptu yälṗrililajz, mase najcni si'cti te bedzbäz xten muxhtas, sajc gäbtu lo yagro rec: “Biliädxa' ro'c, guzuj galäii nisdoo”, susobdiajg yajgga xtiidxtu.

*Ni riäjḷ* gun te mos

<sup>7</sup> Rājṗzani:

—¿Chu tejtṗ ni rajṗ te mos ni riga'n o ni rigajṗ rexquidxaani ni gäbni lojni che guibi'ni lo niaa: “Biu'ga, gurej lo mex te gaulu”? <sup>8</sup> Dini gäb si'c. Niluxh säjṗni lojni: “Bachaa xhajblu. Bejn xhi gauä, gudanäni loä. Che luux gauä, yä'ä, dxejc sajc gauzalu, yäzalu.” <sup>9</sup> Dini gudeed xquixtios lo mosga sa'csi rujṗni recos ni gunibeeni sa'csi si'c riäjḷ gunni. <sup>10</sup> Sigajcza la'tu, che luux guntu guiraa



redzuun ni guniä guntu, riäjł guiniitu lo Dios: “Najcnu mos ni xhet sajcdi, nani riäjł jiennu, ni'ctis biennu.”

*Basiajc Jesús tzuu bejn* ni rał tiejxhreni

<sup>11</sup> Lał ni sasaj Jesús nez guedx Jerusalén, gudejđni loj región Samaria nájza región Galilee. <sup>12</sup> Che biu'ni tej reguejdxga, huichagloj Jesús tzuu bejn ni rajc te yälguijdx ni rał tiejxhreni, niluxh zijtru guzujreni. <sup>13</sup> Dxejc rbedxa'reni rájpreni:

—Jesús, Dad, Mastr, balaslajz nuurnu.

<sup>14</sup> Che bahuii Jesús lojreni, rájpnı lojreni:

—Cołchäj, te fii rebixhojz abiajctu.

Lał ni sääreni, bia tiejxhreni. <sup>15</sup> Dxejc tejreni, che bahuiini abiajcnı, gubiguxunni, cabedxa'ni calä'pni xpala'n Dios. <sup>16</sup> Bazuxhıjbnı nez loj Jesús, basajbnı lojni lo yuj cagudeedni xquixtios loj Jesús. Luxh bejnre najc te benzıjt, te bejn Samaria. <sup>17</sup> Dxejctı rájpnı Jesús lojni:

—¿La et tzuudi najc renı biajc, ä? ¿Con sgaareni?

<sup>18</sup> ¿La rutru gubi'di loä te guiliä'prenı xpala'n Dios, xtebtis benzıjtre, ä?

<sup>19</sup> Dxejc rájpnı Jesús loj bejnre:

—¿Huisulii, huij! Abiajclu sa'csi huililajzlu.

*Xho guidzujn* xcälrnıbee Dios

(Mt. 24:23-28, 36-41)

<sup>20</sup> Dxejc, sa'csi agunabdiıdx refarisee loj Jesús guc guidzujn xcälrnıbee Dios, badzu'ni diıdxre, rájpnı lojreni:

—Di xcälrnıbee Dios guidzujn con seen ni sajc fiıtu.

<sup>21</sup> Dıza bejn naa: “Bahuii, anıree”, o “Anırec”, sa'csi abıdzujn xcälrnıbee Dios lojtu.

<sup>22</sup> Dxejc rájpnı Jesús lo rexpejnıpacni:

—Sidzujn dxej rlajzgatı fiıtu te dxej sa' ni chu che jiädsac Xi'n Dios ni gujc Nıguii, luxh ditı fiıni. <sup>23</sup> Luxh siniırenı lojtu: “Anıree”, o “Anırec”, per na'c chäätı, na'cza

chanajltu reni rihuii. <sup>24</sup> Sa'csi sigajc ni rien̄ che rdinya' te laad xhaguibaa hasta stelaad xhaguibaa, si'cza gac che jiälä narä, Xi'n Dios ni gujc Niguii, che gal̄ dxej guibi'ä. <sup>25</sup> Luxh ganiddoo sidedä trabajwduxh, sa'csi sibälaz reben̄ guedxliuj ni tre' naj narä. <sup>26</sup> Si'cni gujc nen̄ redxej cheni gubajñ toNoé, si'cza gac nen̄ redxej che jiälä narä, Xi'n Dios ni gujc Niguii. <sup>27</sup> Nen̄ redxej ni gubajñ toNoé guda-jwreni, gu'reni, bachñaareni, badeedzareni xindxa'preni guchñaabejn̄, bidzujñli dxej cheni biu' toNoé nen̄ barcwro ni bencheeni. Dxejc biääd nisguiduxh, gujt guiraa reben̄ dojl̄, guzääbreni lo nis. <sup>28</sup> Sigajcza gujc nen̄ redxej ni gubajñ toLo't: guda-jwreni, gu'reni, gusiireni, bato'reni, gule'creni binij, bencheezareni rolizjreni. <sup>29</sup> Niluxh cheni birii Lo't lo guedx Sodoma, biajb guiboo xhaguibaali, näjza te däj ni rudxuui, gunitlojti guiraa rebejn̄ dojl̄, huejcreni. <sup>30</sup> Sigajcza gac nen̄ redxej cheni jiälä narä, Xi'n Dios ni gujc Niguii.

<sup>31</sup> 'Dxejga, palga yu' chu niä'p yejc yu', diru gal̄di jiäjtñi te chalääni rehxixtenni ni yuchee nen̄ yu'; palga yu' chu suga' nezjiät, di gal̄diruni guibi'ni rolizjñi. <sup>32</sup> Colgusnaj lajztu xhi gujc chäǟl toLo't. <sup>33</sup> Ni rlajz ga'p xcäl̄nabajñni lo guedxliujre, sunijtnini, nani gunijt xcäl̄nabajñni lo guedxliujre xcuent rextidxä, xcäl̄nabajñni rajpni xh-aguibaa.

<sup>34</sup> 'Rniä lojtu, guxhijnga ni jiälä lo tio'p reni naga' lo te da', chäǟ tejni, steeni jia'n. <sup>35</sup> Lo tio'p gunaa ni cayo't, chäǟ tejni, steeni jia'n. <sup>36</sup> Lo tio'p bejn̄ ni yu' lo niaa, chäǟ tejni, steeni jia'n.

<sup>37</sup> Che biejn̄ diajgreni rediidxre, gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojñp regolbetz.

## 18

### *Xcuent te gunabiuud con te juejz*

<sup>1</sup> Bijza Jesús te cuent ni ruluii lojreni, te guisieedreni xho riajl cuedx-guiniabreni lo Dios lacuaa gac-huin lajzreni, <sup>2</sup> räjpni lojreni:

—Te guejdx guyu' te juejz ni di chalilajz xtidx Dios, dizani jiu rebejn. <sup>3</sup> Lagajc guejdxga guyu' te gunabiuud. Guixe-guixee rijni lo juejz, rniabni lojni gunni yälguxhtis lo bejn ni rdxe'ch lojni. <sup>4</sup> Balti dxej naadti juejzga gun yälguxhtisga. Dxejcti bejn ni xhigab, naani: “Mase dina guidxebä Dios, dizana jiuä rebejn, <sup>5</sup> sa'csi gunabiuudre sanuutisni siäädni loä, abasiedliini narä, gunälis yälguxhtis xten gunaaga, te di chanuutis riädgusieedni narä.”

<sup>6</sup> Dxejc räjp Jesús lojreni:

—Riejn diajgtu xtidx juezguijdxga, <sup>7</sup> Naj ¿xho di Dios, ni najc hueen, gucuadiajg xtidx rexi'nni ni rbedx-rniab lojni dxej-yääl? Di gaclaa gunni yälguxhtis xcuent reni aguleni. <sup>8</sup> Ni'cni rniä lojtu, sungajcni yälguxhtis par laareni. Luxh che guibi' Xi'n Dios ni gujc Niguii, ¿la sidxäl ni bejn ni rililajz xtiidxni lo guedxliuj?

### *Xcuent te farisee con te ni rusquijx impuest*

<sup>9</sup> Bij Jesús stee cuent ni ruluii loj rebejn ni rluuisi najc beñsa'c, ni rchalo xhet sajcdi resabejnreni. Räjpni:

<sup>10</sup> —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest. <sup>11</sup> Sulii fariseega lañ ni canabni lo Dios, räjpni: “Dad, Dios, runidxä xquixtios lojlu sa'csi dina gacä si'c najc rebejn ni najc gubaan, ni najc beñ nadiplajz, ni najc bendojl, dizana gacä si'c najc bejnre ni rusquijx impuest. <sup>12</sup> Rucua'nä tio'p huält nen te xmaan, luxh rudedä te tzuu lo te beex loj guiraa ni runä gaan.” <sup>13</sup> Niluxh bejn ni rusquijx impuest, zijtru suga'ni, dini guiliäs lojni xhaguibaa. Catiälñaatisni

lastooni, caniini lo Dios, räjpni: “Dad, Dios, ¡balaslajz narä, nacä te bendojl!” <sup>14</sup> Rniliápac lojtu, ni rusquijx impuest rbaali lajzni gubi'ni rolizni sa'csi badzucaj Dios rextojlni, niluxh di Dios nudzucaj rextojl ben farisee. Sa'csi guiraa rebejn ni rlaiz guiliä'p lagajc xpala'nmi, susanxtiujy Diosreni, dxejc reni di rlaiz guiliä'p lagajc xpala'nreni, siliä'p Dios xpala'nreni.

*Benle' Jesús yejc rebiuxbáz*

*(Mt. 19:13-15; Mr. 10:13-16)*

<sup>15</sup> Yu'reni siädnä rexpiuxbázreni loj Jesús te guzujni naani yejcreni. Che bahuu rexpejn pacni si'c, gusloj cadildiidxreni con rebejn te na'c jiädnäreni rebiuxe'.

<sup>16</sup> Dxejc gurejdx Jesúsreni, räjpni lojreni:

—Colgusaan jiäd rebiuxe' loä, na'c gudxoijntureni, sa'csi xcälrnibee Dios najc xten reni najc nadolajz si'c rebiuxbäze're. <sup>17</sup> Rniliápac lojtu, chutis ni rlaiz jiu' lo xcälrnibee Dios nanab gusobdiajgreni xtidx Dios si'c rusobdiajg rebiuxe' xtidx xtadreni. Palga dini gun si'c, dini jiu' lo xcälrnibee Dios.

*Te bi'n ni rajp xhidajl xhixtenni*

*(Mt. 19:16-30; Mr. 10:17-31)*

<sup>18</sup> Te bi'n ni rnibee gunabdiidx loj Jesús, räjpni:

—Dad, mastrsa'c, ¿xhini'c nanab gunä te xca'ä yälñ-abajñ par tejpas?

<sup>19</sup> Dxejc räjp Jesús lojni:

—¿Xhicuent rniilu narä: “Mastrsa'c”? Rutru najcdi bensa'c, xtebtis Dios. <sup>20</sup> Anajnlu xho najc remandamient ni caj lo xleii Moisés: “Na'c guesnäjlgu gunaa ni di gac cháällu; na'c ju'tlu bejn; na'c cuanlu, na'c guiniilu didx-xhii xcuent bejn; bazoob xtidx xtadlu, xnanlu, bahui-izareni.”

<sup>21</sup> Dxejc räjp bi'nga lojni:

—Guiraa remandamientre rusobä cheni gucäli biuux.

<sup>22</sup> Che biejn diajg Jesús xtiidxni, räjpni lojni:

—Tejtis cayäädx gunlu. Bato' guiraa rehxixtenlu, gudisni loj rebejn ni xhet rajpdi dxejc sajplu xcäl'nasa'clu xhaguibaa. Dxejc gudanajl narä.

<sup>23</sup> Che biejn diajg bi'nga rediidxre, guc-huinduxh lajzni, sa'csi najcni te bejn ni rapduxh. <sup>24</sup> Dxejc rdxelojtis Jesús lojni, guc-huinza lajzni räjpni:

—Naganduxh jiu' rebenrajp lo xcäl'nibee Dios.

<sup>25</sup> Guyasiru ted te cameii ni' te guux lo ni jiu' rebenrajp lo xcäl'nibee Dios.

<sup>26</sup> Reni biejn diajgni rediidxre, räjpreni:

—¿Chuxhni'c sajc laa lo dojl, palga si'c najcni?

<sup>27</sup> Dxejc räjp Jesús lojreni:

—Guira'ti ni di gacdi gun rebejn, guyasi rajc rujn Diosni.

<sup>28</sup> Dxejc räjp Pedr lojni:

—Dad, nuurnu abasa'nnu guiraa rehxixtenu te siopnalnu luj.

<sup>29</sup> Dxejc badzu' Jesús diidxre lojni, räjpni:

—Rniliápac lojtu, chutis ni gusaan rolijzni näjza rex-cuzajnni, rebejtzni, chääl'ni, xi'nni xcuent xcäl'nibee Dios, <sup>30</sup> sica'ni xhiroobru lo guedxliujre, luxh sica'ni yäl'nabajn par tejpas.

*Rusule' Jesús stehuält xho guetni*

*(Mt. 20:17-19; Mr. 10:32-34)*

<sup>31</sup> Gurejdx Jesús rexpeljpacni te laad, te räjpni lojreni:

—Naj chonnu guedx Jerusalén cadre nanab soob rediidx nani bacuaa dade' ni gunii xtidx Dios galooli xcuent Xi'n Dios ni gujc Niguui. <sup>32</sup> Sutedrenini ladznäa rebenzajt, suxhiznäjrenini, susacsírenini, sutiobxhejnlireni lojni, <sup>33</sup> luxh che luux quiinrenini, dxejc sugu'trenini, luxh ni riojn dxej sibañsacni loj rebenjut.

<sup>34</sup> Dxejc laareni direni niacbee rediidxre, dizareni gan xhini'c caniini, sa'csi najcreni diidx ni di gacdi gacbeereni.

*Rusiajc Jesús te beṅ lotiä'p*

*(Mt. 20:29-34; Mr. 10:46-52)*

<sup>35</sup> Cheni sadzujṅ Jesús te guejdx ni laa Jericó, sobga' te beṅ lotiä'p ro' nezyuj, canabni gojn. <sup>36</sup> Che biejn diajgni cadejd xhidajl beṅ lo nezyujga, gunabdiidx beṅ lotiä'pga xhini'c cayajc. <sup>37</sup> Dxejc räjpreni:

—Jesús ni siääd Nazare't cadejdni nezga.

<sup>38</sup> Dxejc guredxa'ni räjpni:

—¡Jesús, xi'n toDavid, balaslajz narä!

<sup>39</sup> Rebejṅ ni nijd lojreni gudilṅäjreni beṅ lotiä'pga te jiäu ro'ni, niluxh laani dipru guredxa'ni, räjpni:

—¡Xi'n toDavid, balaslajz narä!

<sup>40</sup> Dxejc guzudxi Jesús ro'c, gunibeeni jiädñäreni bejṅga lojni. Che bidzujṅni lojni, gunabdiidx Jesús lojni, räjpni:

<sup>41</sup> —¿Xhini'c rlajzlu gunnäá luj?

Badzu' beṅ lotiä'pga diidxre, räjpni:

—Dad, rlazä jien loä.

<sup>42</sup> Dxejc räjp Jesús lojni:

—¡Sujien balojlu! Abiajclu sa'csi huililajzlu.

<sup>43</sup> Lagajc dxej, biengajc lojni, calä'pni xpala'n Dios, huinajlṅni Jesús. Luxh guiraa rebejṅ ni bahuii xhi guzajcni, gulä'pzareni xpala'n Dios.

## 19

*Huij Jesús roliz te beṅ ni laa Zaqueo*

<sup>1</sup> Dxejc biu' Jesús guedx Jericó, sadejdzani guejdxga. <sup>2</sup> Ro'c rbäjz te beṅrapduxh, ni laa Zaqueo, ni rnibee lo reni rusquijx xcuent impuest. <sup>3</sup> Rlajz Zaqueo fiini loj Jesús te gumbeenini, per digacdi fiini lojni sa'csi najcni te beṅxhate', luxh xhidajl beṅ siädsaj guideb gabi Jesús.

<sup>4</sup> Ni'c baxu<sub>n</sub>ni gunijdni lojreni, huä'pni lo te yajgro ni suga' gajxh nez cadro ted Jesús te si'c sajc fiini loj Jesús.

<sup>5</sup> Che gudejd Jesús nejzga, guläsni lojni jiaa, bahuiini cadro sobga' bejn<sub>r</sub>e. Dxejc räjpni lojni:

—Zaqueo, basquejn biäjt ro'c, lagajc nadxej rlazä chajia'nä rolijzlu.

<sup>6</sup> Dxejcti biätguxu<sub>n</sub> Zaqueo lo yajgga, rbalazduxhni huinäni Jesús rolijzni. <sup>7</sup> Che bahuii guiraa rebejn<sub>r</sub> xhi gujc, gusloj camojm<sub>r</sub>reni, direni jiulajz, räjpreni:

—Jesús sajia'n rolijz te be<sub>n</sub>doj<sub>l</sub>.

<sup>8</sup> Dxejcti huisulii Zaqueo, räjpni loj Jesús:

—Bahulaare, Dad, gala' xhixtenä gudedä loj reben<sub>r</sub>proob; luxh palga yu' chu loj cua'ä xhixtenni con yäl<sub>r</sub>usguee, sudzu'ä lojni tajp huält si'cti ni cua'ä.

<sup>9</sup> Räjp Jesús lojni:

—Lagajc nadxej gubicaj xtoj<sub>l</sub>llu näjza xtoj<sub>l</sub> reni rbäjz rolijzlu, sa'csi guliipac najclu te xagdoo toAbram. <sup>10</sup> Pues Xi'n Dios ni gujc Niguui biädtil reb<sub>n</sub>doj<sub>l</sub> te gus<sub>r</sub>laani rebejn<sub>r</sub>nga ni gunijt ne<sub>n</sub> doj<sub>l</sub>.

### *Xcuent tzuu meel*

<sup>11</sup> La<sub>l</sub> ni cagucuadiajg<sub>r</sub>reni xtidx Jesús, bijzani te cuent ni ruluii, sa'csi asiäddzujngajxh<sub>r</sub>reni guedx Jerusalén, luxh laareni rujn<sub>r</sub>reni xhigab sisloj guinibee Jesús si'ctisni guidzuj<sub>n</sub>ni guejdxga. <sup>12</sup> Dxejc räjpni lojreni:

—Guyu' te bejn, ben<sub>r</sub>rajpni, huijni te guejdx zijtro te gacni rei<sub>i</sub>, dxejc guibisacni. <sup>13</sup> Che gajdni guirii, gurejdxni tzuu xmosni, te badeedni lo tebgajreni te melpla't ni sacduxh, räjpni lojreni: “Colyujn dzuun con meelre che guibisacäli.” Sä'tini. <sup>14</sup> Per reben<sub>r</sub> lajdxni dipacreni guichag<sub>r</sub>lajz bejn<sub>r</sub>nga, ni'c baxha<sub>r</sub>reni gaii bejn<sub>r</sub> te saye'tzreni: “Di r<sub>r</sub>lajzdinu gacni xreiinu.” <sup>15</sup> Luxh empac

gujcni *reii*, dxejc gubisacni lajdxni. Che bidzuj<sub>n</sub>ni gurejdxni rexmosni ni badeedni meel cua'reni, te gacbeeni lac bejn tejpgareni gaan. <sup>16</sup> Ni bidzuj<sub>n</sub> ganid räjpni lojni: “Dad, xmeellu bejn gaan stzuu meel.” <sup>17</sup> Dxejc räjp *reii* lojni: “Hueenca, luj najclu te mossa'c, sa'csi laaca bejnlu dzuun lo te dzunbáz, *naj* sunidkä guinibeelu loj tzuu guejdx.” <sup>18</sup> Bidzuj<sub>n</sub> stee mos lojni, räjpni: “Dad, xmeellu bejn gaan gatii meel.” <sup>19</sup> Dxejcti räjpni lojni: “Luj guinibeelu loj gatii guejdx.” <sup>20</sup> Bidzuj<sub>n</sub>ti stee mos lojni, räjpni: “Dad, aree xmeellu, guluchedzu'tzäni ne<sub>n</sub> te baii <sup>21</sup> sa'csi bidxebä guejblu, sa'csi najc guejblu te be<sub>n</sub> nadiplajz, rutoj<sub>p</sub> guejblu cadro di guejblu nuzuj, luxh rliäs guejblu cose'ch cadro di guejblu nibe'c.” <sup>22</sup> Dxejcti räjp *reii* lojni: “¡Mosguijdx! lagajc ro'lu birii diidx ni gunälu yälguxhtis. Palga najnlu nacä te be<sub>n</sub> nadiplajz, najnlu rutopä cadro dina nusuä, najnlu rliäsä cose'ch cadro dina nibe'cä, <sup>23</sup> ¿xhicuent dilu nisa'n xmelä ne<sub>n</sub> te bancw te che nibi'ä nica'a xmelä nägajc xi'n meelga?” <sup>24</sup> Dxejc räjpni loj reni suga' ro'c: “Colgudzucaj meelga lojni, colgudeedni loj ni rajp tzuu meel.” <sup>25</sup> Laareni räjpreni: “Dad, per laani arajpni tzuu meel.” <sup>26</sup> Dxejc badzu' *reii* diidxre lojreni, räjpni: “Ni'cni rniä, reni rajp, sica'rureni, niluxh reni di ga'p lojreni sibicaj guiraa recosbáz ni rajpreni. <sup>27</sup> Luxh xcuent reni rdxe'ch loä, ni di rlanj niacä *reii* lojreni, coltanäreni ree, colgugu'treni nez loä.”

*Che biu' Jesús quedx Jerusalén*

*(Mt. 21:1-11; Mr. 11:1-11; Jn. 12:12-19)*

<sup>28</sup> Che gulujx guniini guiraa rediidxre, huinuuni xne-jzni, sääni nez lo guejdx Jerusalén. <sup>29</sup> Che asadzungajxhni reguejdx ni laa Betfagé näjza Betania, gajxh lo dajn ni laa Oliib, baxha<sub>n</sub>ni tio'p rexpejn<sub>p</sub>acni, <sup>30</sup> räjpni lojreni:



—Colchäj lo guejdx'e ni suga' lad rec. Che guidzujntu, guidxäلتu caduu te bur̄ huin ni gajd bejn̄ cuib. Colguxhecni, coltanäni ree. <sup>31</sup> Palga yu' chu guiniabdiidx lojtu: “¿Xhicuent caguxhectuni?” colye'tz lojni: “Dad caquiinnini.”

<sup>32</sup> Sä'ti rexpejn̄pacni nani baxhalni, bidxälreni manga sigajctisni räjp Jesús. <sup>33</sup> Cheni caguxhecreni bure'ga, rexpaxhuaan bure'ga räjp lojreni:

—¿Xhicuent caguxhectu bure'ga, ä?

<sup>34</sup> Dxejc badzu'reni diidxre, räjpreni:

—Sa'csi caquiin Dadni.

<sup>35</sup> Sas huinäreni bure'ga loj Jesús, gudixhreni xhajbreni dejtzn̄i, te gubijb Jesúsni. <sup>36</sup> Guideb cadre gudejd Jesús gudixhreni xhajbreni lo nezyuj cadre tedni. <sup>37</sup> Cheni ameer guidzujn̄ni bajaad xten dan Oliib, gusloj cabaa lajz guiraa rebejn̄, rbedxa'lireni calä'preni xpala'n Dios sa'csi bahuiireni guiraa remilagwr ni bejn̄ni. <sup>38</sup> Räjpreni:

Chicbaa reii ni siädä xcuent Xtadnu Dios te guinibeeni loonu.  
Sucuedxilajz guiraa reni yu' guibaa, chä'p xpala'n Dios xhaguibaali.

<sup>39</sup> Dxejc gaii refarisee ni suga' galäii rebejn̄, räjpreni loj Jesús:

—Mastr, guidixa' lo rebejn̄ ni siädnajllu te na'cru guiniireni si'c.

<sup>40</sup> Dxejc Jesús räjp lojreni:

—Rniliá lojtu, palga redee gusäu ro'reni, sibedxa' reguijre.

<sup>41</sup> Che bidzujn̄ni gajxh, che bahuiini guedx Jerusalén, biin Jesús xcuent guejdxga, <sup>42</sup> räjpni:

—¡Maläii gacbeelu, masque nen̄ redxejre, xhini'c sajc guniidx yäl̄rbedxilajz lojlu! Per naj naga'tzni, luxh digacdi fiilu lojni. <sup>43</sup> Sidzujn̄ dxejga lojlu, cheni jiädä reni rdxe'ch

lojlu sujnreni si'c te guralyuj guideb gabilu, nez lojlu sigajc nez dejtzlu sisiujreni. <sup>44</sup> Susäl'ta'reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biäd Dios biädhuiilu.

*Rusia Jesús neñ guidoro*

*(Mt. 21:12-17; Mr. 11:15-19; Jn. 2:13-22)*

<sup>45</sup> Dxejcti biu' Jesús neñ guidoro, guslojni cabääni rebejn ni jaguto' näjza reni casii. <sup>46</sup> Dxejc räjpni lojreni:

—Loj rexquijtZ Dios caj rediidxre: “Rolizä sajc te yu' cadre jiadnabtu lo Dios”, niluxh la'tu abejntuni si'c te biliää xte gubaan.

<sup>47</sup> Guixe-guixee caguluii Jesús neñ guidoro, luxh reni rnibee loj rebixhojz näjza rebejn ni ruluii leii, näjza rebengool xte guejdxga caguuilreni mood te ju'trenini, <sup>48</sup> luxh direni nidxäjl xho niujnrenini sa'csi guiraa rebejn cacuadiagdzu'tzreni xtiidxni.

## 20

*Xcälrnibee Jesús*

*(Mt. 21:23-27; Mr. 11:27-33)*

<sup>1</sup> Te dxej suga' Jesús neñ guidoro, caguluiini rebejn, cagusule'zani diidx xcuent xho guibicaj xtojlrreni, che bidzujñ reni rnibee loj rebixhojz näjza rebejn ni ruluii leii näjza rebengool, <sup>2</sup> räjpreni lojni:

—¿Xhi yälrnibee rujnlu recosre? ¿Chu baniidx yälrnibeega lojlu?

<sup>3</sup> Dxejcti räjp Jesús lojreni:

—Narä sigajcza gunä te yälgunabdiidx lojtu, colgudzu' diidxre loä, <sup>4</sup> ¿chuni'c baxhal Juan te gutiobnisni rebejn? ¿La Dios o la rebejn, ä?

<sup>5</sup> Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhałni, dxejc naani loonu: “¿Xhixhcuent ditu ninilajz xtiidxni?”  
<sup>6</sup> Palga jie'tznu: “Rebejn baxhałni”, guiraa rebejn sucuaa guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

<sup>7</sup> Dxejc badzu'reni diidxre, räjpreni:

—Dinu guidon chuni'c baxhał Juan te biädtiobnisni.

<sup>8</sup> Dxejc räjp Jesús lojreni:

—Dizana guiniä xhi yälrnibee rapä te runä recosre.

*Xcuent remosguijdx*

(Mt. 21:33-44; Mr. 12:1-11)

<sup>9</sup> Dxejc gusloj canii Jesús loj rebejn, bijni cuentre lojreni, räjpni:

—Guyu' te bejn bazuj yaguub lo xyujni. Dxejc badedlaanini lo gaii bejn cháäreni meed, sä'tnini zijt, gucladuxhni ro'c. <sup>10</sup> Che bidzujn dxej ni guidojp cose'ch, baxhałni te xmosni sanab cose'ch ni riäjł xca'ni. Per laareni gudijnreni mosga, xhetliidi badeedreni chanäni lo xpaxhuaan yujga. <sup>11</sup> Dxejcti baxhałni stee mos lojreni. Dxejc sigajcza gudilnäjrenini, gudijnrenini, luxh xhetza badeeddireni lojni, ganaxni gubi'ni lo xlamni. <sup>12</sup> Dxejcti baxhałni ni riojn mos lojreni, per sigajcza gudinduxhrenini, barilaagwrenini.

<sup>13</sup> 'Dxejc bejn baxhuaanga xhigab, naani: “¿Xhichani'c gunä? Suxhałä xi'nä ni sanälazä; che fiireni lojni, pet siureni xtiidxni.” <sup>14</sup> Dxejc che bahuii reni go'n-meed lo xi'nni, dxejc räjpreni lo sa'reni: “Laa deeni gac xtenni reyujre. Do'o guigu'tnuni te nuurnu xca'nu yujre gacni xtenu.” <sup>15</sup> Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, räjpni:

—¿Xhichani'c gunnäj xpaxhuaan yujga reben guidxre, ä? <sup>16</sup> Sidzujñni, sugu'tni guiraa reni cayujñ dzun-meed lo yujga, dxejc sudeedni yujga lo garenca bejn.

Che bejn diajgreni rediidxre, räjpreni:

—¡Na'c gusaan Dios gacni si'c!

<sup>17</sup> Bahuii Jesús lojreni, dxejc räjpni:

—¿Xhixhni'c caj lo guijtzi ni bacuaa redade' ni gunii xtidxi Dios galoo? Ro'c cajni:

Guij nani guläcaj renani runchee yu', ni'c agujc guisa'c ni guzuj galoo.

<sup>18</sup> Chutis ni jiajb yejc guijga, sianduxhni, per nani jiajb guijga yejñni siujypacni, li däj gacni.

*Xcuent reimpuet*

(Mt. 21:45-46; 22:15-22; Mr. 12:12-17)

<sup>19</sup> Reni rnibee loj rebixhojz, näjza reni ruluii leii rla-jzreni guiniaazreni Jesús lagajc orga, sa'csi gucbeereni lojreni gunii Jesús cuentre, luxh xhet bejndireni sa'csi rdxejbreni rebejn. <sup>20</sup> Dxejc cagula'tztisrenini, baxhalreni gatii bejn te gunsireni si'c ni najczeni bendxan, te gucuadiazgreni xtiidxni don gaxäjssi guiga'ni lo te diidx te guteedrenini lo yälguixhtis, yälrnibee xte gubernadoor.

<sup>21</sup> Dxejc gunabdiidxreni lojni, räjpreni:

—Dad, Mastr, nadonnu laaca rnii guejblu, laaca ruluii guejblu, luxh di guejblu fixgaa la yu' chu najc bejn, ruluisa'c guejblu xnez lo Dios. <sup>22</sup> Gunilaa loonu, ¿la laaca guidiixnu reimpuet loj xcubieer César o la xhet laadini, ä?

<sup>23</sup> Sas gucbegajc Jesús cayujnsireni yälgunabdiidxga, dxejc räjpni lojreni:

—¿Xhicuent runnäjtu narä scree? <sup>24</sup> Baluii loä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

<sup>25</sup> Dxejc räjpni lojreni:

—Coldeed lo César nani najc xten César; coldeedza lo Dios nani najc xten Dios.

<sup>26</sup> Luxh direni niujn gaan niga'ni loj nicla te diidx ni guniini nez loj rebejn. Rdxelojtisreni lo rextiidxni, biäuti ro'reni, guzudxireni.

*Rniabdiidxreni xcuent yälrbansac lo rebengut*

*(Mt. 22:23-33; Mr. 12:18-27)*

<sup>27</sup> Dxejc huij gaii resaduceos huihuiireni loj Jesús. Di resaduceos chalilajz rbansac bejn lo rebengut. Ni'cni gunabdiidxreni loj Jesús, <sup>28</sup> räjpreni:

—Dad, Mastr, basa'n Moisés guijtj loonu, lojga caj: “Palga guet te bejn, gusaanni cháälni ruti xi'nni, nan-abpac xca' bejtzni gunaaga te chu xi'nni con laani xcuent tobejtzni.” <sup>29</sup> Guyu' gajdz niguii, bejtz najcreni. Sas cua' niguigalooga cháälni. Che gujtni ruti xi'nni. <sup>30</sup> Dxejcti cua' ni rojpga gunaaga. Che gujtni, rutiza xi'nni. <sup>31</sup> Sigajcza guzajc ni riojnga. Si'cza guläsnäj gunaaga guigajdzreni. Guiraareni gujt, nicla tejreni di xi'nreni niu'. <sup>32</sup> Dxejcti näj gunaaga gujt. <sup>33</sup> Guigajdzreni guläsnäjreni gunaare, ni'cni, che guibansacreni lo rebengut, ¿chu cháäl gacni, ä?

<sup>34</sup> Dxejc räjp Jesús lojreni:

—Lo guedxliujre ruchnaa rebejn, rudeedzaren i xindxa'preni ruchnaa. <sup>35</sup> Niluxh rebejn ni agule Dios te cháäreni xhaguibaa, näjza te guibansacreni loj rebengut, di reni'c guchnaa, dizaren i gudeed xindxa'preni guchnaa, <sup>36</sup> sa'csi diru gac guetreni, anajcreni si'c najc rexangl Dios. Laareni najc xi'n Dios sa'csi abaspañsac Diosreni. <sup>37</sup> Moisésli basule' xcuent ni rbansac reben loj rebengut che bacuaani diidx xcuent yajg ni gurebajl. Ro'c gurejdxni Dios räjpni: “Xtios Abram, Xtios Isaac, näjza Xtios

Jacob”, ni'cni nabajnpacreni lo Dios. <sup>38</sup> Sa'csi di Dios gac Xtios rebengut; najcni Xtios rebejn ni nabajnpacreni par tejpas, sa'csi par laani guiraa rebejn nabajnpacreni.

<sup>39</sup> Dxejc gaii reni ruluii leii badzu'reni diidre, räjpreni lojni:

—Mastr, laaca guniilu.

<sup>40</sup> Sa'csi dirureni niajx niniabdiidrxureni lojni.

*Chu xi'n najc Crist*

*(Mt. 22:41-46; Mr. 12:35-37)*

<sup>41</sup> Dxejcti räjp Jesús lojreni:

—¿Xho mood rniireni Crist najc xi'n toDavid, ä? <sup>42</sup> Ni lagajc toDavid bacuaa lo reguijtz ni laa reSalmo:

Dad Dios räjp lo Xtadä:

<sup>43</sup> “Gurej xladbeä cheni guidzujnli dxej ni gudzugä guiraa ni rdxe'ch lojlu te gacbeereni luj rnibeelu guira'ti.”

<sup>44</sup> ¿Xho mood gacni xi'nni palga rnii toDavid lojni “Dad”?

*Rucuaquij Jesús reni ruluii leii*

*(Mt. 23:1-36; Mr. 12:38-40; Lc. 11:37-54)*

<sup>45</sup> Guiraa rebejn cagucuardiajg che räjp Jesús loj rexpejnpacni:

<sup>46</sup> —Colyajp cuidaad reni ruluii leii, sa'csi rdxaglazreni rajcwreni lajd siool, rlazreni saru guinii guiraa rebejn “xchan” lojreni, rlazreni jiu bejnreni nez loguii, rlazreni cuereni lo reyagxhilsa'c nejn reguidobäz, näjza cadre rajc lanij. <sup>47</sup> Rudzucajzarenen rexhixten regunabiuud, dxejc rolreni rele' siolduxh che rniabreni lo Dios te fii rebejn, te naa bejn najcneni bendxan, luxh lojreni suxhal Dios te castigwroru.

## 21

*Gojn xten te gunabiuud*

*(Mr. 12:41-44)*

<sup>1</sup> Nen̄ guidoro bahuii Jesús cagusäl̄ reben̄rajp gojn nen̄ te guijn cadro rdojp gojn. <sup>2</sup> Bahuiizani lo te gunabiuud, lacti proobni. Basäl̄ni xcojn̄ni nen̄ guijnga, tio'ptis melbáz basäl̄ni. <sup>3</sup> Dxejc räjp Jesús:

—Rniliápac lojtu, gunabiuud proobga basäl̄runi loj guiraa reni casäl̄ gojn, <sup>4</sup> sa'csi guiraa reddec ni cagusäl̄ xcojn̄ni casäl̄reni tudxe'nsi xmeelreni, niluxh gunaare loj xcäl̄proobni, basäl̄ni guiragajc ni rajpni te jio' xhi gauni.

*Räjp Jesús sibijl̄ guidoro*

*(Mt. 24:1-2; Mr. 13:1-2)*

<sup>5</sup> Yu' reni cayujy diidx xcuent guidoro, räjpreni:

—Lacti sacruduxh rienni sa'csi guisa'c naccheeni, suchenäjzani xhidajl̄ recossa'c ni badeed bejn̄ si'c gojn.

Dxejc gunii Jesús lojreni, räjpni:

<sup>6</sup> —Sidzujn̄ dxej sibijl̄ guiralii ni cahuiitu, nicla tej guij di jia'n yejc sa'ni, guiragajcni sibijl̄.

*Reseen ni chu che nitloj guedxliuj*

*(Mt. 24:3-28; Mr. 13:3-23)*

<sup>7</sup> Dxejc gunabdiidx rexpejn̄pacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

<sup>8</sup> Räjp Jesús lojreni:

—¡Colsusin̄ te na'c gusgueereni la'tu! Sa'csi xhidajl̄ reni jiäd̄d sinii: “Narä nacä Crist”, o “Asiäd̄gajxh redxey che jiäd̄dni”, per na'c chalilajztu xtiidxreni, na'cza chanajl̄tureni. <sup>9</sup> Luxh che jiejn̄ diajgtu cayajc guer̄ cadil̄näj sa' bejn̄, na'c guidxeybtu, sa'csi ganid recosga gac, luxh gad gal̄di nitloj guedxliuj.

<sup>10</sup> Dxejc sanuu cayäjpni lojreni:

—Säjs te nación, sucuanäj stee nación, näjza te ladx bejn̄ sucuanäj stee lajdx bejn̄. <sup>11</sup> Sajcza xuro, su' gubijn,

su'za yälguijdx nez ree nez rec. Luxh xhaguibaali sien guiraloj ni ruchejb näjza seenro.

<sup>12</sup> Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo reben guidobäz, susälzarenı la'tu nen latzguiib, sinäzarenı la'tu nez loj reii näjza gubernadoor sa'csi rinälajztu xtidxä. <sup>13</sup> Luxh guiraa dee sajctu te gac gusule'tu xtidxä lojreni. <sup>14</sup> Na'c gunxgaatu xhigab nen lastootu xhini'c guiniitu lojreni, <sup>15</sup> sa'csi narä sunidxä diidx guiniitu, sunidxäza yäl'najn lojtu te digac gudzu'reni diidx lojtu niclaza gacdi guiniyajreni xtiidxu. <sup>16</sup> Näjza rex cuzajntu sibire lojtu, suto'reni la'tu, sigajcza rebejtztu, resa'tu, rexamiigwtu, luxh yu'tu sugu'treni. <sup>17</sup> Guiraa rebejn guedxliuj sibälaz la'tu sa'csi rinälajztu xtidxä. <sup>18</sup> Niluxh ni'cla tej xquidxejctu di nitloj. <sup>19</sup> Luxh palga sutijptis lajztu, sajptu yäl'nabajn par tejpas.

<sup>20</sup> 'Che fiitu tre' xhidajl soldaad guideb gabi guedx Jerusalén colyabee abidzujn dxej ni guibijlni. <sup>21</sup> Dxej reni yu' guedx Judea, nanab guxunreni chacuatzlojreni nen redajn; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga, <sup>22</sup> sa'csi nen redxejga sujn Dios fis lo guejdxga te soob rediidx ni caj lo reguijtz xten Dios. <sup>23</sup> Probe'za regunaa ni nuu báz nen redxejga, näjza regunaa ni ca' báz, sa'csi su' yälhuinduxh lo guedxliuj, näjza fis ni gun Dios loj rebejnga. <sup>24</sup> Yu'reni guet lo guer, yu'zarenı chää pres, sijreni balti guedxzijt. Dxej rebenzijt sinibee guedx Jerusalén che guiza'li redxej ni gusaan Dios guinibee rebejn ni di gac xpejn Israel.

*Cheni jiääd Xi'n Niguii*

*(Mt. 24:29-35, 42-44; Mr. 13:24-37)*

<sup>25</sup> Räjpzani:



—Dxejc su' seen lo gubijdx nájza lo báii, nájza loj rebajle' ni yu' xhaguibaa. Luxh lo renacion̄ guedxliuj su' rebejn̄ yársia', di jien̄ xhi gunreni, sidxebduxhreni sa'csi siejn̄ diajgreni chubeduxh lo nisdoo, sásduxh nis ni rájs lo nisdoo. <sup>26</sup> Sitiol̄ rebejn̄ xcuent̄ yälrdxebduxh che gunreni xhigab xhicharuni'c gac lo guedxliuj, sa'csi náj guideb guibaa sinibsejs. <sup>27</sup> Dxejcti suhuiireni lo Xi'n Dios ni gujc Niguii, siädni lo te za guideb xcäl̄rnibeeni, nájza yälrdimbichaduxh. <sup>28</sup> Che guisloj gac recosre, col̄sutijp lajztu, col̄guiliäs yejcti, col̄guibalajz sa'csi asadzujn̄ dxej gusilajztu.

<sup>29</sup> Guniizani stee cuent̄ lojreni, räjpni:

—¡Col̄huii lo yagiigw nájza lo guiraa reyajg! <sup>30</sup> Che fiitu acabääni be'n, col̄yabee lagajc la'tu, abidzungajxh báii nisgij. <sup>31</sup> Sigajcza che fiitu agusloj cayajc recosre, col̄yabee asiäddzujn̄ xcäl̄rnibee Dios.

<sup>32</sup> 'Rniliápac lojtu, guiraa recosre sajc ansde guet rebejn̄ ni yu' naj. <sup>33</sup> Guibaa nájza guedxliuj sinitloj, rextidxä dini nitloj.

<sup>34</sup> '¡Col̄susin̄ lagajc la'tu! Na'c gusaantu cha lajztu yälrausa'c, yälrä', yälga'ptu xhixtentu, dxejc ditu gabee che bidzujn̄ dxejga. <sup>35</sup> Sa'csi si'c sidzujn̄ dxejga loj guiraa reben̄ guedxliuj. <sup>36</sup> Col̄susin̄, col̄bejdx, col̄guiniabtis lo Dios, te gac laatu lo guira'ti ni gac, gacza suutu nez loj Xi'n Dios ni gujc Niguii.

<sup>37</sup> Rdxee ruluii Jesús nen̄ guidoro dxejc guxhijn̄ sasia'n̄ni yejc dan Oliib. <sup>38</sup> Rsilru ristie rebejn̄ te rdzujn̄reni lo Jesús nen̄ guidoro casob rsil, te gucuadiajgreni rextiidxni.

## 22

*Ria'nreni diidx xho guiniaazreni Jesús*

*(Mt. 26:1-5, 14-16; Mr. 14:1-2, 10-11; Jn. 11:45-53)*

<sup>1</sup> Siäddzungajxh dxe lanij che rajwreni yätxtiil ni di säguij, laaza lanijga pascw. <sup>2</sup> Dxejc reni rnibee loj rebixhojz näjza rebejn ni ruluii leii caguiilreni xho gunreni te ju'treni Jesús, sa'csi rdxejbreni rebenguejdx.

<sup>3</sup> Dxejc biu' bendxab lastoo Judas ni laaza Iscariote, ni najc tej retzubitio'p xpejn<sub>pacni</sub>. <sup>4</sup> Dee huininäjni dade' ni rnibee loj rebixhojz näjza loj reni rnibee rex-cuxhtis guidoo. Guninäj Judasreni xho gunni te guteedni Jesús ladznaareni. <sup>5</sup> Dxejc bibalajzreni, bia'nreni diidx gudeedreni meel lojni. <sup>6</sup> Cuäjbtj Judas, dxejcnj guslojni caguiilni xho gunni guteedni Jesús ladznaareni che rut bejn<sub>di</sub> suga'.

*Xchej xten Dad Jesús*

(Mt. 26:17-29; Mr. 14:12-25; Jn. 13:21-30; 1Co. 11:23-26)

<sup>7</sup> Bidzujn dxe lanij che rajwreni yätxtiil ni di säguij, che rugu'tzarenj te xiil si'c ni caj lo xleii toMoisés. <sup>8</sup> Dxejc baxhal Jesús Pedr näjza Juan, räjpni lojreni:

—Colchayejn xchej xten pascw te guidaununi.

<sup>9</sup> Dxejc laareni gunabdiidxreni lojni, räjpreni:

—¿Caro rlajzlu choyennuni?

<sup>10</sup> Räjp Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Colchanajlni, coljiu' rolijz bejn<sub>ni</sub> cadro jiu'ni laani.

<sup>11</sup> Dxejc colye'tz lo bejn ni najc rolijzni ro'c: “Si'c naj Dad Mastr: ¿Con yu' cadro sajc gauxchenää rexpenä naj pascw?” <sup>12</sup> Dxejc guluiini lojtu te yu' ni sojb jiaa yejc stee yu'. Asuchexгаа yu'ga. Ro'c colyejn xhi guidaunu.

<sup>13</sup> Sä'tireni. Si'ctis ni räjp Jesús lojreni, si'cpac bidxälreni. Dxejc bejnreni xchej xte lanij pascw gaureni.

<sup>14</sup> Che bidzujn or, gurenäj Jesús rexpejn<sub>pacni</sub> lo mex.

<sup>15</sup> Dxejc räjpni lojreni:

—Guyuduxhä gaan gaunää́pactu xchej xten pascw ansde tedä trabajwduxh. <sup>16</sup> Sa'csi rniä lojtu, diruna gaunää́ la'tu pascw cheni guidzujnli dxej ni gacni lo xcälrnibee Dios.

<sup>17</sup> Dxejc cua'ni te co'p, badeedni xquixtios lo Dios, räjpni:

—Colyä' dee, colgudeedni lo sa'tu. <sup>18</sup> Sa'csi rniä lojtu, diruna yä'ä nis ni rii yejc uub stehuält cheni guidzujnli xcälrnibee Dios.

<sup>19</sup> Dxejcti cua'ni yätxtiil, badeedni xquixtios loj Dios, gula'nini, gudisnini lojreni, räjpni:

—Dee najc si'c tiexhä ni gudedä ju'treni xcuenttu. Colyejn screeza te guinalajztu narä.

<sup>20</sup> Si'cza bennäjni co'p che gulujx gudajwreni, räjpni lojreni:

—Ni yu' neñ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn ni aguleni.

<sup>21</sup> 'Per bahuilaare, bejn ni guto' narä sobganäj narä lo mexre. <sup>22</sup> Guliipacni, Xi'n Dios ni gujc Niguui sinuu tedni loj nezyuj ni abaluu Dios lojni. Luxh proobza bejn ni guto' narä.

<sup>23</sup> Dxejc gusloj canabdiidxreni lo sa'reni, ¿chuchani'c gunni?

*Cayejyreni chuni'c najc beñroru*

<sup>24</sup> Sas gusloj cayejyreni, don chuni'c guibee gac beñro lojreni.

<sup>25</sup> Dxejcti räjp Jesús lojreni:

—Rereii ni rnibee lajdx bejn ni digac xpejn Israel, rnibeereni lojreni astoo xtenpacreni najc reguejdxga. Luxh rebenguejdxga rnii lacti hueen najc rereiiga. <sup>26</sup> Per la'tu na'c gactu si'c. Nani najc bengoolru lojtu, ni'c riäj] gacni si'c najc ni huinru lojtu. Luxh nani rnibee riäj] gacni

si'c mos. <sup>27</sup> ¿Chuni'c sajcrú lo bejn? ¿La bejn ni rbej lo mex te gauni o la ni ruteed xhi gaureni lo mex? ¿La xhet sajcdiru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

<sup>28</sup> 'La'tu najctu ni gusunäj narä guideb ni gudedä re-trabajw ni gudedä. <sup>29</sup> Ni'cni narä runidxä yäl'rnibee lojtu sigajc ni baniidx xtad yäl'rnibee loä, <sup>30</sup> te gautu, yātu lo xmexä xhaguibaa, te cuezatu lo yagxhil cadro guntu yäl'guxhtis loj rexpejn guitzubitio'p rexagdoó Israel.

*Räpxgaa Jesús di Pedr guicäjp numbeeni*  
(Mt. 26:31-35; Mr. 14:27-31; Jn. 13:36-38)

<sup>31</sup> Räj p Jesús loj Simón:

—Simón, Simón, agunab bejdxab ni laa Satanás luj te gusniibni luj si'c rusniib bejn xob te jiani. <sup>32</sup> Narä agunabä lo Dios xcuentlu te na'c jiäädx xcäl'rililajzlu. Luxh luj che gusiejch lajzlu, guibi'lu, bastioob lastoo resa'lu.

<sup>33</sup> Räj p Simón lojni:

—Dad, narä sirinalälu; mase gusäureni luj latzguiib, näjza narä siäunäälü; mase ju'treni luj, näjza narä set-näälü.

<sup>34</sup> Dxejcti räj p Jesús loj Simón:

—Pedr, rniä lojlu, nicla gajd guidgái cuedxa' nadxej niluxh luj alaräjplu choñli huält, dipaclu gumbee narä.

*Nanab soob rediidx ni bacuaareni xcuent Jesús*

<sup>35</sup> Dxejc gunabdiidx Jesús lojreni räj pni:

—Che ganaxtu baxhalä la'tu, xhet bolsdi sanātu, nicla carterdi, niclaza stee gura'chdi, ¿la yu' xhi biquiintu, xhi biäädx lojtu, ä?

Dxejc räj pni:

—Xheti.

<sup>36</sup> Dxejc räj pni lojreni:

—Luxh naj rniä lojtu, ni rajp bols, suchanänini; sigajcza carteer. Luxh ni di ga'p espaad, guto'ni xchamarni te siini tejni. <sup>37</sup> Sa'csi rniä lojtu, sisiojb rediidx ni caj lo requijtz Dios xcuentä, cadre caj: “Bigabnäjni reben latsiaj.” Guiraa ni caj lo reguijtz xten Dios xcuentä nanab soobpacni.

<sup>38</sup> Dxejc räjpreni lojni:

—Dad, aree tio'p espaad.

Dxejc räjpni lojreni:

—Sajl reni'c.

*Rbedx-rniab Jesús loj Dios*

*(Mt. 26:36-46; Mr. 14:32-42)*

<sup>39</sup> Dxejcti birii Jesús, si'cni rujnpacni, sääni nez dajn ni laa Oliib. Dxejc sanajl rexpejnpacni. <sup>40</sup> Che bidzujnreni ro'c, räjpni lojreni:

—Colcuedjdx, colnab lo Dios te na'c jiajbtu lo dojl.

<sup>41</sup> Dxejc gubicaj Jesús lojreni, huijni te lajt zite' cadre suga'reni, si'cti cadre rdzujn te guij che rucuaanini. Ro'c bazuxhijbni, gurejdx-gunabni lo Dios, <sup>42</sup> räjpni:

—Xtadä, palga rlajzlu, baslaa narä loj trabajwduxhre. Niluxh na'c gacni si'c ni rlazä narä. Bejn si'cni rlajzlu gunlu.

<sup>43</sup> Dxejc biricaj te xangl Dios lojni te badeedni yälru-tiplajzni. <sup>44</sup> Lajni cadejdni trabajwduxh, cayac-huinuxh lajzni, cabedx-canabrui lo Dios. Guzunislini gusloj catejb lo yuj biniduxh si'c rejn lojni.

<sup>45</sup> Cheni huisuni, gulujx gurejdx-gunabni lo Dios, huijni cadre suga' rexpejnpacni. Ro'c bidxälnireni nagayejs guiraareni sa'csi cayac-huin lajzreni. <sup>46</sup> Dxejc räjpni lojreni:

—¿Xhicuent nagayejstu? ¡Colchastie! ¡Colnab lo Dios te na'c jiajbtu lo dojl!

*Che gunaazreni Jesús**(Mt. 26:47-56; Mr. 14:43-50; Jn. 18:2-11)*

<sup>47</sup> Laḷ ni canii Jesús lojreni, bidzujñ xhidajl bejn. Tej rexpejn̄pacni ni laa Judas, niydni nez loj rebejn̄ga. Dxejcti gubigni loj Jesús, te bachagro'ni loj Jesús. <sup>48</sup> Dxejc räjp Jesús lojni:

—Judas, ¿la con te yäl̄ruchagro' ruteedlu Xi'n Dios ni gujc Niguii ladz̄naa rebejn̄re, ä?

<sup>49</sup> Che bahuii reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ¿la sixa'tnu yejcreni con spaad, ä?

<sup>50</sup> Sas tej rexpejn̄ Jesús gudiñ̄näj te mos xten ni rnibee loj rebixhojz, batiu'ni diajgni ladbee. <sup>51</sup> Dxejc räjp Jesús lojreni:

—¡Agujc! ¡Colgusaanreni!

Dxejc gudajn̄ Jesús diajg mosga, basiajcnini. <sup>52</sup> Gunigajc Jesús loj reni rnibee loj rebixhojz näjza reni najc guix-hajg xten guidoo näjza rebengool, guiraa reni siädxiniini, räjpni:

—¿La siädnätu spaad näjza garo't, astoocanu siädxiiitu te gubaan, ä? <sup>53</sup> Cheni suga'a lojtu guixe-guixee neñ̄ guidoo, ditu nuhual̄ narä. Per dee najc xořtu, luxh arnibee yäl̄nacäjy la'tu.

*Di Pedr quicäj̄p numbeeni Jesús**(Mt. 26:57-58, 69-75; Mr. 14:53-54, 66-72; Jn. 18:12-18, 25-27)*

<sup>54</sup> Dxejcti gunaazreni Jesús huinärenini rolijz bixhojz ni rnibee lo guiraa rebixhojz. Siädnäj̄l Pedrni zit-zijt. <sup>55</sup> Che bidzujñreni gule'creni guiboo galäii lole' xten bixhojzga, gurejreni guideb gabi, te bidxa' lajzreni. Näj Pedr nadxaag lojreni gurej ro'c. <sup>56</sup> Dxejc te gunaa ni rujn̄ dzuun ro'c, che bahuiini sobga' Pedr ro'c, rdxelojtsisni lojni, räjpni:

—Näj niguiire guyunäj Jesús.

<sup>57</sup> Dxejc basuni' Pedr räjpni:

—Nan, dina gumbeäni.

<sup>58</sup> Che gojl stera't, che bahuii stee bejn lojni, räjpni lojni:

—Näj luj najclu te rexpejn̄ni.

Per Pedr räjp lojni:

—Gurniälojlu, Dad, dina gacä xpejn̄ni.

<sup>59</sup> Che gudejd si'cti teb or, räjp stee bejn lojni:

—Guliipacni, näj bejnre guyunäjni, sa'csi laani najczani te bejn Galilee.

<sup>60</sup> Dxejc räjp Pedr lojni:

—Gurniälojlu Dad, dipacna ganä xhini'c caniilu loä.

Lałni canii Pedr rediidxre, guredxa' te guidgaii, <sup>61</sup> luxh gubiréza Jesús, bahuidzu'tzni lo Pedr, dxejc banalajz Pedr nani gunii Jesús lojni, räjpni: “Che gajd guidgaii cuedxa', abazuni'lu chojn huält, räjp̄lu dilu gumbee najrä.”

<sup>62</sup> Dxejcti guc-huin lajz Pedr, biriini ro'c, ronduxhni.

### *Rniyajreni Jesús*

(Mt. 26:67-68; Mr. 14:65)

<sup>63</sup> Rebejn̄ ni canäj Jesús, gusloj caguxhisnäjrenini, caguijnzaarenini. <sup>64</sup> Dxejc basäurenini lojni, gudajpreni lojni, räjpreni lojni:

—;Gunii chuni'c gudijnlu!

<sup>65</sup> Luxh guraloj cayäjbreni lojni, caniyaduxhrenini.

### *Bidzunäjreni Jesús nez loj rebixhojz*

(Mt. 26:59-66; Mr. 14:55-64; Jn. 18:19-24)

<sup>66</sup> Che bara yääl, bidojp rebengool ni rnibee, näjza reni rnibee loj rebixhojz, näjza rebejn̄ ni ruluii leii, huinäreni Jesús te suuni nez lojreni nejn̄ yu' cadre rujnreni yälguhtis. Dxejcti räjpreni lojni:

<sup>67</sup> —Palga luj najclu Crist, bicäjpni loonu.

Dxejc badzu' Jesús diidxre lojreni, räjpni:

—Palga guicäpäni, ditu chalilajz. <sup>68</sup> Luxh palga gunä te yälgunabdiidx lojtu xcuent Crist, ditu gudzu' diidxga laä. <sup>69</sup> Per najli sibej Xi'n Dios ni gujc Niguii xladbee Gueb Dios ni yu' xhaguibaa.

<sup>70</sup> Dxejc gunabdiidx guiraareni lojni, räjpreni:

—Mbaj pues, ¿la luj najclu Xi'n Dios, ä?

Dxejc badzu' Jesús diidxre lojreni räjpni:

—Nacäni, si'cni najtu la'tu.

<sup>71</sup> Dxejc räjpreni lo sa'reni:

—¿Xhirucxhamaaz rlanjtu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

## 23

### *Jesús nez loj Pila't*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Dxejc huisu guiraareni, huinäreni Jesús nez loj Pila't.

<sup>2</sup> Ro'c guslojreni cabe'creni xquejni, räjpreni:

—Bidxälnu bejnre cayujnni bieje lo rexpejnnu. Räjpzani xhet nanabdi quiixnu impuest lo rei César. Caniizani laani najcni Crist, nalajznu najczani rei.

<sup>3</sup> Dxejc gunabdiidx Pila't lojni, räjpni:

—¿La luj ni najc rei xten rexpejn Israel, ä?

Sas badzu' Jesús diidxre räjpni:

—Najcni lagajc si'c ni guniilu.

<sup>4</sup> Dxejc räjp Pila't loj reni rnibee loj rebixhojz näjza loj guiraa rebejn:

—Dina guidxälä nicla tej dojl xten bejnre.

<sup>5</sup> Niluxh laareni sanuutis caniireni, dipru caniireni, räjpreni:

—Guiraa reben Judea cayu' yärsia' xcuent xcälrluiini. Guslojni guedx Galilee, luxh reeli sanuu caguluiinini.



*Jesús nez loj Herodes*

<sup>6</sup> Che biejn diajg Pila't rediidxre, gunabdiidxni: “¿La Galilee siääd bejn̄ga?” <sup>7</sup> Cheni räjpreni ro'c siäädni, baxhałnini loj Herodes ni najc gubernadoor xten Galilee, sa'csi nen̄ redxejga yu' Herodes guedx Jerusalén. <sup>8</sup> Che bahuii Herodes loj Jesús, bibalajzni sa'csi agujc xchej rłajzni fiini lojni, sa'csi abiejn diagni diidx xcuent ni cayujni. Luxh rłajzni fiini gunni te milaagwr. <sup>9</sup> Xhidajl yäl-gunabdiidx bejn Herodes, luxh xhet guniidi Jesús. <sup>10</sup> Ro'c suga'za reni rnibee loj rebixhojz nájza rebejn̄ ni ruluii leii, cabecduxhrureni xquejni. <sup>11</sup> Dxejc gulälaz Herodes náj rexsoldaadni Jesús, baxhiznájrenini, ni'c bashuajcwrenini te ladsa'c sa' ni rajcw reii, dxejcti baxhalsacrenini loj Pila't. <sup>12</sup> Lagajc dxejga, Pila't nájza Herodes gujcreni amiigw, luxh galoo bidxe'ch lo sa'reni.

*Gunibereeni guet Jesús*

*(Mt. 27:15-26; Mr. 15:6-15; Jn. 18:39-19:16)*

<sup>13</sup> Dxejc gurejdx Pila't reni rnibee loj bixhojz, nájza rebengool ni najc guxhtis, nájza rebenguejdx. <sup>14</sup> Dxejc räjpni lojreni:

—La'tu biädñātu bejn̄re loä, najtu caguquıl̄ni rebejn̄ gunreni biejy, luxh narä agunabdiidxä guiraloj lojni nez lojtu, luxh abahuiitu dina nidxälä nicla tej dojl̄ ni cagu-cuaquijtuni. <sup>15</sup> Niclaza Herodes di nidxäl nicla tej dojl̄, ni'cni baxhalsacnini loonu, luxh abahuiitu xhet dojl̄di bejn̄ni te guetni. <sup>16</sup> Ni'cni quinäni, dxjecti guslaáni.

<sup>17</sup> Najc costumbr rusłaa Pila't te bejn̄ ni yu' nen̄ latzguiib casob rajc lanijre. <sup>18</sup> Per guiraareni guredxa'reni si'c tejsi bejn̄, räjpreni:

—¡Bagu't bejn̄re, basłaa Barrabás!

<sup>19</sup> Barrabás najc ni basälreni latzguiib sa'csi batojpni te cuaa bejn̄ ni bacuanäj resoldaad xten Rom̄, nájza sa'csi

yu' chu bagu'tni. <sup>20</sup> Rlajzpac Pila't guslaani Jesús, ni'c gunisacni lojreni, <sup>21</sup> niluxh rebejn dipru guredxa'reni, räjpreni:

—¡Bacuaani lo cruzj, bacuaani lo cruzj!

<sup>22</sup> Riojn gunisac Pila't lojreni, räjpni:

—¿Xhi dolduxh bejnni? Xhetlidi dojl rdxälä bejnni te guetni. Ni'cni siguinäni dxejc suslaäni.

<sup>23</sup> Luxh laareni sanuutis guredxa'reni, gunabreni xcajni lo cruzj. Luxh sa'csi guredxa'tisreni, bejntireni gaan gujc si'c ni rlajzreni. <sup>24</sup> Dxejc cuäjb Pila't gunibeeni gac si'c ni gunabreni. <sup>25</sup> Dxejc baslaani bejn ni yu' latzguiib sa'csi bejnni biey, bagu'tzani bejn, dxejc badeedni Jesús lojreni te gunnäjrenini si'ctis ni rlajzreni.

### *Che cuaj Jesús lo cruzj*

(Mt. 27:32-44; Mr. 15:21-32; Jn. 19:17-27)

<sup>26</sup> Cheni sanäreni Jesús xcaj lo cruzj, gunaazreni te bejn ni laa Simón ni siääd guedx Cirene; basaj bejnnga lo niaa. Dxejc basguurenini cruzj, siädnajltini dejtj Jesús.

<sup>27</sup> Siädnajlza xhidalduxh bejn, näjza xhidajl gunaa ni cayonduxh, cabedxa'reni sa'csi cayac-huinduxh lajzreni xcuent Jesús. <sup>28</sup> Dxejc gubiré Jesús, räjpni lojreni:

—Gunaa Jerusalén, na'c roontu xcuentä, colyoon la-gajc xcuenttu näjza xcuent rexi'ntu. <sup>29</sup> Sa'csi sidzujn dxej gäbreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiä' báz.” <sup>30</sup> Dxejc guisloj rebejn gäb loj redajn: “Coljiajb yejcnu”, säjzbareni loj relom: “Colgucua'tz nuurnu.” <sup>31</sup> Palga scree runnäjreni narä ni nacä si'c te yagnaga, aticaxh gunnäjreni la'tu ni najc si'c te yagbijdz.

<sup>32</sup> Sanäzarení tio'p benguijdx xcajzarení loj recruzj, guetnäjreni Jesús. <sup>33</sup> Che bidzujnreni te lajt ni laa Calabeer, ro'c bacuaarení Jesús lo te cruzj, bacuaazarení

guiro'p rebenguijdxga lo stio'p cruuz, tejni xladbee, steeni xladbäjgwni. <sup>34</sup>Cheni cagucuaa rebejn reni lo cruuz, gunii Jesús, räjpni:

—Xtadä, badzucaj xtoj rebejnre, sa'csi direni gan xhini'c cayujnreni.

Dxejc gudzujt resoldaad daad yejc xhajnbi, te gudisreni xhajnbi cua'renini. <sup>35</sup>Suga' rebejn ro'c cadxelojtisreni. Näjza reguxhtis caguxhisnäjreni laani, cayäjpreni:

—Balti bejn baslaani, naj suguslaani lagajc laani palga guliini laani najcni Crist ni gule Dios.

<sup>36</sup>Näjza resoldaad caguxhisnäjni, gubigreni lojni te badeedreni bin-nii yäni. <sup>37</sup>Dxejc räjpreni lojni:

—Palga gulii najclu reii xten rexpejn Israel, baslaa lagajc luj.

<sup>38</sup>Luxh bacuaareni gaii diidx loj te baräjd ni cuaj yejc cruuz. Con didx griegw, con didx latin, näjza didx hebreo, bacuaareni scree: “Dee najc Reii xten rexpen Israel.”

<sup>39</sup>Te reben guijdx ni najl lo te cruuz ni caj cuä'ni caniyajni Jesús, räjpni lojni:

—Palga luj najclu Crist, baslaa lagajc luj nägajcza nuurnu.

<sup>40</sup>Per benguijdx ni najl lo cruuz stelaadga gudidxa'ni loj stee benguijdx ni caniyaj Crist, räjpni:

—¿La dilu guidxeyb Dios? ¿Ni cayajczalu tejsi castiigw!

<sup>41</sup>Per nuurnu cayajcnu castiigw ni riäjgacnu te guidiixnu redojl ni biennu. Luxh laani xhet dojldi bejnii.

<sup>42</sup>Dxejc räjpni loj Jesús:

—Bazalajzlu narä che guidzujnlu lo xcälrnibeelu.

<sup>43</sup>Dxejc badzu' Jesús diidxre, räjpni lojni:

—Rniliápac lojlu, lagajc nadxey chunäjlu narä xhaguibaa.

## San Lucas 23:44 100 San Lucas 23:56

### *Che gujt Jesús*

(Mt. 27:45-56; Mr. 15:33-41; Jn. 19:28-30)

<sup>44</sup> Agojl si'cti läidxej. Dxejc bicäy guideb guedxliuj, si'c bianxcäy si'cti rcachonti. <sup>45</sup> Bicäy lo gubijdx, luxh ladró ni najl nen yudxanro xten guidoro, biräjsni gucni tio'p la'.

<sup>46</sup> Dxejcti guredxa' Jesús, räjpni:

—Xtadä, ladzñaalu rutedä xaimä.

Che guniini si'c, gujttini.

<sup>47</sup> Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni:

—Guliipacni, xhet dojldi bejn bejnre.

<sup>48</sup> Guiraa rebejn ni suga' ro'c ni bahuii guiraa ni guzajc ro'c, gubi'reni rolizreni, cayääzreni lagajc lastooreni.

<sup>49</sup> Luxh guiraa reni rumbee Jesús, näjza regunaa ni biädna-jlni che biriilini Galilee, zijtru bia'nreni cahuiireni guiraa recos ni cayajcre.

### *Che biga'tz Jesús*

(Mt. 27:57-61; Mr. 15:42-47; Jn. 19:38-42)

<sup>50</sup> Guyu' te bejn ni laa José, lacti huen najcni, luxh laaca rujnni guira'ti. Siäädni guedx Arimatea, región Judea. Nadxaagzani loj reni rnibee nen guidoro xten rexpejn Israel. <sup>51</sup> Cabäjzza José jiääd yälrnibee xten Dios, ni'cni dini nidxaglazj nani bejn resa'ni. <sup>52</sup> Dxejcti huijni lo Pila't, gunabni tiejxh Jesús. <sup>53</sup> Che gulättnini lo cruiz, batejbnini nen te bariaad, dxejcti bacua'tznini nen te baa ni guc-chee cuä' te guilaj. Nacoob baaga, nicla tej bejn gajd guiga'tz ro'c. <sup>54</sup> Dxejga najc dxej ni rusucheereni guira'ti, luxh agojl jiu' dxej ni rusilajzreni.

<sup>55</sup> Regunaa ni guzanäj Jesús che biriilini Galilee huihui-ireni robaaga te bahuiireni xho gudixhreni togoalga nen baa. <sup>56</sup> Che gubi'reni rolizreni bencheereni recuaan ni rlianexhduxh näj te ni najc si'c te saj ni rlianexhduxh ni

ruzaareni retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

## 24

*Che gubaṅsac Jesús lo rebengut*

*(Mt. 28:1-10; Mr. 16:1-8; Jn. 20:1-10)*

<sup>1</sup> Dxej ni gusloj xmaanga, rsildooru huinä regunaaga robaa recuaan ni rlianejxh ni bencheereni. <sup>2</sup> Che bidzujreni, bahuiireni agubicaj guij ni rusäu ro' baa. <sup>3</sup> Dxejc che biu'reni neṅ baaga, direni nidxäl tiejxh Jesús. <sup>4</sup> Laḷ ni cadxelojreni, di jien xhi gunreni, biricaj tio'p dade' gusuj cuä'reni. Rdimbichaduxh xhajbreni. <sup>5</sup> Bidxebduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädtiiltu te bejn ni nabajṅ lo rebengut, ä? <sup>6</sup> Rutini ree. Agubaṅsacni. Colgusnaj lajztu rediidx ni guniini cheni guyusijcni Galilee, <sup>7</sup> che najni lojtu: “Riäjl jiajb Xi'n Dios ni gujc Niguii ladzṅaa rebendojḷ, xcajzani lo cruiz, dxejc ni riojṅ dxejga sibāṅsacni loj rebengut.”

<sup>8</sup> Dxejc banaj lajz regunaa xtidx Jesús, <sup>9</sup> biriireni robaa, gubi'tireni te bijreni diidx lo retzubiteeb rexpejṅpacni näjza loj rebejṅ ni yunäjreni. <sup>10</sup> Reni huisa'n diidx loj rexpejṅpac Jesús najc redee: Marii Magdalen, näjza Xuan, näjza Marii xnan Jacoob, näjza sgaii gunaa. <sup>11</sup> Niluxh rexpejṅpacni bejn xhigab didxnayäälni, direni nililajz xtidx regunaaga.

<sup>12</sup> Dxejc huisu Pedr, ruxuṅlini huijni ro' baa. Che gudixhlojni, bahuiini neṅ baaga, ganaxtis bariaad dzuub te laad. Dxejc gubi'ni rolizni, rdxelojtisni xcuent ni gujc.

*Ni guzajc lo nezyuj ni sii guedx Emaús*

*(Mr. 16:12-13)*

<sup>13</sup> Lagajc dxejga, tio'p rexpejn<sub>pacni</sub> sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén. <sup>14</sup> La<sub>l</sub> ni sasajreni lo nezyujga, cayujyreni diidx xcuent reni gujc ro'c. <sup>15</sup> La<sub>l</sub> ni caniireni gubig Jesús lojreni, gusloj sasanäjnireni. <sup>16</sup> Luxh mase cahuiireni lojni, yu' xhi badxojn niembeerrenini. <sup>17</sup> Dxejc gunabdiidx Jesús lojreni, räjpni:

—¿Xhini'c ruytu la<sub>l</sub> ni sasajtu, ä? ¿Xhicuent cayac-huin lajztu?

<sup>18</sup> Tejreni ni laa Cleofas badzu' diidxre, räjpni:

—Guiraasi bejn najn xhi gujc nen<sub>guedx</sub> Jerusalén. ¿La lujtis bia'nlu nen<sub>guejdxga</sub> ni di gan xhi gujc ro'c, ä?

<sup>19</sup> Dxejcti räjp Jesús lojreni:

—¿Xhini'c gujc ro'c?

Dxejc räjpreni lojni:

—Recos xcuent Jesús ni siääd guedx Nazare't, ni gujc te niguii ni gunii xtidx Dios, räjpni yäl<sub>rnibeduxh</sub> xten Dios loj redzuun ni rujnni näjza loj rediidx ni rniini, nez loj Dios näjza nez loj rebejn. <sup>20</sup> Näjza xho bejn reni rnibee loj rebixhojz näjza rexcuxhtisnu, bateedrenini ladz<sub>naa</sub> reni gunibee guetni, dxejc bacuaarenini lo crujz. <sup>21</sup> Niluxh nuurnu cabääznu laani gacni nani nus<sub>laa</sub> rexpejn Israel ladz<sub>naa</sub> reben<sub>zijt</sub>. Naj agujc cho<sub>n</sub> dxej ni gujc recosre. <sup>22</sup> Luxh yu' gaii gunaa ni nadxaag loonu ni baschelojreni nuurnu. Barsil, che huijreni robaa xtenni, <sup>23</sup> direni nidxäl tiejxhni. Biädsa'nreni diidx loonu najreni bahuiireni lo tio'p xangl Dios ni räjp lojreni, agubansac Jesús lo rebengut. <sup>24</sup> Dxejcti huihuii gaii sa'nu robaa, bahuiizarení najcni si'ctis ni naj regunaaga loonu, niluxh direni nuhuii loj Jesús.

<sup>25</sup> Dxejc räjp Jesús lojreni:

—¡Lacti nayääl tre' xcäriejntu! Lacti nen<sub>rililajztu</sub> xtidx redade' ni gunii xtidx Dios xcuent Crist. <sup>26</sup> ¿La di

nungäjł tedxгаа Crist re TRABAJWduXhRE dxejcti jiu'ni lo xcälrdimbicha' Dios, ä?

<sup>27</sup> Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäjni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

<sup>28</sup> Che bidzujñreni guejdx cadre sääreni, bejn Jesús si'cni chanuuni chääni lo nezyuj. <sup>29</sup> Dxejc laareni bascuääzrenini te jiannäjñreni, räjñreni lojni:

—Biannäj nuurnu, sa'csi acayajc gudxej, agojl jiu' guxhijñ.

Dxejcti biu' Jesús te jiannäjñreni. <sup>30</sup> Cheni sobganäjñreni lo mex, cua'ni yätxtiil, benle'nini, dxejc gula'nini, gudisnini lojreni. <sup>31</sup> Lagajc dxejc, baxhal Dios balojreni, biembeereni Jesús, dxejc laani gunitlojni lojreni. <sup>32</sup> Dxejcti räjñreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

<sup>33</sup> Dxejc dirureni nibäjz ro'c, alga gunasgajçreni nez, gubi'reni guedx Jerusalén. Ro'c bidxälreni abidojp xpejñpac Jesús näjza sgaii bejn. <sup>34</sup> Dxejcti bijñreni diidx loj guiro'pñreni bidzujñ, räjñreni:

—Guliipac gubansac Jesucrist, luxh baluilojni loj Simón.

<sup>35</sup> Dxejc guiro'p reni bidzujñ bijzarenini diidx ni gusajçreni lo nezyuj, näj xho biembeezarenini Jesús che gula'ni yätxtiil.

*Baluiloj Jesús loj rexpejñpacni*

*(Mt. 28:16-20; Mr. 16:14-18; Jn. 20:19-23)*

<sup>36</sup> Canisi'çreni rediidxre chela baluiloj lagajc Jesús galäiireni, guniini xchan lojreni, räjñni:

—¡Colçuecdxi lajztu!

<sup>37</sup> Per laareni rdxelojreni bidxejbreni, naareni cahui-  
ireni lo te sprit. <sup>38</sup> Dxejc räjp Jesús lojreni:

—¿Xhicuent cadxejbtu? ¿Xhicuent rac tio'p lastootu?  
<sup>39</sup> ¡Colhuii renaä, näjza reni'ä! Lagajc naräni. Colcajn narä  
te fiipactu laa naräni, sa'csi anajntu di te sprit ga'p bääl  
niclaza tzujt si'c rapä narä.

<sup>40</sup> Che guniini rediidxga, baluigajcni renaani näjza  
reni'ni. <sup>41</sup> Laḷ ni cadxelojreni, di gacdi chalilajzreni, sa'csi  
cabaduxh lajzreni, räjpni lojreni:

—¿La yu' xhi rajptu gauä ree, ä?

<sup>42</sup> Dxejc badeedreni te la' bälbigue', näjza te la' seer ni  
yu' tzujn. <sup>43</sup> Ni'c cua'ni gudajwnini nez lojreni. <sup>44</sup> Dxejc  
räjpni lojreni:

—Dee najc xtidxä ni rniä lojtu cheni yusicä lojtu, rniä  
riäjḷ soob guiraa rediidx xcuentä ni caj lo xleii Moisés,  
näjza lo rexquijtz redade' ni gunii xtidx Dios näjza ni caj  
lo rexquitz Salmos.

<sup>45</sup> Dxejcti basanijni xcäriejnreni te gucbeereni xhi säloj  
rediidx ni caj lo rexquijtz Dios xcuentni. <sup>46</sup> Dxejc räjpni  
lojreni:

—Scree caj lo reguijtz: Nanab guet Crist, dxejc ni riojn  
dxej, guibaṅsacni loj rebengut. <sup>47</sup> Sire'chza diidx xcuent  
xho rusḷaa Crist rebejn nenḷ dojl che rusiejchreni lajzreni,  
che rililajzreni xtiidxni. Guedx Jerusalén guislojni, dxejc  
sire'ch diidx guideb guedxliuj. <sup>48</sup> La'tu najctu testiigw  
guiraa recosre. <sup>49</sup> Narä suxhaḷä Sprit Dxan xten Dios  
lojtu, ni'c coljia'n guedx Jerusalén cheni jäädḷäjzlini nenḷ  
lastootu, guniidxni yälḷrnibee ni siääd xhaguibaali.

*Huäjs Jesús xhaguibaa*

*(Mr. 16:19-20)*

<sup>50</sup> Dxejc huinä Jesúsreni stelaad guedx Jerusalén gajxh  
lo te guejdx ni laa Betania. Ro'c guläsni ḷaani, benle'ni



yejcreni. <sup>51</sup> Lal̄ ni cayujnni si'c, gubicajni lojreni, huäjsni xhaguibaa. <sup>52</sup> Peta laareni gulujx gojnrenini, dxejc cabalazduxhreni gubi'reni guedx Jerusalén. <sup>53</sup> Ro'c guixee guyu'reni neñ guidoro, calä'preni xpala'n Dios. Sugacni si'c.

## **Xtidxcoob Dios ni biändä dad Jesucrist New Testament in Zapotec, Mitla (MX:zaw:Zapotec, Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

### **Copyright Information**

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 27 Jul 2022 from source files dated 28 Jun 2022

5cff1274-8dc3-5398-a94d-f6033bb363c9